

**BREVIS
SYNOPSIS
VITAE, AC
VIRTUTUM P.
ANTONII IULII...**

Giovanni Maria Visconti,
Martin Bouché, ...






Handwritten:
110
20

I

13.



Assistentia Germanica. &c.

BREVIS SYNOPSIS
VITÆ , AC VIRTVTVM
P. ANTONII IVLII
BRIGNOLE
E SOCIETATE IESV.

*Qui prius fuit Marchio Gropoli in Hetruria,
Filius Ducis, & senator Serenissimæ Rei-
publicæ Genuensis , ejusdemque Orator
ordinarius ad Regem Catholicum.*

Collecta idiomate Italico

A

P. IOANNE MARIA VISCONTE
Ad usum Provinciæ Mediolanensis.

Ac deinde latio data

A

P. FRANCISCO L'HERMITE

*Vt omnibus nationibus communis fieret ;
Ambobus ejusdem Societatis presbyteris.*




D. PROB. ROM. S. J.

ANTVERPIÆ,

Typis CORNELII WOONS, sub signo Stellæ. 1671.

Cum Gratia & Privilegio.



THE NEW YORK PUBLIC LIBRARY

ASTOR LENOX AND TILDEN FOUNDATIONS

500 N. 5TH ST. NEW YORK, N. Y.

1891

1891

1891

1891

1891

1891

1891

1891

1891

1891

1891

1891

1891

1891


1891

1891



Mart. Bouche fecit

*Vera effigies P. Antonii Iulii
Brignole e Societate IESV, qui potens
opere et sermone, cum opinione sanctitatis
obit Genuæ in patria sua, Anno salutis
1662. ætatis 57. die 20. Martii.*



VENERANDO PATRI
P. ANTONIO IVLIO
BRIGNOLE

RELICTIS MARCHIONATV,
IN SERENISSIMA REPVB.

GENVENSI SENATORIS,

EIVSDEMQUE LEGATI

AD REGEM CATHOLICVM

AMPLISSIMIS MVNERIBVS;

VNA CVM DOMO AC LIBERIS

AD IESU HUMILITATEM AC LABORES

SE CONFERENTI.

P R O G R A M M A

Ex Psalmo Vatis Regii 5. vers. 13.

Per modum prognostici.

Gloriabuntur in te omnes, qui diligunt Nomen tuum, quoniam Tu benedices Iusto. Domine, ut scuto bonæ voluntatis tuæ coronasti nos.

A N A G R A M M A.

Antonius Iulius Brignole, Notos, Subditos, Legationes, & Munia, nomenclaturaque bona; nec non cautè totum mundum nutu, voto, reque dimisit.

Vtrobique reperiuntur

Litteræ numero pares.

6. 3. 3. 3. 9. 2. 11. 3. 5. 13. 12. 2. 3. 7. 12. 14.

A. b. c. d. e. g. i. l. m. n. o. q. r. f. t. v.

EPIGRAMMA.

A Spice BRIGNOLI depicta in imagine Vultus,
Hic vir hic est summis par, propiorque viris.
Clarus avis, opibus præstans, sed major honore
Dum spreuit fastu quidquid in orbe tumet
Veste latens Iesu. Mirare ipsumque nec ipsum
Non nisi despectus, qua latet esse puta.
Omnia contempsit qui se, pedibusque premendo
Major ab abjecto, dum bene calcatur, erit.
Dum sequitur Iesum: mundum fugit; omnia liquit;
Se simul in Christo perdidit, & reperit.
An poterat trabeas inter, fascesve, Tiarasve
Altior obsequium seque probasse Deo?
Non. Melius latitat sub nomine rectus Iesu,
Tutius hunc pugilem decolor umbra tegit.
Quo scuto latuit, latuit victoria scuto:
Sic bene pugnanti, pugna corona fuit.

TRANSLATOR LECTORI.

S.

Suffragatus curis meis gravioribus tantillum otii, quo tibi, & universo orbi, etiam hæc gesta P. Antonii Iulii Brignole publici iuris facerem; sicut feci non ita pridem in transferenda Vita Cæsaris Caietani Novitii nostræ Societatis, quam multis non displicuisse, est quod mihi gratuler. Breviter monitum te volui benevole Lector me sequutum prope de verbo ad verbum phrasim Italicam Autoris P. Ioannis Mariæ Visconte, ne quæsis phaleris nudam veritatem, quæ simplicitate gaudet, periculo exponerem, pigmentis non necessariis offuscandi: nec
enim

enim viri spectata virtus, iis fucis indiget ad commendationem. Exemplum dedit huic seculo eiusmodi, vir id ætatis, & dignitatis plane eximius & admirandus, quod ascititiis coloribus obscuretur potius, quam illustretur. Vitiosa larvam ambiunt ut pallientur & decipiant; non quæ ex sua virtute pretium habent. Quæcumque hic leges virtutum in religiosa vita prorsus singularium, humilitatis, zeli animarum, internæ externæque mortificationis, contemptus sui, laboris indefessi, regularis observantiae, obedientiae & unionis cum Deo non intermissæ documenta, in quorum exercitatione vixit perpetuo & immortalis est; imitationem postulant potius quam oblectationem; quamvis nec hæc fortasse defutura est iis, qui teporem suum gaudent eiusmodi adminiculis excuti, & inflammari ad fervorem. Omnibus indiscriminatim qui suæ alio-

rumque salutem ex professo incumbunt, hoc
opus utile fore confido: sed potissimum
eos, qui verbi Dei præconio affixi sunt,
hic compello; ut ab hoc Paulo discant,
non in persuasibilibus humanæ sapientiæ
verbis, non in commodorum sectatione,
& auditorum acclamatione, ac nescio
quibus lenociniis sui, & aliorum, sibi ab-
blandiri: sed quod apostolici muneris est,
annuntiare Christum & hunc cru-
cifixum magis factis quam verbis; quo-
rum hæc ærem verberant, illa in corda
etiam lapidea impetum faciunt, ut emol-
liant, & muros Iericho ad tubæ evangeli-
cæ clangorem subvertant. Hæc Charisma-
ta meliora æmulentur, quibus semen verbi
divini commissum est, ut aliquando audire
mereantur illud Patris familias cælestis,
quando veniet operariis suis distributurus
mercedem: Euge serve bone & fidelis,
quia super pauca fuisti fidelis; talen-

*ta mea bene ad censum collocasti ; lanam
odium mearum non totondisti, sed eas her-
bis salubribus pavisti; ubi latrandum erat;
voci non pepercisti ; plus vita quam ser-
monibus docuisti; & gloriam meam ubique
opportune importune propagare studuisti,
intra in gaudium Domini tui , qui
strenue pro se laborantes denario dignatur
eternae beatitatis , hoc est fruitione sum-
mi boni , ad quod ut finem ultimum , nisi
decipi malimus unice adspirandum : quod
ut cunctis eveniat serio opto. Nec aliud
habeo quod adiuciam; nisi velle me ut scias ,
Tibi huius libelli translationem non tam
mihi acceptam referendam , quam R. P.
Nathanaeli Sotuello; qui iterum huius Sy-
nopsis exemplar Italicum mihi submittere
Roma dignatus est , ut per me latine lo-
queretur. Vale , & fruiere.*

PRO-

PROTESTATIO AUCTORIS.

CUM S. D. N. Urbanus Papa VIII.
die 13. Martii anni M. DC. XXV.
in Sac. Congregatione S. R. & uni-
versalis Inquisitionis decretum edide-
rit; idemque confirmaverit die 5. Iulii
1634. quo inhibuit imprimi libros ho-
minum qui sanctitate sive martyrii fa-
ma è vita migrarunt, gesta, miracula,
vel revelationes, seu quæcumque tam-
quam eorum intercessionibus accepta
à Deo beneficia continentes, sine re-
cognitione & approbatione ordinarii;
& quæ hæctenus sine ea impressa sunt
nullo modo vult censi approbata.
Idem autem Sanctissimus die 5. Iunii
1631. ita explicaverit, ut nimirum
non admittantur elogia Sancti, vel
Beati absolutè, & quæ cadunt super
personam; bene tamen quæ cadunt
supra mores, & opinionem, cum pro-
testatione in principio quod illis nulla
adsit auctoritas ab Ecclesia Romana;
sed

sed fides tantum sit penes auctorem.
Huic decreto ejusque confirmationi,
& declarationi observantia & reveren-
tia, qua par est, insistendo; profiteor
me haud alio sensu quidquid in hoc li-
bro refero, accipere, aut accipi ab ul-
lo velle, quam quo ea solent quæ hu-
mana dumtaxat auctoritate; non au-
tem divina Catholicæ Rom. Ecclesiæ,
aut Sanctæ Sedis Apostolicæ nituntur;
iis tantummodo exceptis, quos eadem
Sancta Sedes, Sanctorum, Beatorum,
aut Martyrum catalogo adscripsit.



A P P R O B A T I O

R. P.

P R O V I N C I A L I S.

EGo infra-scriptus Societatis Iesu per Flandro-Belgicam Præpositus Provincialis, potestate ad hoc mihi factâ à Patre nostro *Ioanne Paulo Oliva* Præposito Generali ejusdem Societatis, concedo **CORNELIO WOONS** Typographo facultatem imprimendi, *Synopsin brevem Vitæ ac virtutum P. Antonii Iulii Brignole* è Societate Iesu collectam idiomate Italico à *P. Iohanne Maria Visconte*, & latine datam à *P. Francisco l'Hermite* ambobus ejusdem Societatis Presbyteris, & à deputatis ejusdem Societatis Theologis examinatam & approbatam. In quorum fidem has propriâ manu subscriptas consueti officii mei sigillo muniendas curavi, Mechliniæ 13. Martii 1671.

LAURENTIUS VAN SCHOONE.

A P-

A P P R O B A T I O.

INfrascriptus examinavi librum, cui titulus, *Brevis Synopsis Vitæ ac Virtutum P. Antonii Iulii Brignole à Societate IESU, qui prius fuit Marchio Gropoli in He-truria Filius Ducis & Senator Serenissimæ Reipublicæ Genuensis ejusdemque Orator ordinarius ad Regem Catholicum collecta idiomate Italico à P. Ioanne Maria Visconte ad usum Provinciæ Mediolanensis ac deinde latio data à P. Francisco l'Hermite ut omnibus nationibus communis fieret ambobus ejusdem Societatis Presbyteris, in quo nihil reperi quod bonis moribus aut S. R. Ecclesiæ Catholicæ adversetur, attentata etiam protestatione in initio præfati libri facta, censeo eundem posse utiliter in lucem evulgari. Datum Antverpiæ 6. April. 1671.*

AUBERTUS vanden EBDE,
I. V. L. Canonicus & Archidia-
conus, Antverp. Librorum Cen-
sor ordinarius.

SUMMA PRIVILEGII.

CAROLUS Dei gratia, Rex Castellæ, Arragoniæ, utriusque Siciliæ, &c. Archidux Austriæ, Dux Burgundiæ, Lotharingiæ, Brabantiae, &c. Comes Flandriæ, Arthesiæ, &c. Diplomate suo sanxit ne quis Librum, cujus Titulus est *Brevis Synopsis Vitæ ac Virtutum P. Antonii Iulii Brignole è Societate Iesu*, præter CORNELII WOONS Typograph. Antverp. voluntatem ullo modo in Belgio intra novem annos proximos imprimat, aut alibi imprefsum in has inferioris Germaniæ ditio- nes importet, venalemve habeat. Qui secus faxit, confiscatione librorum, & aliâ gravi pcenâ mulctabitur, ut latius patet in litteris datis Bruxellæ, die 18. Aprilis 1671.

Signat.

LOYENS.

BRE.

BREVIS SYNOPSIS
DE VITA
ET
VIRTUTIBVS
P. ANTONII IVLII
BRIGNOLE
GENVENSIS

E Societate IESU

*Ante ingressum in Religionem Mar-
chionis Gropoli in Hetruria, Filiū
Ducis & Senatoris Serenissimæ
Reipublicæ Genuensis Eiusdemque
Legati ad Regem Catholicum.*

INTRODVCTIO



Os qui noverunt de facie,
aut etiam ex fama P. Anto-
nium Iulium Brignole, per-
suadeo mihi gravissimos, se posse vi-

A

dere

dere in charta expressa aliqua lineamenta , & actiones à virtute commendabiles , quas in isto bono Patre , aut observarunt , aut narrari audierunt , furtim oblivioni subductas , invita ejus modestia , etiam in tempore maxime invido & rapace : ac proinde erit admirationis , & displicentiæ objectum , quod tam paucæ fuerint collectæ tamquam longe inferioris expectationis , quam conceperant omnes de viro , qui tota sua vita se occupabat operibus virtutum multiplicibus , & magnitudine præclaris exercendis. Singularis præstantia animi ejus , sive naturæ dotes spectes , sive gratiæ quibus erat mirificè ornatus ; non solum conciliavit ei opinionem promiscuam , fuisse hominem nostri sæculi maxime eximium : verum etiam impulit calamum veracem unius , qui perspecta habebat virorum magnorum encomia , ut scriberet : Patrem illum ejusmodi fuisse heroem , qualem singula bina sæcula , nedum unum non spectarunt. Atque ita scripsit

P. N.

P. N. Ioannes Paulus Oliva Generalis, P. Francisco Vasco Provinciali Mediolanensi, accepto nuncio de ejus felici transitu ad vitam meliorem. Verum enimvero contigit P. Antonio Iulio illud, quod solet evenire viris magnis in quocumque genere; qui quoniam consueverunt operari semper eminenter, pauca eorum opera observantur, ut excellentia. Vnde complures percunctati quid in eo ædificationis, & virtutis advertissent? Reposuerunt: quod fuerit homo insignis probitatis, quæ vulgus excederet; sed ad actiones peculiare, quod attineret, quia erant assiduæ in quibus splendor virtutis oculos perfringeret, paucissimas se adnotasse. Ita quidam Pater prudentiæ laude præditus, qui ei ad aliquod tempus Mediolani convixit, postulatus aliquid de virtutibus ejus producere, respondit; pauca se posse adferre in particulari, eo quod pauca observasset quæ deligeret, ubi omnia erant delectu digna. Attamen multa se scire in

generali : videlicet , quod in omnibus suis actibus ostenderet singularem suæ vocationis æstimationem ; & in vita religiosa summam observantiam , conjunctam cum singulari modestia ; studium magnum orationis , cum magna devotione in rebus spiritualibus ; ferventissimum zelum salutis animarum ; teneritudinem caritatis erga infirmos , & nostros ; decumbentes quoque in nosocomiis , incarceratos , & alios indigos auxilii ac calamitosos , profundam humilitatem quæ eum semper ad infima loca abiiciebat ; & omnibus cedere docebat ; nauseam omnium rerum mundanarum , & vilissimum conceptum omnium quæ mundus extollit , & amplectitur ; exquisitissimam paupertatem , omnium suarum passionum refrenationem ; in castigando corpore rigorem ; exactissimam obedientiam : quarum virtutum omnium erat in suis actionibus singulare & vivum simulachrum. Iudicavi nihilominus oleum & operam me non perditurum , si spicilegium

gium hoc instituam, & pauca licet, ne & illa oblitterentur, vobis qui eum novistis in solatium, & aliis omnibus in exemplum proponam; recensens simpliciter aliquas ejus laudabiles actiones, & designans id in singulis quo excelluit: si prius leviter tetigero quædam digna memoria in vita sæculari. Si vero in illis perhibeantur aliqua ex natura sua indifferentia; accipiantur ut facta in finem bonum, nec requiratur illius interpretationis probatio vel testimonium; quæ licet defint, non est æquum propterea derogare fidem relationi, quasi fuerint partus inanes affectus nimis benigni ejus, qui eos sic sibi repræsentavit: quippe omnium non modo actionum, sed etiam affectuum qui eum ad operandum permovebant, habita est notitia, vel immediatè ab illo, vel ab iis quibus aliquem radium quædamtenus sivit affulgere suæ arcanae illustrationis, etiamsi non omnino expediat allegare auctores: sufficere enim puto quod illud præmonuerim,

nuerim, ut ille qui opusculum hoc legerit sit securus, nihil adducendum quod alienis commentis innitatur; cum sit certum, quod virtus gigantæa Patris, opus non habeat ad magnitudinem suam ostentandam, fabrica imaginationis per affectum seductæ. Porro fieri fortasse potuit quod nonnullæ res quas eo prolatum videbuntur minutæ, nihilominus cùm non apparuerint ut pusillæ, oculis eorum quos ferierunt, & recordationi illorum qui illas fideliter retulerunt; in animum meum induxi non minores apparituras aliis; eo magis quod in supremo apice virtutis, & in difficiliorebus ejus excessibus multum lateat subtilitatis. In persona multum dilecta etiam capilli in pretio habentur.

CAPVT PRIMVM.

*Res memoratu dignæ P. Antonii Iulii
in Vita seculari antequam statum
Ecclesiasticum assumeret.*

P Antonius Iulius Brignole Gen-
nuensis natus est anno ab incar-
natione verbi divini millesimo sex-
centesimo quinto, die Iunii vigesimo
tertio. Patrem habuit D. Ioannem
Franciscum Brignole, qui primis fun-
ctionibus à Republica illa adhibitus
fuit, & missus Romam Orator ad
præstandam Gregorio XV. creato
Pontifici obedientiam ac deinde ad
Ducis dignitatem assumptus anno
trigesimo quinto supra millesimum
sexcentesium. Perfunctus demum
suprema illa gubernatione migravit
ad coelum, ut potiretur præmio suæ
iustitiæ, pietatis, & eleemosyna-
rum, quarum virtutum amabilis
comitatus eum nunquam deseruit.
Genitrix ei fuit D. Hieronyma Sale,
unica filia D. Iulii Sale, quæ multis

& amplis creditibus, prædiis, feudis, & aliis fortunæ bonis locupletavit liberos suos, atque ea de causa compellati sunt Brignole Sale. Verum enimvero multo plus ex bonis gratiæ illis adjecit, per exempla suarum virtutum; illam enim laudem tulit, quod fuerit multum dedita operibus pietatis erga Deum, & misericordiæ erga egenos, liberalissima erga pauperes; suorum commodorum curam omnem abjecerat, nullatenus vana & ambitiosa in cultu corporis quærendo, quo spectabilis appareret, aut sui similibus præferretur; sed modestissima, utpote quæ semper deterrima vilissimaque sectabatur, & diu noctuque servilibus erat occupata. Ingenio feruido, & ardente in suis desideriis, verum per virtutis exercitium multum moderato; benedixit deus isti pari fructu quindecim liberorum: sed messuit duodecim ex illis pœne in flore ætatis, reservans ad maturitatem tres solos, videlicet P. Antonium Iulium, de quo hic nobis sermo: & duas sorores:

res:

res: quarum altera fuit Domina Maria Aurelia, uxor Domini Ioannis Baptistæ Raggi, fratris & nepotis duorum Cardinalium Raggi: de qua perhibetur quod fuerit in dotibus, & ornamentis animi apprime similis suo germano, magis propensa ad studia litterarum, quam ad muliercularum vanitates: Aliena ab omni libera conversatione, spectaculis, conviviiis, & diverticulis otiosis; inimica omnis compturæ superfluae; liberalis, in eleemosynas profusa, cordata, humana, quæ nunquam sinebat verbum ex ore elabi, quo quemquam contristaret aut læderet. Hæc sat cito naturæ debitum exsolvit, anno nempe ætatis trigesimo septimo. Altera soror fuit Domina Maria Magdalena, quæ nupsit Domino Iacobo Durazzo, & genuit nostros Patres Vincentium & Hippolytum: at quoniam adhuc vivit dum hæc scribo, secundum sacri eloquii oraculum, *ne laudes hominem in vita sua*; cohibeo me, ne transgrediar hoc consilium, quod suadet ejus virtutem usque mo-

do plus æstimare , quam laudare :
quam ob rem revertor ad fratrem.

P. Antonius Iulius , ut unus & solus superstes è maribus , fuit educatus sollicitè , & accuratè excultus bonis moribus & litteris ; in quem finem semper habebat domi , copiam Magistrorum qui habebantur eruditi , & habiles ad formandum. At ipse simul ac cœpit ingenii sui fœcunditatem percipere , doluit sibi ab iis non fuisse adhibitam culturam , cuius sentiebat se capacem ; ac proinde ut proprio labore suppleret priorum præceptorum vel ignorantiam , vel socordiam ; cœpit se dare studiis secundum mensuram cupiditatis suæ , insatiabiliter avidæ ad sciendum ; adeoque cedendo isti propensione honestiori , licet nimix , utpote quæ freno indigeret ; ita abripi se sivit eorum amore , ut omnibus aliis ætatis suæ & mundi oblectationibus insuper habitis , nulla alia re se capi sine-
ret ; sed in illa sola se totum impenderet. Idque habetur ex ejus testimonio : fassus enim est postea , quod to-

ta die studiis incumberet; nec hoc contentus noctes propè integras adii- ceret, multa simul complecti deside- rans; quæ assiduitas & continuatio vires ejus sensim sine sensu enerua- vit; quippe licet bene sano & robu- sto esset corpore, post quinque ni- hilominus, aut sex annos in ista nor- ma vivendi, sensit stomachum ita pessumdatum, & caput ita debilita- tum ut periculum subiret, ne ad id, quod tam ardentè affectabatur, prorsus inidoneum se redderet. Miti- gavit ergo deinde aliquantulum in- discretam illam studendi aviditatem: ita tamen perrexit semper se occupa- re, & exercere in studiis politiorum litterarum, ut immoderatio & ex- cessus in ipsa moderatione videretur: si quidem quandoque quatuordecim per diem horas iis impendebat; quæ- rebat modos somno multum detra- hendi, ut tempus lectioni & scriptio- ni lucraretur; multum conversaba- tur & agebat cum viris eruditis, & litteratis quorum semper sibi volebat domi aliquem ad manum, quibus- cumque

cumque expensis præsentiam ejus emeret; excitabat & fovebat academias & congressus virorum doctrina, & scientiis prædicatorum, à quibus doctior evaderet. Ratiocinabatur in publico cum gratia, alacritate, & elegantia, quæ par fuisset magno oratori; componebat, & elucubrabat, & in lucem producebat varia opera argutiis referta, quæ volitabant per manus eruditorum hominum, cum laude ingenii non vulgaris: quamvis aliquos ex his foetibus postea purgationi à se oculo expensos, opificii deformis censuerit ob vanitatem, qua erant palliati, & pigmentati; detestatusque sit potius ut monstra, & abortus, quam ut cognosceret ut partus sui ingenii. Et quando postea jam religiosus in variis civitatibus, nominatim Taurini, inter aliquos nobiliores aulicos acuti ingenii, & doctrinæ amantes, de iis mentio fiebat laudabilis, cum deprædicatione Auctoris: si esset præsens non respondebat verbum, sed demittebat oculos in terram cum humilitate decorata,

cora, non tantum congrua ei quire-
cusat honorem, sed ei quoque, qui
se cognoscit vituperabilem; & ideo
libri qui ab eo fuerunt posterius con-
scripti & editi, erant argumenti
Christiani. Si alii antea habuerint ali-
quid levitatis, non profitebatur tum
singularem virtutem; sed felicitatem
intellectus prodebat etiam in
profanis, quæ tandem voluit omnia
in Deum referri; adhibita lima, &
sublatis iis quæ nimis mundum prin-
cipio sapiebant. Porro ut maiorem
& meliorem vitam daret ingenii sui
monumentis, & lucubrationibus apud
alios, quæ ea evoluerent, & patriæ
sue singulari beneficio prodes-
set, promovendo eruditionem & le-
ctionem librorum utilium; non con-
tentus calamum impendere, adjecit
& prælum; quod ut alliceret lecto-
rem, è Belgio accersivit typos ele-
gantissimos, & pulcherrimos suo ære
characteres: & cum illis aggressus
est impressionem variorum librorum,
quos ob præstantiam præli, volupe
erat manu versare; bene meritis hac
praxi

praxi de bonis litteris, & maxime de Cicerone, quando sine offensione oculorum in characteribus magnis & augustis poterant ejus beneficio pervolui. Quamvis autem in principio permiserit omne genus librorum in sua typographia excudi, qui per manus eruditorum ambulant: postea tamen negavit hunc honorem characterum tam præstantium, libris, qui non erant nisi ex parte digni: cumque reminisceretur initio impressa aliquot exempla *Pastoris fidi*: Sacerdotio initiatus, repente tot quot restabant, curavit in cumulum colligi, & consuluit quemdam virum Religiosum, utrum præstaret omnia Vulcano dedicare; an vendere, & pretium dare pauperibus? Secutusque est exactè ejus consilium, abdicans se omni illo prælo suis sumptibus, & auspiciis comparato, quod non præferebat in fronte hunc titulum, *imprimatur in tribunali virtutis*.

Talentum ejus non tantummodo occupatum in otiosis lucubrationibus librorum; verum etiam implicatum

tum rebus bonum publicum spectantibus, obtinuit æstimationem parem meritis suis: si quidem adoptatus in senatum & Magistratum supremum suæ patriæ, ut erat integræ mentis, & in dicendo potens, promovebat opera & Negotia servitii divini, & utilitatis publicæ tam industriè, & cum tanto applausu universorum, ut cum haberet Respublicares summi ponderis tractandas in aula Hispanica, electus fuerit præ multis aliis dignissimis illo munere, & missus eo legatus ordinarius, cum numeraret tantum triginta septem aut octo annos ætatis; quæ nondum erat par senatoriæ dignitati. Neque fefellit spem de se conceptam, quinimo auxit: etenim proposuit rationes suæ patriæ coram rege Catholico cum tanta energia & efficacia, ut impetraverit, & miserit decretum favorabile, una cum litteris suis, tam nervosè & bene dictatis, in certitudinem successus, ut recitatae in senatu fuerint cum extraordinario applausu, & admiratione singulari.

Prospe-

Prosperi hi eventus magna ex parte fuerunt accepti pro effectibus suæ eloquentiæ, posteaquam (ut dixit persona familiæ ejus intima) urserat suis argumentis, ita Regem & Comitē ducem, ut non haberent quod responderent: & ipse quam mox asseruit cuidam confidenti, quod arteriam regis tentasset & invenisset ad permovendum ejus affectum; scientiaque hac usus est tam dextrè, ut affectus animi commoti in vultu regis animadvertere liceret, ex potentia dicendi in isto flexanimo oratore. Atque ita deinde Rex qui erat perspicax, & non male judicabat de peritia hominum, non dissimulavit sensum de illo suum proferre, nedum invidere honorem laudum illi debitum: enimvero dixit familiaribus suis, quod orator Genuensis esset in paucis litteratus. Nec laudes hæ regiæ steriles fuerunt; sed comitatæ stimulis efficacibus quibus ministri ejus impellebantur, ut accelerarent expeditionem in negotiis illius Reipublicæ; quando lentius, & pede, ut dici-

dicitur plumbeo, in ea se gerebant; adeoque subinde de Legato querebantur, quod plus posset apud suam majestatem, quam commodis suis adlubesceret. Non poterant tamen manere non stupore defixi & attoniti, de ingenio, sapientia, & dexteritate ejus in agendo; quod in illa aula illi peperit summam æstimationem, & reverentiam.

Finis illius legationis, fuit initium proximum ad propositum, quod concepit, valedicendi sæculo. Etenim revertens per mare cum uxore, & duobus filiis in triremi, tanta velocitate eam insecuta est pyratica barbarorum, ut fuerit in præsentissimo periculo ne in potestatem prædonum veniret. Tum enim vero quasi in theatrum producta spectandam se præbuit animositas & pietas sui timoris; quia quantumvis æqualis esset periculi magnitudini, nullum tamen signum edidit perturbationis aut dejecti animi; ne tantillum quidem, quod reverso domum, quidquam vultus amisisse ex maris intemperie, aut malacia videri potuerit.

Illico in tali articulo animos sibi fecit, sociorum in itinere erexit, induxit ut sarcinas suas eiicerent in mare, atque ita leviolem facerent navim brachiis remigantium. His mille scuta addixit in præmium, ut nervos intenderent, & libertatem mancipiis ad remum damnatis; inde ad opem divini auxilii implorandam se convertens, oculos in cælum sustulit, se commendavit, & nescio quæ vota ad Virginem Deiparam nuncupavit; cohortatus est Christianos, qui erant in navi, ut promitterent se per confessionem conscientiæ noxas expiaturus, & in præsentis rosarium recitarent. Quid multa? favit benignus Deus, qui facilis exauditor est recurrentibus ad se in tribulatione, generosæ ejus pietati. Postquam coronæ virgineæ recitationem auspicati sunt; afflavit propitius ventus, qui eos cito volatu devehens, spem pyratarum elusit. Delatus itaque ad terram securitatis exactè implevit, quæ sponderat hominibus; & Matri Domini, adorans cum omni veneratione ejus imaginem miraculosam, quæ colitur

litur Savonæ. Multo tamen favorabilior afflatus fuit, quem Spiritus sanctus illius cordi immisit; illi, in conspectu discriminis quod impendebat, repræsentando vanitatem rerum fluxarum, & incertitudinem illius fastigii, cujus jaçturam prope erat ut faceret. Et de his omnibus se expedivit animo forti tam efficaciter, ut nunquam deinceps invenerit quietem, donec etiam corpore ab iis esset solutus. Fuerat quidem vita ejus in sæculo Christianè acta, & ad normam virtutis perpetuo instituta, ut posset esse contentus, & acquiescere lumini, quo in rebus divinis afficiebatur: quia continua occupatio studiorum non permiserat eum juventutem perdere in otio. Desiderium acquirendi honoris quod vitio affine est, virtuti eum applicaverat cum laboribus & exercitiis probitatis. Mens recta, qua erat præditus, fecerat eum justus & æqui in Magistratu acerrimum defensorem. Incumbebat tanta sollicitudine in bonam institutionem suorum liberorum, ut cum illi innotuisset filium natu majorem semel comoediæ

interfuisse, confestim decreverit otiosis occasionibus subducere eum; & de facto protinus patria illum eduxit, & misit ad aliquas Italiæ partes lustrandas; ac demum Perusii reliquit commendatum, personæ virtutis amanti, ut invigilaret sedulo, ne juventutis perniciem, malum consortium, & societatem perditorum adolescentum frequentaret: sed à peccatorum periculis procul haberet, semper utiliter & honestè occupatum. Nec solum filiorum, sed & familiæ universæ zelus ejus satagebat, ut viveret piè & Christianè. Hinc procuravit, ut singulis hebdomadis domi suæ explicaretur doctrina Catechetica, & super mensa communi inter edendum legerentur libri pii, quo non minus spiritualibus quam corporalibus cibis accumbentes pascerentur. Quinimo in totam civitatem extendebat pia ejus vigilantia, & provida cura, ut media omnibus suggereret ad bene vivendum. Hæc injecit illi cogitationes juvandi & promovendi missiones per vicos & compita urbis. Consilium quod avidè complexus

plexus Eminentissimus Archiepiscopus Durazzo, operâ illud Ecclesiasticorum, quâ sæcularium, quâ Regularium exequutus est: qui successivè varias regiones urbis magis frequentatas obeuntes, docebant rudem populum prima fidei & virtutum elementa, & frequentibus concionibus ad frugem inflammabant. Quod magis cordi habuit P. Antonius Iulius postquam caractere presbyterii fuit insignitus, ut inferius dicetur. Arma, rixas, contentiones, indignationes, semper quam longissime ablegavit ab animo suo, à familia, & domo quæ videbatur Asylum Pacis. Non audiebantur in illa unquam strepere offensiones, & turbulentæ vociferationes iræ impotentis; statim si quid dissensionis, aut displicentiæ ortum esset, aut ut solet, minima scintilla cholæræ inter domesticos se proderet; subito accurrebat, & verbis gratiosis ac benignis prudenter eam sopiebat. Non defuit illi tamen quandoque occasio, in qua opus illi fuit uti Christiana discretione in dissimulando, & fortitudine in tolerandis

irritamentis offensionis , quæ potuissent animum erigere ad motus incalescentes impatientiæ , & cogitationes perturbantes; quorum tamen semper perstitit absolutus dominus; & ita sub fræno continuit , ut hæc iracundiæ subjugatio prorsus fuerit omnibus numeris absoluta; quod autem in quibuscumque occasionebus dominium illud passionis tam facile excandescentis integrum servaverit , habitum fuit pro generositate pectoris insigniter Christiani. Multò minus occupabat se unquam ludis illaudatis , chartarum pictarum , alearum; & hujuscemodi frugiperdarum oblectamentis. Apage , inquit , hanc perniciem male feriatorum , per quam jacturam faciunt non temporis modo , sed & fortunarum suarum , æque ac animarum : Itaque nunquam vidisses ea hominum otiosorum probra in ejus manibus; sed libri & calami serviebant illi aut ad exercitationem ingenii , aut in beneficium Reipublicæ , & subsidium magistratuum; & potissimum in curationem hospitalium , & aliarum foundationum piarum ,
qua-

quarum tutelam libenter in se sumebar; aut ad acquisitionem omnium virtutum quæ condecorare solent, & perpolire vitam Nobilis Christiani. Verum tamen hoc novum lumen cælitus à Deo, ad eum modum & tam vivaciter immissum imperfectum suum ei patefecit, & securiorem sanctitatem in forma tam venusta oculis obiecit, ut eum totum in amorem sui rapuerit, itaque inescavit; ut non suspiraret nisi libertatem, & solutionem à vinculis, quæ eum cogeant habere partem cum mundo, & prohibebant quominus evolveret ad locum, in quo posset totus esse cum Deo.

C A P V T II.

De eximiis Eleemosynis P. Antonii Iulii.

ANtequam videamus cum pertigisse ad possessionem desideratæ libertatis, cernamus quatenus pretio auricam emerit, quæ licet omni auri & argenti copia non benè venditur,

tamen eorum metallorum largitionibus comparatur. Et ipse quidem eam comparavit promerendo singulares, & extraordinarias Dei gratias suis singularibus & multum extraordinariis elemosynis; quarum ut videantur aliqui actus heroici; nescio an debeam ordiri ab una donatione; quam adhuc juvenis, permittente Patre suo, fecit Reipublicæ centum millium librarum, ad instruendam & armandam triremem: etenim posset nonnullis videri magis esse liberalitatem civilem, quam pietatem Christianam; & genium ac propensionem naturæ, quam violentiam & robur voluntatis. Verum tamen sit ita. Serviat tantum pro uno ex illis præsagiis virtutis, quæ nonnunquam coruscarunt in prima ætate sanctorum. Id si vel sic sumatur, negari non poterit quin fuerit insigne omen secuturæ præclaræ virtutis. Et vero per mortem Patris dominium absolutum adeptus bonorum, quæ hæres adiit; coepit quantocyus se strenuè iis exspoliare, Deum faciens Dominum in suis pauperibus; tam largiter, ut homines cari

ti & prudentes, intelligentes quam profusus esset in Eleemosynis distribuendis, eum compellarent *Præfectum ararii divini*. Conceptus melius veritati consonans, quam fuerit nonnullorum aliorum, qui stupefacti de tam largis eleemosynis, quas sciebant à manu ejus scaturire; cum non possent sibi persuadere, esse omnia munificentiam incoactam ut reapse erat; opinabantur quod per eas grandibus obligationibus iustitiæ olim contractis faceret satis, quarum onus majores sui per hæreditatem ei reliquerant: Harum tamen ne vestigium quidem ullum, vel minimum extabat: nam facultates illi relictæ non solum liberæ erant omni obligatione conscientiae; verum etiam à vinculis, & legibus dotalibus, & fidei commissis solutæ. Pergebat ergo se exhaurire prodiga largitionum consuetudine, in tantum, ut qui proventus ejus administrabat, animadvertens non facere dominum suum finem dandi, putarit revelandum Confessario ejus, qui per id tempus erat P. Constantius Bovoni; à quo admo-

nitus fuit ne daret amplius, quam re-
ditus inferrent, quo familiæ ejus a
damnis & debitis caveretur. Respon-
dit: Pater mi, apud animum meum
perputavi quod cum sis Pater meus spi-
ritualis, deberes me impellere ad sa-
tisfaciendum pro meis peccatis, per
bonas & amplas eleemosynas, potius,
quam me ab iis faciendis deterrere;
sed facile assequor te hanc facere ad-
monitionem, ex alterius suggestionem.
Quamobrem R.V. boni consulat, si ego
pergam dare Deo, quo Deus vicissim
mihi det, relictæ deinceps ei cura meæ
domus. Et profecto videbatur pactum
iniisse cum Deo quandoquidem in isto
homine justo, verificabatur illud Psal-
mi: *Tota die miseretur & commodat, &
semen ejus in benedictione erit.* Reliquit
enim domum suam locupletatam à
Deo innumeris divitiis & liberos suos
non hæredes dumtaxat suæ munificen-
tiæ, sed etiam amplis facultatibus pa-
ternis dotatos. Itaque non minus fecit,
quam dixit, secutusque est id quod
conducebat ad extendendas & foecun-
dandas manus Dei erga se liberales.

Facile

Facile erat cognoscere in Ecclesiis, si ipse esset præsens in concione, ex sacculis aut scutellis Eleemosynariorum: in quos solebat effundere omnes nummos aureos, quos secum portabat; qui erant semper bene multi: Et hic erat mos ejus communis in omnibus concionibus jejunii quadragesimalis. Præterea solebat dare multas schedas variarum summarum, & assignationum pecuniæ, etiam millium scutorum, quæ reciperent ex mensa collybistica S. Georgii, & aliis Bankis, ut vocant, ut per personas sibi probè cognitæ & fidas distribuerentur pauperibus & Religiosis. Juvenem nobilem sibi utcumque sanguine junctum, sed pauperem, multis annis aluit in studiis, & suis sumptibus ad doctoratus lauream evexit, atque in suis ærumnis sublevavit; donec cœpit honoratis officiis perfungi. Semper quoque pecuniis solatus est ipsum, Matrem ejus, & fratres nonobstante peste quæ tunc grassabatur. Mendicis quibus casu fortuito occurrebat subinde, dabat nummum argenteum & aureum:

reum: de quo illi attoniti & quasi de inusitato favore stupefacti, quando timebant ex quibusdam indiciiis, ne moneta haberetur adulterata, nec idonea ad expendendam; dicebat: nolite timere filii de sinceritate, est bona, & sincera, & si non possitis expendere, recurrite ad me & commutabo cum alia vobis probata. Tum enim vero brevenistum stuporem pauperum occupabat multa lætitia, quæ provocabat, & ipsos, & alios, ut confidentius redirent, etiam cum fictionibus & artificiiis ac imposturis ad persuadendum se esse indigos auxilii; quibus semper stipem largiter subministrabat, nec examinabat utrum subesset necessitas, quam allegabant nec ne? ne deprehenderet commentum callidæ paupertatis. Et quoniam aliquando edoctus fuit, hac sua facilitate, aditum aperiri ad astutias, & fraudes, respondebat: multum mihi dolet, quod cognitus sim tam parcus erga pauperes, ut cogantur studere inveniendis praxibus coloratis, ad eliciendum opis aliquid è manibus meis. Non solum charitas

quæ omnia credit eum inducebat, ut dissimularet technas eorum, verum etiam illa ipsa, quæ omnia sustinet, docebat patienter tolerare importunitatem, solum ostendens sensum aliquem, cum perquam admirabili, & leni correptione. Præfixerat sibi regulam quam inter proposita notaverat à se practicanda: semper cum mansuetudine respondere pauperibus, quantumvis importunis & molestis, absque omni signo impatientiæ: & si quisquam me verbis pungat, dare illi eleemosynam.

Sed istud poterat videri utique instar roscidæ stillæ, aut guttæ crassioris, quæ à beneficentia ejus profluebant; non autem perinde se habere ac larga pluvia continua & abundans. Hanc desideras? dum legati munere functus est in aula Hispanica, super alias eleemosynas quotidianas stabilem assignabat integro hospitali Italorum, præterquam quod integris familiis provideret tam de cibatu, quam vestitu. Videbatur odoratu subolfacere necessitates publicas, & privatas, ut tempori succurreret. Aliquando
con-

contigit Dominos Magistratus delibere de restringendo vel numero infirmorum, vel specie servitii, permotos defectu proventuum, quos deprehendebant solito minus inferre. Interea dum hæc consilia agitentur, evocatus est foras Syndicus nosocomii, qui hoc narravit, & dati sunt illi absque alio dicto in sacculo quingentæ pistolæ aureæ, cum quibus lætus rediit ad concilium, & dixit: non placet Deo, ut contrahatur auxilium suorum pauperum; curæ fuerunt suæ paternæ providentiæ: ecce pignus: & hoc dicto excussit saccum super mensa, & pistolarum cumulus prodiit: quod visum est illis dominis divinæ manus prodigiosum beneficium, & excitavit eos ad æmulandum facinus egregium quod videbant. Post aliquam moram temporis cognovit Syndicus instrumentum divinæ munificentiae fuisse in liberali manu istius *præfecti ararii divini*; quamvis strictè prohibuisset ipse, ne ullus patefaceret, & evulgaret. Erat fortasse valde deditus ad succurrendum isti loco pio charitatis, ex alia

occa-

occasione ; ob quam condemnabat suam liberalitatem ; ad operandum quasi ex iustitia. Curaverat recitari quædam sua opera in scena, quæ non solum propter elegantiam talis actionis appositè exhibitæ, sed etiam ob æstimationem ingeniosi auctoris, allexe-
rat ad audiendum ingentem concursum Nobilitatis. Scivit postea quod illo die fuissent indulgentiæ propositæ in Nosocomio ; ubi moris erat pietatis gratia , potissimum nobiles , largis eleemosynis se comparare ad eas lucrandas ; sed quod per illam diversionem tam numerosæ nobilitatis attractæ ad spectandam comædiam, admodum pauci ad illud opus devotionis concurrissent ; noluit permittere , ut suæ recreationes dolori, & fraudi essent pauperibus : ac proinde misit hospitali tot scuta aurea , quot videbantur fuisse Dramatis spectatores ; & gratio-
sè addidit quod errorem calculi , si fortasse quis irrepsisset, dein abundantia suppleret. Alia occasione cum per caritatem annonæ multi pauperes penuriam paterentur , maximè ad flu-
vium

vium Genuensium, ivit ipse quodam die quæsitum unum è societate Patrem magnæ autoritatis, bonitatis, & fidei; dixitque illi se habere nescio quid secreti communicandum. Secedunt seorsim in cubiculum, ibi producit crumenam quam portabat sub axilla, in qua erant mille pistolæ aureæ; posuitque in mensa dicens Patri: Pauperes fluvii satis diram patiuntur famem & inedia, R. V. procuret ut illis succurratur. Ita factum est, & curatum ut perfidos illius terræ accolæ, egentibus biscoctus panis, fabæ, sal, similiaque obsonia distribuerentur, in magnum & dulce levamen famelicæ plebis, potissimum accedente aliorum divitum imitatione, qui hoc exemplo pietatis ad paria præstanda permovebantur. Licet autem adjurasset Patrem, ne ulli revelaret (quod fecerat) cautela tamen ista non sufficiebat, quin fulgor ille auri fuerit major, quam ut lateret; cum nummi illi essent affabrè cusi, ut viderentur data opera ad hoc recenter figurati, quo essent dignum tributum illi domino dominantium, qui pietatem

tem Christianam æstimat minimis suis
impensam : non absimili modo quo
bonus quidam olim Catholicus in An-
glia, æstimabat poenam & supplicium
suæ religionis, debere solvi moneta
aurea optima, pulcherrima & perfe-
ctissima. Atqui quemadmodum in a-
varis crescit amor nummi quantum ipsa
pecunia crescit, & eam in potestate
habere, desiderium acuit plus haben-
di; ita in isto præclaro Eleemosynario
evenit, ut dando sentiret sibi sitim
provocari ad plus largiendum. Capsu-
las pecuniarias, quales solent de vehi
ex Hispania, singulas gravidas viginti
millibus regalium argenteorum, prout
advenerant, exonerabat subinde de
mane in Vesperam totas in sinum pau-
perum & calamitosorum. Semel au-
tem cum advectæ essent ex Hispania
aliquantæ tales arculæ regalibus ple-
næ; Domina Mater illius iussit eas de-
ferri in quoddam cubiculum destina-
tum ejusmodi rebus magni pretii cu-
stodiendis; nec se offerebat occasio eas
collocandi ad censum, quo fructum fa-
cerent. Rogavit ergo Dominum Ioan-

C

nem

nem Carolum Brignole, ut diligentiam adhiberet ne longo tempore pecunia illa maneret sine emolumento otiosa. Non neglexit rem commendatam exequi Amicus, & intra dies non multos misit qui arculas illas apporarent, inventa commoditate de iis disponendi: sed diligentior fuerat charitas. Vadit Domina ut curet deferri: nec offendit vel unam. Quid illis factum? Intelligit quod Dominus Antonius Iulius præceperit omnia distribui inter duo hospitalia, pro officiis pauperum. Quid ad hæc Mater? Ut matrona perquam pia, vehementer lætata est, & gratias egit Amico, curavitque ei dici quod pecunia illa optimè esset collocata ad mensam, ubi perdi non poterat. In multis hujusmodi eventibus bona ejus mater non solum edocta erat acquiescere, sed etiam animata ad gaudendum, quando bonus ejus filius, ut solitus erat dicere, ex luto faciebat aurum: Atque adeo potuit illi plus placere eleemosyna multò nobilior ab ipso facta paulo antequam se redderet Religiosum. Non restabat aliud

aliud quod daret , ex iis quæ à Deo acceperat , præter capitalia fideicommissi , & dotalium bonorum , quam summa quadraginta millium scutorum , quæ servaverat dispositioni suæ liberæ , & data erant ad censum supra Montem Salis Florentiæ , eratque optimus redditus. Id cum sciret , determinatus dare deo pretiosissima , & dignissima dona , quæ per se fieri possent ; ivit quodam die ad publicum Tabellionem , & iubens fieri instrumentum authenticum , dixit : Ego ad talem finem facio modo donationem irrevocabilem pauperibus talium bonorum &c. reservans mihi tantummodo jus applicandi fructus , iis pauperibus , quibus visum fuerit , donec vivere dabitur . Atque ita exultans quod non haberet deinceps quidquam pretiosi in suo arbitrio , de quo posset disponere , nisi seipsum ; subito cogitavit se totum transcribere Deo , prout paulo post fecit. In hanc rem tamquam indubitata & certam , conspirant diversi optimè informati de rebus P. Antonii Iulii , quod ille non ita pridem , quam So-

cietatem ingrederetur, elargitus fuerit necessitati pauperum uno die, & in una donatione semel & simul, quadraginta millia laminarum argenti. Opus misericordiæ, & sanctitatis tam egregium, ut quemadmodum bene observavit sapiens quidam religiosus, in uno consistorio in quo coram Paulo V. super relatione de gestis S. Caroli Borromæi, agebatur de eo in album Sanctorum referendo; Cardinalis Farnesius pronuntiaverit: Quod majus volumus argumentum charitatis, & sanctimonix Cardinalis Borromæi, quam quod dederit pauperibus uno die quadraginta millia scutorum, ex venditione unius principatus? Et quidem fuit actio ejusmodi, ut pluribus dederit initium, etiam durioribus in credendo, æstimandæ sanctitatis S. Caroli adhuc viventis: Atqui post illum non est auditum simile exemplum in altero potissimum privato, *sed non est abbreviata manus Domini*: in isto, enim ejus servo tantopere se ampliavit, ut excitet non vulgarem admirationem, quod in libris, in quibus notatur ratio

acceptorum & expensorum; deprehendatur copia eleemosynarum de anno in annum erogatarum tanta, ut solum decem ultimis annis quibus vixerat in sæculo, ascenderit summa supra octoginta duo millia, & sexcenta scuta Romana; & si singulis annis calculi subducantur eorum, quæ elargitus est, nunquam pauciora invenies quam tria, quatuor, & octo scutorum millia. Parcissime dedit quando duo millia dedit, sed cumulatè compensavit illam parsimoniam ultimo anno sæcularis vitæ, qui fuit 1651. in quo solo dedit Deo amplius quam quadraginta duo millia, sexcenta & quinquaginta scuta Romana. Et hæ omnes largitiones transferunt per manus sui Receptoris, & relatæ in libros rationum ejus; & ipse met postliminio ingenue fassus est, plures alias à se factas nullo conscio, & solum relatas in rationale Dei. Quin erat ita deliberatus ad dandum Deo, ut cœperit cogitationes animo versare non solum de pecuniis erogandis, sed etiam de rebus, & utensilibus domus suæ pretiosioribus distrahendis. Quia ergo ha-

bebat multa vasa argenti elaborati, quæ rarum usum habebant: statuit illa liquanda curare, & capitale inde conficere, cujus fructus converteret in solatium pauperum. Prius tamen consuluit quemdam Religiosum oppidò prudentem & spiritualem, cum proposito ei obsecundandi, si quod parturiebat in mente, collaudasset. Ab eo tempore cœpit præscindere multas species rerum, quæ non videbantur adeo necessariae, vel familiæ, vel sibi. Et contigit in hac parsimonia qua utebatur erga se in minutiis subtrahendis, quod redactus fuerit ad defectum habendi unde tribueret necessitatem patientibus, ea propter non solum ex amore humilitatis, sed etiam quia indefinenter impendebat pecunias suas in opera Charitatis, cœpit se vestire non tantum modestè, sed etiam pauperum more; & quando fuit Sacerdos indumentis se texit si non mendici, saltem quæ vilia & abjecta dixisses. Habitum gestabat & pallium extremè detritum, & deforme. Usquè ad minutias devenit quas fortasse ridet stulta mundi sapien-

piencia, sed magni æstimantur, & prædicantur ab iis qui sunt sapientes Christi, & callent sapientiam sanctorum in eleemosynarum exercitio summè perfectorum. Sicut refertur de S. Thoma de Villa-nova, qui cum esset Archiepiscopus Valentinus, ad resarciendum thoracem, quærebat sartorem qui minimum laboris sui præmium exigebat; quin imo ipsemet reficiebat detrita & lacera, ut plus superesset, quod posset in dotem offerre filiabus, quas in matrimonium collocabat. Imitatorem in isto habuit P. Antonium Iulium, qui eo se demisit, ut raro admodum barbam sibi tonderi, vel radi curaret, ut pretium operæ in Eleemosynas converteret. Ac præterea non jubebat barbi tonsorem venire in suam domum; sed quando illi integrum erat, adibat ejus officinam, ut opera minoris sibi constaret. Unde liquet quam altè sibi in animo impressum haberet illud studium, etiam cum suo incommodo, consulendi necessitatibus calamitosorum. Quod quandoque in verbis suis palam faciebat, quia si quis aliquando

se mirari ostendebat, quod tam prodigius esset in eleemosynis distribuendis, respondebat: *Ego per viam orationis non possum intrare cælum, quia non queo, vel non novi orare: Itaque consilium mihi est experiri, an possim eo pervenire, conciliando mihi gratiam pauperum, ut recipiant me in æterna tabernacula.*

Et vero tantum effecit ut obtinuerit id quo collimabat: etenim fuit opinio diverforum Regularium sapientiæ laude præstantium: mercedem illarum eleemosynarum, fuisse tam notabilem vocationem ad vitam religiosam; quam quando exequutioni mandaverat, fuerunt qui illi scripserunt congratulantes verbis ipsissimis Angeli ad Cornelium Centurionem. *Eleemosynæ tuæ ascenderunt in memoriam in conspectu Dei.* Et ipse quasi recognoscens tantum bonum, quod per illam virtutem assequutus fuerat, ne videretur illi ingratus; non neglexit eam exercere pietatem, quæ creverat secum ab infantia, quantum ei per moderatores suos permittebatur. Siquidem in libris rationum, quæ concernebant ejus media; inventæ

tæ

tæ sunt largæ eleemosynæ, ejus nomine & rogatu factæ à Domina ejus matre de anno in annum, non tantum usque ad annum 1652. quo locietatem ingressus est, verum etiam 1659. duobus antequam moreretur annis, ut ad incredibiles summas excreverint, quemadmodum superius commemoratum est, duorum, trium, quatuor, & subinde quinque millium scutorum per annum. Et in suo testamento anno post ejus mortem, reperta sunt præter alias summas minoris calculi, in legatis divisim in tres partes sectis, septemdecim millia sexcenta & quadraginta scuta Romana, quarum quartam partem assignavit loco pio, qui exstruitur extra veteres muros Genuæ, ad excipiendos hospitio omnes pauperes vagabundos. Alterum tantum voluit impendi, ut de fructibus ejus prospiceretur Ecclesiis pauperibus diocesis Genuensis, de ornatu missæ & altarium, & aliorum quibus egebant, ut in cultu divino decorum fervaretur. Aliarum duarum quartarum partium pariter ad censum locatarum fructus annuos as-

signavit duobus Corsicæ Collegiis Societatis Aiaccienfi, & Bastienfi; ut cum auctoritate Provincialis converterentur in beneficium spirituale & corporale incolarum illius regni; per missiones, & alia auxilia ad illud ordinata, pro arbitrio suorum Executorum; qui omnes erant homines præclaræ pietatis & prudentiæ; quibus ideo reliquit potestatem mutandi secundum occurrentia impedimenta; ita tamen ut manerent in perpetuum affixa operibus piis, nec ulli liceret divertere aliò effectus suæ Charitatis, sive per mortem, sive per lapsum temporis. Circa quod testamentum fortasse non erit abs re dare satisfactionem justæ curiositati, quæ alicui posset facile incidere, uti incidit cuidam Patri perquam illi familiari, qui confidenter ab eo quæsit: quare in alios tam profusus fuisset, & Societati nihil suarum rerum reliquisset? Cui respondit in hunc modum: *Sum turpiter deceptus: quia cum ne verbum quidem mihi insinuatum esset ab hominibus Societatis, qui meam vocationem direxerunt, & quorum consilio*

usus

*usus sum in abdicatione honorum: credidi
eos nullare opus habere: attamen si comper-
tum habuissem id quod modo vidi, & expe-
rior., de paupertate, & indigentia prope
omnium collegiorum Provincia; multo li-
bentius applicassem mea Societati, quam
ulli alteri operi pio: quia existimo ad ma-
jus Dei hoc futurum fuisse obsequium, &
ideo subjunxit: modicum id quod re-
tinuisset disponendum, quandoqui-
dem de pluribus non posset, desiderare
se relinquere Societati; sicut & fecit,
fueruntque duo millia scutorum. Ita
relatum est ab illo Patre, qui eum per-
cunctatus est, homine magnæ virtu-
tis, pietatis, & auctoritatis, adhibito
ad primaria regiminis officia in religio-
ne. Ille vero quod Religiosus non po-
terat facere de suo, vel nomine suo,
quia habebat filios ætate, & dignitati-
bus pares, ut se honorificè sustenta-
rent; procurabat sudoribus suis quod
daret, nunc mendicando, nunc con-
sulendo & exhortando alios, ut in elee-
mosynis elargiendis essent liberales,
& profusi; nominatim autem in con-
cionibus, in quibus tam ardentem, &
cum*

cum tanta energia commendabat Eleemosynas, ut ex omnibus civitatibus ubi ad populum dixit, testimonia allata sint longe superasse earum collectam, consuetudinem antecedentem, & subsequenter aliorum temporum. Et in prima quadragesima quam dixit Genuæ, non aliter quam quemadmodum oculi semper sunt vitiosi, qui in sole maculas & obscuritatem vident, aut videre se putant; fuit à quibusdam ei vitio datum, quod nimium in eò calidè & ardenter ageret, perinde ac si studeret suadæ lenonicio aliis concionatoribus palmam præripere: quod cum ei fuisset relatum, uno mane quo prædicabat ad numerosissimum confluxum populi, finita prima concionis parte, vertit se ad Crucifixum, & quemadmodum scripsit, qui fuit præfens, cum insolita teneritudine cordis, cum hac apostrophe alloquutus est: Dilectissime I E S U, ita conqueruntur de me nonnulli, quia utor terminis nimis importunis in petenda stipe pro tuis pauperibus? attribuentes hoc meo commodo, tamquam si ea arte quæram

nomen mihi & famam conciliare inter
verbi tui Præcones ? *Indica me Deus,*
qui potes scire , meam intentionem ,
& satisfactionem non esse aliam , quam
succurrere Indigentibus , pro quibus
me etiam modo statim vendere para-
tus essem , si gratiosè & cum honesta
calliditate in eam mancipii sortem me
coniicere liceret ; sed hoc me non ter-
ret. Protestor quod semper tanto fer-
ventius in eorum favorem loquuturus
sum , quanto impotentior me cer-
no ad eos meis facultatibus sublevan-
dos quibus pro te , me voluntariè exui.
Ita ille in spiritu fervoris. Et revera vi-
ta ejus tota quam in sæculo traduxit,
non fuit aliud quam perpetua exspo-
liatio & abdicatio fortunarum suarum,
ad acquirendam margaritam Evange-
licam , pro qua denique *dedit omnia*
sua , & comparavit eam.

CAPVT III.

*Virtutes magis præstantes P. Antonii
Iulii assumpto statu Ecclesiastici
secularis.*

NON duxit illum divina providentia ab uno extremo ad aliud, sed per modos vivendi inferiores, voluit transire quasi per media, ut in omnibus virtutum singularium relinqueret exempla. Atque ita continuo ut fuit reversus ex Hispania, cum periculo commemorato, probando finem infelicem humanæ magnitudinis, & celsitatis, dum itaque mente versaret, & cogitando ruminaret, quomodo fortunatus evaderet, & se expediret? Ecce Deus qui deducit justum per vias rectas, viam anno 1648. illi aperuit, non tamen sine sensibili ictu qui eum non mediocri dolore affecit, ex obitu Dominæ Paulæ Adorno filiæ D. Ioannis Baptistæ Adorno, thalami sui confortis, & dignissimæ æstimatione, quam de illa habebat. Utpote cum esset

set Matrona eximia, non tantum propter claritudinem sanguinis, sed multo magis ob virtutes animi singulares, alacritatem intellectus, urbanitatem morum, humana, sapiens, solitaria, modestissima, & quæ in omni sua actione erat in se reflexa, perinde ac singulariter devota, & sensata, ac prudens. Quamobrem separatio ejus accidit P. Antonio Iulio tanto acerbior; nec aliunde habebat unde dolorem leniret, quam à devotione; quam ut in subsidium vocaret, recepit se in Novitiatum Societatis nostræ extra Genuam; & quantumvis magna importunitate rogatus, ut in civitatem rediret; inexorabilis ibi aliquot diebus se cubiculo inclusit, & voluit obire spiritualia exercitia sancti Patris nostri, cum omni diligentia & pietate. Quotidie missæ sacrificio ministrabat, & plures horas orationi impendebat, in qua non solum fuit repletus illa devotionis dulcedine, quæ amaritudinem tollit casuum humanorum, sed etiam luce clara, & forti cælitus immissa, continuo magis ac magis rerum caducarum frau-

fraudentiam patefaciebat; atque ita novam viam monstrabat ad cœlum, & ut illam serid, & citò sine mora ingrederetur suadebat. Cum cognovisset ergo quid, cum Dei auspiciis decrevisset, Dominae Matri declaravit se velle statum mutare. Sed bona Domina, inquam per mortem nurus tota domus administratio devoluta erat, ad hæc inopinata nuntia tantopere consternata fuit, ut bonus filius ne nimium dolentem affligeret, conducibile putaverit executionem aliquantulum differre; nixus illa spe, quod temporis vel modicum intervallum, moerorem maternum mitigaret. Atque ita in Senatorium ordinem adscitus, secundum morem istius Reipublicæ, ubi Senatores circumscribuntur certo numero, ipse quamvis non sine magna lucta, cedens consilio amicorum, & imprimis Patris, cui regimen conscientia suæ commiserat; cœpit functionem illam exercere, contentus arripere omnes occasiones variarum virtutum exercendarum & maxime opitulandi pauperibus, & oppressis admini-

ni-

nistrandi bonam justitiam, & promovendi causas, & consilia favorabilia pietati, & legibus dei. At illico nimis durum, grave, & asperum apparerebat illi jugum illud mundi; totus aspirabat ad jugum leve & suave Christi. Ingrediebatur subinde in cubiculum boni cujusdam religiosi cui confidebat, & ibat suspirando tamquam si ingemisceret sub nimio pondere, & dicebat: *O Pater, quantum me gravat ista toga senatoria! quantum me affligit? opus est ut illam commutem cum alia quæ facilius erit ad portandum.* In hunc modum affectus, denique post aliquot menses in hac lucta transactos, cum non posset diutius imperare patientiæ suæ, ut toleraret illam oppressionem animi, & ut respiraret aliquantum, egressus est Genua cum proposito morandi aliquot diebus Brisciani, siti ad flumen Sale, quod inter vapores temperatos vasti lacus Gardæ, nativum vigorem, & asperitatem aëris mitigat, & familiares sibi facit delicias auriacorum, limonum, Cedrorum, & aliarum similibus fruticibus, aliquo usque æmulan-

do amænitatem fluvii Genuensis. Verum cum subsisteret aliquot diebus Brixia, casus qui evenit eum plus obstrinxit, ut cum grati animi significatione Dei Providentiam erga se extolleret, & adoraret. Certi Religiosi proficiscebantur ob negotia, quæ festinatione indigebant, inde Bresciam. Cumque esset fracta rheda qua vehebantur; eum rogarunt, ne retardarentur, ut sibi suam pro uno dumtaxat die commodaret: quod humaniter illis annuit. Egredi oppido & provecti ad aliquot passuum millia in locum solitarium; ecce affiliunt multi ficarii armati, & circumfusi rhedæ eam sistunt, ac admirabundi se videre solis Religiosis refertam: ubi est, inquirunt, Marchio Brignole? Et intelligentes eum Brixia hæsisse; indignabundi, utpote delusi, re infecta abierunt. Compertum deinde fuisse homines perditos & grassatores qui exploratum habentes ejus adventum, & iter quod intendebat, insidiabantur ei, ut caperent, & insigne litrum extorquerent. Unde ipse revertente Rheda, cum audiret, quam
feliciter

felici eventu Deus remuneratus esset charitatem collocatam illis viris Deo dicatis; noluit in illam ditionem ulterius se intricare, in qua periculum incurreret libertatem suam carè redimendi, quam desiderabat Deo offerre: sed Genuam regressus est, secum tacitè reputans, quod si Deus illum liberaffet illo periculo corporis, esset præsagium velle eum pariter liberum à periculis animæ; & monere, ut acceleraret egressum è sæculo. Hæc cogitatio aliquanto tempore ei privatim adhæsit, nec secum multum, aut cum amicis deliberavit quid sibi faciendum? Sex menses effluxerant ex quo in Senatorium ordinem cooptatus fuerat, quando expetiit missionem, prætexendo otium necessarium, ut majori cum fructu publica negotia prosequi posset. Deposita toga senatoria, recepit per manus Domini Cardinalis Durazzo Archiepiscopi, habitum Clericalem, & ordinatus sine intervallis Sacerdos, primum sacrificium Missæ Deo obtulit, cum singulari devotione festo Nativitatis Domini, in Sacello crucifixi

Castri, Ecclesia Reverendorum Patrum Dominicanorum, ubi est: monumentum, in quo conduntur exuviae defunctorum familiae Brignolianæ. Sacri dein ordinis gratia operata est in illo effectus sanctimoniae singularis, unde se totum committens arbitrio Spiritus sancti, qui instinctibus valde validis eum impellebat ad virtutem minimè vulgarem; totum se dedit devotioni, poenitentiae, recollectioni vitae spiritualis, & exercitio tantarum & tam præstantium virtutum, ut derepente rapuerint oculos totius civitatis; præcipuè duarum quæ fuere humilitas & Zelus animarum, in quibus ad miraculum eminuit. Quod autem attinet humilitatem hæc fuit prorsus stupenda; & cum esset talis, qualis revera erat, contemptibilem se fecit mundo, despiciatui habens splendores ejus, pompas, & vanitatem honorum, imo seipsum; idque tam cordatè, & secundum intellectum, ut quibusdam, qui non erant ita illustrati à Deo, videretur excessus. Gestabat vestes tam viles, ut æstimarentur à pluribus in illo inde-

indecentes. Idque movit aliquando sacerdotem, qui illi erat victor, ut uteretur industria, qua cogeret ad mutandam vestem quamdam tritissimam; subduxit enim illam occultè, & substituit aliam, quam ille inadvertenter induit. Postea vero id comperiens, placide subrisit & dixit Sacerdoti: O quam splendidum me comparere fecisti! nunc enim vero homines me aliquem esse putabunt, omnes me modo aspicient. Et securè quidem subjunxit Sacerdos: vestem quam dedi, gestare poteris; debet utique servari, tametsi ea quam deposuisti æque bona esset in oculis tuis, utpote ex vilissimis, & tam parvi pretii, quam posset gestare pauper Religiosus. Recitabat frequenter officium divinum cum probo Societatis religioso, commorante in domo professa Genuensi, cum quo magnam consuetudinem contraxerat. Quadam die cum venisset ad ejus cubiculum, ut cum illo legeret Matutinum, Pater animadvertit eum indutum veste sat modesta ex lana subtiliori, quam saiam vulgo vocant, sed ma-

nicas ex alia materia ; quod cum dedecere putaret, vultu ad risum composito ei dixit : Domine Antoni, non displicet mihi vestra humilitas, & tui desipientia æque, ac mundi ; adeoque eas multum laudo : sed tales manicæ sunt nimis contra decorum habitus clericalis ; non volo tecum ordiri Matutinum, nisi prius abieris domum, & curaveris assui brachialia consentanea vestiti. Vade. Præstolabor dum redieris. Ita præoccupatus cum non haberet quod reponeret, recepit se ocyus domum, & reversus est cum aliis manicis, quæ vestiti reliquæ quadrarent. Cognovit illico factum Domina ejus mater, & applausit, jussitque agi gratias illi Religioso, & in signum quod bene de se & familia meritis esset, symbola gratitudinis ei submisit. Alia vice postquam sæpius exprobratum esset ejus propinquis, in quos probum videbatur redundare, coactus fuit sibi de alia veste providere, quod ea qua induebatur facta esset ad morem Hispanicum sine manicis ; similis erat thoraci, qui cum esset ex panno prorsus
vili,

vili, reddebat abjectiorem & vituperio digniorem. Proinde reprehensus à suo statim Confessario, prospexit sibi de alia veste, in qua tamen paupertatis notæ non deerant; quia talem semper amabat & ambiebat, ut superaret respectum humanum, & contemptibilem se præberet. Anno millesimo sexcentesimo quinquagesimo transiens Florentiam, ex occasione quod contendere Romam ad annum sanctum; cum deberet invisere aliquos Principes celsitudinis titulo eminentes, à quibus favores multos receperat: ivit tam viliter vestitus, ut cum videretur pugnare cum honore debito personarum dignitati quas conveniebat, ut minimum oportuerit illum mutare pileum, cum alio Presbytero, qui cum illo itinere se dederat. Atqui vel sic, vestitus ita pauperiem redolebat, ut ab iis initio non fuerit agnitus; nec postea fuisset nisi loquela eum prodidisset. Eodem tempore anni Sancti, interea quo Romæ aliquamdiu subsistebat, tum ut lucraretur Iubilæum, tum ut promoveret ad maturitatem, cogitationes quas habebat

bebat de vita Religiosa amplectenda ;
 ambulabat per urbem in habitu pror-
 sus vili, & Sotana, ut vocant, brevif-
 sima. Multum rogatus est ut sumeret
 aliam, paulo honestiorem, & decen-
 tem, solum ex timore ne causaret ali-
 quam perturbationem in sacrarii præ-
 fectis, qui ægre permetterent eum ce-
 lebrare in tali lacerna. Quanto magis
 sui incurius erat, tanto magis se stude-
 bat exponere periculo alicujus vitupe-
 rii, & contumeliæ; ut proclive fuit fie-
 ri in quadam solemnitate S. Apollina-
 ris, in templo Collegii Germanici ;
 etenim cum ita abjectè vestitus occu-
 passet locum destinatum solis Prælati-
 & Dominis quibus singularis honor de-
 bebatur; jamque se misisset in Genua,
 ut preces suas funderet; Pater unus,
 qui ex ejus vultu devoto & humili, sus-
 picabatur esse personam vilis conditio-
 nis, jam accedebat ut eum juberet fa-
 cessere ex loco illo honorato; & fecis-
 set nisi ab altero per modum indignan-
 tis, & ob admirationem turbati, quæ-
 sisset, quisnam ille plebeia specie ho-
 muncio prima loca occupasset? Hic
 qui

qui eum fortè noverat, illum instruxit esse Marchionem Brignole fama celebrem, quo percepto, exortum est in errante, qui secundum faciem Iudicaverat; non minus confusionis, quam ædificationis.

Quando postea Genuæ se continuit, sæpe sæpius pedes obibat civitatem, intentus operibus charitatis; & ne luto inficeretur, attollebat ad eum modum vestes, ut cum esset interius pessimè vestitus, videretur mendicissimus Sacerdos omnium, qui erant in vicinia; quod licet aliqui interpretarentur fieri per inadvertentiam, aut distractionem sensuum, alii qui genium ejus noverant, facile assequebantur hoc eum data opera facere ut despiciatui haberetur; quia idem faciebat adhuc postea cum esset Religiosus. Semel enim per tempus oppidò pluvium, quo plateæ erant cœno obsitæ, tollens Sotanam & pallium supra modum altius notabiliter, quam necesse erat; socio qui ostendebat se de eo mirari, dixit: quod amaret gestare vestes breves, quæ tantum pertingerent usque ad me-

dietatem cruris; cumque alter oppo-
neret honestatem requirere, ut com-
pareamus in publico, prout Religio-
sum decet, & potissimum concionato-
rem ac personam publicam qualis ipse
erat: refutavit objectionem non alio
dicto, quam quod de illo non esset sol-
licitus. Pari modo dum erat Sacerdos,
non volebat habere famulum qui ei ser-
viret: sed ut summum, quando neces-
sitas occurrebat, conductio utebatur,
vestito instar Clerici. In publicis sup-
plicationibus comparebat in toga peni-
tus fordida, & paupere, instar com-
munis Sacerdotis, & ibat inter pri-
mos minus honoratos & quasi clericos.
Res quæ non erat minus efficacis ex-
empli ad excitandam pietatem in Ec-
clesiæ Ministris qui cernebant illam ex-
traordinariam modestiam, & devotio-
nem in persona tali, quam olim Anglia
vidisset, in magno illo Cancellario
Thoma Moro, qui togatus non erubef-
cebat Sacrificantis ministrum se præ-
bere. Agebat per id tempus cum om-
nibus, tanta cum modestia & submis-
sione, ac si fuisset minimus omnium;
præ-

præsertim cum sacerdotibus cujuscumque conditionis: atque ita in epulo nuptiali Filiæ suæ non voluit interesse cum aliis consanguineis & Dominis invitatis, sed pransus est cum aliis sacerdotibus vulgaris notæ seorsum; quibus ut delicias faceret, ipsemet quærebat ex atrio convivali lagenas vini melioris: qua facilitate etiam minimis dabat ad se aditum, & fiduciam, ut in omni occasione ad se recurrerent solatium reperturi, maxime in operibus servitii divini. Nec patiebatur ut vel unus secum uteretur terminis submissæ humanitatis, quasi majori deferens, & præeminentiam agnoscens. Cui ut fidem astruam, contigit quod quodam die bonus aliquis Sacerdos adhortaretur ad frugem mancipia, ad triremem damnata, monitis valde idoneis; ingreditur navim humilis Dei servus, & ibi mansit ut eum audiret. Finita concione accedit ad illum, & prehensa ejus manu, dixit se multum lætari, videre eum occupatum in tam sancto exercitio charitatis: optare se illi laboris socium, ut in partem veniret meritorum.

rum. Sacerdos qui illud & alia plura opera pia exantillabat, respondit: messem esse copiosissimam & egere multis operariis; at dolendum quod tam raræ personæ zelo præditæ reperirentur, qui ad vineam illam excolendam, operam suam locare vellent: ac proinde non solum se eum libenter in adiutorem admittere, sed rogare & obsecrare, ut opem sibi præstaret quam posset. Hoc facto & acceptato, P. Antonius Iulius invitavit Sacerdotem illum ad ædes suas, & per plateas voluit omni modo semper eum à dexteris ponere, loco nempe honoratiori, quantumcumque ille reluctaretur; & tractavit insuper illum cum tanta significatione humilitatis & submissionis, ut in admirationem non parvam eum rapuerit, licet non cognosceret, & putaret gregarium Sacerdotem; multoque magis postquam ventum est ad domum. Si quidem tunc eum agnovit pro eo, quem fama sibi descripserat; voluit illum secum manere, multa officia humanitatis & amoris illi exhibuit, & statim cœpit ei opitulari in illo,

& aliis operibus Charitatis ad salutem animarum. Quæ fuit altera virtus, in qua excelluit eo tempore, quo fuit Sacerdos sæcularis.

Et fuit profecto publicum admirationis prodigium, spectare alterum Ambrosium à *Sella Curuli* translatum ad *Cathedram*. Hominem tantæ dignitatis, paucis mensibus post depositam togam Senatoriam, induere tunicam Clericalem, ascendere pulpitum, & verbum Dei prædicare, non ad pompam eloquentiæ; nec ad ostentationem ingenii, ut prius fecerat discurrendo eruditè in exedris doctorum virorum: sed cum magno sensu Christianæ pietatis, & ex zelo faciendi fructum in animabus, dans virtutem suis verbis non solum per sinceritatem, energiam, affectum, & ardorem quo loquebatur ex corde & secundum veritatem: sed per egregia vitæ suæ exempla, quin reprehendendo publicè seipsum cum multis lacrymis de antea actæ vitæ erratis, damnando & retractando vanitatem suæ conversationis, & operum à se editorum, condonari sibi

bi

bi postulans à Deo & hominibus; de malis exemplis quæ dicebat à se data, & maxime de scriptis à se evulgatis, quæ omni studio nitebatur suppressere, corrigere, aut ad minimum fidem & auctoritatem illis derogare. Interea cum hæc per civitatem spargerentur, ad conciones ejus fiebant concursus maximi dicentem audiendi gratiâ, vel etiam sicut contigit B. P. Francisco Borgia, tantum videndi.

Initium ejus prædicationis, originem sumpsit ex particulari quodammodo impulsu divino. Genuæ est Oratorium tertii Ordinis Sancti Francisci, situm ad finem graduum, quibus ascenditur ad templum Fratrum Minorum, in quo à Dominica Septuagesimæ usque ad quinquagesimæ, disturbandis petulantibus illius temporis, solent fieri exercitia devotionis per conciones valdè accommodas, argumentis validioribus sumptis ab exercitiis S. P. N. Ignatii. Quidam Sacerdos illi Oratorio affixus, sensit sibi inspirari stimulum ad invitandum, illum Dei servum, non ita pridem sacerdotio ini-

tia;

riatum, ut opus illud tam Deo gratum in sesumeret, & quindecim ex ordine diebus conciones haberet. Ad quam propositionem humillimus homo oculos demisit in terram, & deinde cum profundo suspirio statim in hæc verba prorupit: O quam graviter aberratis Fratres mei! An ignoratis quis ego sim? Non meministis quam male me gesserim in Ecclesiis? O Deus! & percutiens manu pectus subjunxit: videbo, certe videbo libentius per alium id fieri; sed quæso juvate me; ut componam me ad emendationem. Verumtamen cum ardentius urgeretur; humilitas quæ eum moverat ad recusandum, movit ad acceptandum. Orsus & prosequutus est ergo omnibus illis consequenter diebus, tanto fervore devotionis, & tam fortibus stimulis usus est ad excitandam detestationem peccatorum, & poenitendum de illis, ut insolito more fuerint tacti, & compuncti Auditores, qui toto illo tempore fuerunt frequentissimi, & nobilissimi: & re ipsa experiebantur illum effectum, quem P. Balthasar Alvarez deside-

fide-

fiderabat in omnibus Concionatoribus, maxime Societatis; quos dicebat debere esse tamquam in Calvario monte, unde omnes *revertebantur percutientes pectora sua*. Et prælagium illud addebant: hic erit unus è Sanctis nostri sæculi; & si in primo suo experimento tantum possit; quid facturus est, si Deus illi vitam longiorem largiatur? Neque fructus illarum concionum sistebat in vana quadam admiratione, & compunctione transitoria, quæ instar fumi evanescebat: sed sequebantur solidæ & permanentes conversiones. Sit una in exemplum. Invectus fuerat ex spiritu in brutalitatem, & damna gravissima explicuerat quæ resultant ex lethali peccato. Duo peccatores, qui callum obduxerant, & inveterati erant dierum malorum, quorum alter à septennio, alter à decennio, & pluribus annis, non erant confessi, eodem vespere quo eum audiverant, cum copiosis lacrymis voluerunt confiteri, & conscientiam suam expiarent cum magna pœnitudine, & eam continuarunt, affligentes se assumpta auste-

austeritate vitæ insolita; in qua perseverarunt donec Pater misericordiæ, & Deus totius consolationis è periculis recidivæ eos sustulit, cum non dubia spe impetratæ salutis. Tam felicibus principiis animatus perrexerat munere Ecclesiastico fungi in diversis templis, semper cum solito suo fervore & devotione; & impendere se in Oratoriis, triremibus, & alibi, operibus misericordiæ in auxilium animarum. Sed locus in quo magis assidue Zelum suum exerebat, erat in Congregatione Presbyterorum, quæ vocatur Missionariorum, sub protectione sancti Caroli Borromæi erecta & instituta, ex mandato & ope Eminentissimi Domini Cardinalis Durazzo Archiepiscopi Genuensis, ut esset coetus hominum Apostolicorum & ferventium, & dignum instrumentum sui zeli, in cultura populi & Cleri. Quis non exploret hinc, quam industria fuerit ejus charitas, prætermittens, & dissimulans curam suæ domus, perinde ac si non haberet familiam, & solum attenderet progressui & incremento bonorum operum

primum in se, ac deinde in proximo? Explicabat se mirifice singularis diligentia, qua utebatur, in affiscendis sibi bonis operariis. Nec solum procurabat inducere Ecclesiasticos, qui essent vitæ exemplaris & famam habebant virtutis, etiam invitans illos ex aliis regionibus: sed venabatur etiam presbyteros maxime dissolutos, & parum devotos; & quemadmodum ipse erat benignæ & amabilissimæ conversationis in tractando, modo sua auctoritate eos corripiebat, modo & multo magis sua affabilitate, & dulcissima influendi solertia se insinuabat, capiebat illos, & intoxicabat adeo, ut iis se aptando, & deducendo ad exercitia devotionis, quæ sub vesperam peragebantur, denique in prædam cederent, ne præda fierent: quia inescati à devotione & virtute, & reformati in habitu æque ac moribus, & ob inflammatas exhortationes erga Patrem addicti, denique maxima ejus charitate in bono firmiter stabiliti, convertebantur in idonea ad similes quæstus faciendos dei instrumenta. Atque hoc modo plures

res lucratus est, tantumque emolumentum retulit in Ecclesiasticis, ut ista Congregatio illo adlaborante, intra tres annos quibus istius corporis membrum fuit & caput, fuerit in æstimatione magnæ virtutis, & multiplicis fructus in populo. Porro cum his sacerdotibus ipse agebat tanto cum zelo erga ipsorum salutem, & simul benevolentia & humilitate, ut non minus existerent verecundi, quam animati. Præterea accurate practicabat quod in suis exercitiis spiritualibus proposuerat, & annotatum habebat: *Sinam in Congregatione sermonem meum interrumpi, & improbari meam opinionem; interrogabo autem & respondebo suaviter.* Verum cum ea dulcedine jungebat tantum fervorem in exhortando, ut qui per vices eum audivit, dicat: quod quando loquebatur, præsertim de amore Dei, videretur exsilire extra se, & supra se elevari, vocabaturque quidam Seraphinus: sed ille hoc rescians inficiabatur hoc sibi nomen competere cum exploratum sibi esset, se fuisse maximum peccatorem, & scandalosi-

sisimum nobilem civitatis. Studium tamen à se adhibendum ut fiat talis, qualem fingerent, ne culpa sua impediat fructus animarum. Licet ita demisse de se sentiret, nihilominus eum omnes aspiciebant, & laudabant, tamquam exemplar perfectissimum humilitatis Christianæ, modestiæ Ecclesiasticæ, charitatis, & Zeli animarum.

In auxilium ergo populi, per se, & operam conferentibus sociis laborabat indefinenter. In missionibus quæ instituebantur per urbem, erat semper primus, semper alacer; nunquam fatigatus in operando, in sudando, in se impendendo Oratoriis, Nosocomiis, carceribus, triremibus; in puellis periclitantibus vindicandis ab occasionebus in quibus corrumperentur; in animabus è vitiorum barathro eripiendis, easque securo loco statuendis noctu diuque intentus, in procurando præterea iis subsidia temporalia ne eorum defectu ad vomitum redirent; in concionando etiam in publicis compitis & plateis: quibus laboribus Deus benedicebat eum multifariam per
mul-

multiplices & notabiles conversiones: quemadmodum quando prædicabat in publico, lucratus est quatuor puellas & foeminas profligatæ vitæ, quæ post concionem in Ecclesia sancti Viti, se abjecerunt ad pedes ejus lacrymantibus oculis, postulantes opem spiritua-lem & corporalem, quo liberarentur ab infami illa vivendi ratione qua se prostituiebant. Quod & illico fecit, ponendo in loco securo & suppeditando ea subsidia quibus opus habebant ut in bono stabilirentur. Multas ex ejusmodi mulierculis, multas inquam ad meliorem frugem reduxit, non solum publice concionando, sed etiam prostibula, & domos earum, etiamsi in medio populi sitæ essent: ipsemet ad-eundo; spe abreptuse eas è sordibus suis extrahendi. Quod dum faceret dicebat: eo me dimitto ex solo amore Dei illius, qui me tanta charitate ex intricatis laqueis diaboli pertraxit ad statum salutis meliorem. Nec solum in meretriculis convertendis feliciter ejus desudavit industria, sed omnis generis peccatores sine numero Deo acqui-

sivit : uti jurato affirmat probus Sacerdos, qui semper lateri ejus in ejusmodi officiis adhærebat ; innumeri peccatores qui cauteriatam conscientiam habentes in flagitis suis contabuerant, ejus concionibus emolliti, delicta sua planxerunt, & culparum suarum pertæsi, verbo dei, quod quasi facula, ut ipse loquebatur, ex ejus ore prodibat, in gratiam cum Deo redierunt, jam meliori igne inflammati. Impossibile est inire computum eorum, qui cœperunt & perseverarunt sanctè vivere solo exemplo & exhortatione illius servi Dei, qui non dumtaxat insignes peccatores, quasi primi nominis feras venabatur, sed omnis conditionis prædas insectabatur robustus venator, nec occasionem ullam capturæ præterlabi sinebat, licet videretur nonnunquam parum opportuna. Die uno Anni sancti, cum esset Romæ in Oratorio Ecclesiæ novæ S. Philippi Nerei, cui multum afficiebatur, casu evenit, quod offenderit ibi unum secum colloquentem, qui ad singula tria verba per nomen Dei jurabat : summe hoc ei displicuit,

cuit, & obfirmans animum ad remedium ei suggerendum dextre fermocinari cum eo cœpit quamvis ignoto; & brevi suo modo agendi eleganti & ingenioso, quem habebat familiarem, lucratus est ejus benevolentiam. Proinde priusquam ab invicem divellerentur, inter humanitatis officia dixit: se habere quod auderet bona ejus gratia postulare, nec dubitare se quin facturum se promitteret; videlicet ut ne deinceps tam facile in juramenta prurumperet: & id ipsum, arte non prævisa captus pejorator, non gravate facturum se spondit. Hunc in modum non solum Genuæ ubi potissimum retia sua in capturam explicabat, sed quocumque ibat suum Zelum circumferebat ad spargendum ignem divinum; adeoque cum aliquando se contulisset Savonam ex devotione erga Dei Matrem, quæ ibi miraculis claret, & gratiis, quas pluribus, eò pro auxilio impetrando accurrentibus, liberaliter impertitur. Hospitio acceptus est in domo Ioannis Antonii Iustiniani oppidi Gubernatoris. Trium hebdo-

madarum spatio, quo ibi hæsit, non
 solum satisfecit privatæ suæ devotio-
 ni, sed excitavit communem: quia
 perpetuo concionabatur, & confiten-
 tibus aures dabat in variis templis,
 magno confluxu & tanto cum fructu
 totius civitatis, ut fama percrebuerit
 per totum fluminis tractum & nec Ge-
 nuæ neque alibi alius audiretur sermo
 cum magna ædificatione. Ipse vero
 qui se existimabat nullius frugis, &
 prorsus imparem, præ desiderio lu-
 crandi animas, alios quærebat, qui
 responderent suo zelo, omni studio se
 occupans inveniendis personis, & pe-
 cuniis ad hoc idoneis. Unde inter pro-
 posita sua notaverat, sibi incumbere
 exactam diligentiam & reflexionem ad-
 hibere ad excogitandum modum, quo
 subsidiis pecuniariis Congregationem
 Missionariorum juvaret, quibus adju-
 mentis crescere possent numero & fer-
 vore; exploratum habens nimium
 quantum inde emolumenti spiritualis,
 peculio Dei provenire. Similiter inco-
 lis suorum feudorum prospiciebat de
 Religiosis ferventibus, qui concioni-
 bus

bus suis, sacramentorum usu, & aliis Missionariorum functionibus animas expergefacerent ad cœlum expugnandum: nec ipse interim otia batur, sed impendebat pecunias in rosaria, numismata, & alia devotionis instrumenta conquirenda; idque abundanter, ut lenociniis illis, & munusculis spiritualibus populus alliceretur. Nec illo contentus impendebat personam suam & auctoritatem, & ipsemet circumiens adhuc sæcularis, & Dominus temporalis invitabat ardentem, colligebat, ducebat illos suos subditos ad Catechisticam lectionem, Confessionem, & concionem. In tantum germinabat granum sinapi zeli sui, quod seminabat & in corde fovebat; quod & deinde crevit in arborem prædicationis Evangelicæ, & laborum Apostolicorum in medio Ecclesiæ universalis, postquam Religioni se mancipavit.

CAPVT IV.

P. Antonius Iulius ingreditur Societatem & quanto in pretio habuerit statum Religiosum.

QUanto major colligebatur fructus ab exemplis quæ edebat omnium virtutum & sanctis laboribus P. Antonii Iuli inter sæculares æque ac Ecclesiasticos, quos uti optime compertos habebat Dominus Cardinalis Durazzo Archiepiscopus, ita de iis extreme gaudebat; sed quanto erat majus gaudium tanto tristitia major subiit Prælati pectus, quando nuntiatum est illi, eum velle fieri Religiosum: & quantumvis sua Eminentia esset additissimus Societati, sensit tamen jacturam illam tam vehementer, ut allatis litteris quibus per eum sibi licere petebat exequi mentis suæ decretum, eruperit coram latore in has voces. *Ignoscat illi Deus qui est causa cur iste Dominus se faciat Religiosum, sumpsissem illum in Reformatorem mei Cleri.* Licet postea se
ac-

accommodando ejus pietati, divinæ voluntati obsecundanti, subjunxerit. *Patientia.* Si Deus eum vocaverit ad Societatem, intercedet pro nobis & precibus, & operibus, Dei obsequio dedicatus, cui se impendit. Atqui Deus nulli condonare poterat Patris resolutionem, in qua non erat culpa; neque alius causa, quam ipse Deus. Quia ex domesticorum ejus certis testimoniis constabat, quod cum ejus genitor non habens nisi illum filium unicum in vivis, quem observabat sortitum animam bonam & proclivem ad pietatem, ex formidine, ne contempto mundo in Asylum aliquod Religionis se reciperet, noluisset eum frequentare scholas Societatis; sed dedisset illi hypodidascaleum, qui domi suæ eum instrueret. Procurasset deinde eum quanto citius illigare vinculo quam poterat arctissimo, quod solvi non poterat; dando ei uxorem anno vigesimo ætatis. Per mortem tamen ejus solutus his nexibus, cum novæ tum cogitationes eum invasissent vitæ religiosæ capeffendæ, & opposuissent se Matris imbecillitas,

cura

cura filiorum, & consilia Amicorum, spes quoque quod non male victurus esset in sæculo, & insuper præstiturus egregia opera servitii divini: denique ipsi arbitri conscientiaæ suæ, & Patres spiritum regentes è Societate Iesu, qui etiamsi judicarent magnam accessionem Religioni eventuram ex ingressu personæ tam spectabilis, considerantes tamen oculo sincero & affectibus humanis libero rationes, quæ id dissuadebant, & propter ætatem proVectam, & propter sanitatem inbecillem, & plures alios respectus magni ponderis pluries eum retardassent; & P. Ioannes Stephanus Ferrari comprobatae integritatis, & spectatae virtutis, qui quando sumpsit illam resolutionem, fuerat jam ei aliquot annis à confessionibus, sæpe sæpius & longo tempore à cogitationibus illis quantumcumque bonis, & ad sanctum finem tendentibus, eum cohibuisset & dehortatus fuisset. Quis dicat temere ei suggestas? *Non est consilium contra Dominum.* Itaque postquam multum diuque secum & cum aliis luctatus fuisset

su,

super tali deliberatione, & sentiret cælitus se impelli, ut incertitudinem omnem abiiceret; voto edito, cuius resolutio semel sumpta, firma & immobilis permaneret, scripsit in charta formulam voti, quo se obstringeret ad ingrediendam Societatem IESU; cumque tunc non haberet alium quem in consilium adhiberet, statuit consulere ipsum Dominum, qui magni consilii Angelus ab Isaia Propheta appellatur. Totum id factum ad eum modum quem perscripsit ipsemet immediate ad P. Ioannem Stephanum Ferari, confessarium suum, in quo melius percipi potest lumen, quo prælucente, directus fuit; fuitque ex illis, quæ non relinquentia dubium in discernendo, quis illud accendat, certum reddunt hominem de divina voluntate. Scheda loquitur sequentia. *Stimuli qui urserunt ad intrandam Religionem, adeo fortiter me presserunt in horum dierum progressu tam secundum humanas quam divinas rationes, ut ad extremum coegerint ad votum nuncupandum de exequenda vocatione, quam non possum credere venire ab alio, nec posse esse,*
nisi

nisi à Deo; enimvero oculis meis visa est tam chara & amabilis, ut persuaserim mihi securius fore ei obsequi, etiam antequam per P. V. mihi licuisset. In quo si secundum viam ordinariam erraverim, cum fuerit tamen impulsus & lumen extraordinarium, adigor ut credam, divinam Majestatem id à me voluisse. Attamen prius quam facerem votum, omnia bene expendi, & sensi me continuo magis propelli; Conjeci illud in chartam, quam junctim mitto P. V. cum intentione ponendi eam sub corporali quando diceretur sacrum, & secundum inspirationem quam à Deo sentiam mihi immitti, quando habebitur in manu hostia, ad dandam communionem, facerem votum vel non facerem. Sensi me postea & toto decursu Missæ magis ac magis animari: & in actu quo habebatur (post dictum: Corpus Domini nostri IESU Christi,) hostia in manu mea; sensi mihi interius dari ultimum impulsum, atque ita cum maxima affectus vehementia & determinatione voluntatis, me totum transcripsi Deo, & in sinum paternæ ejus prudentiæ me & omnia mea abieci. Gaudium meum non poterit accumulari magis, quam accedente approbatione P. V. quam mihi pro-

promitto, quod itidem ad opera mea debeat concurrere: etenim capere nequeo quod post tot vocationes, quas Deus pro sua misericordia mihi inspiravit; quarum secunda semper melior fuit primâ, hac non fuerit ejus vera, quandoquidem in illa excitaverit in me istum ardorem & lucem, quæ non immisit in aliis, id est, ad faciendum illud votum semper pro me auspiciatissimum. V. P. me juvet in gratiis agendis divinæ suæ Majestati, de beneficio, quod æstimo majus omnium, quæ inter alia innumerabilia unquam mihi præstitit. Nulli, si ita videtur, hanc rem communica. Spero cras tibi præstare, interea humiliter P. V. veneror. Nervio Luna 8. Januarij 1652. P. V. obligatissimus servus A. I. Brignole. P. Ferrari hoc epistolio accepto de re tam inexpectata stetit attonitus, & percuttus; suspensus itaque inter periculum temeritatis humanæ, & spem assistentiæ divinæ, sumpsit calamus in manus, & ipso momento respondit in hunc modum. Stupefactus sum multum, multum, multum de una resolutione sumpta sine illo consilio, quod mihi videtur præmittendum fuisse tam arduo in negotio. Differo usque in

*in crastinum dicere reliquum, quando D.
V. venerit in urbem. Deus eam illuminet,
& non sinat errare in re tanti momenti!*
Verum enim vero quid luminis ulter-
rioris erat expectare dum hoc esset
tam clarum quod receperat, & eum
ducebat tanta cum certitudine in viam
rectam, ut non dubitaret vincula illa
duplicare? Tam felicem enim se bea-
tumque credidit, ut adiecerit aliud vo-
tum reflexum, quo obligabat se quod
nunquam petiturus esset dispensatio-
nem primi sui voti. Itaque cum reso-
lutione obtinendi potestatem intrandi
à Summo Pontifice Innocentio X.
(qui tum ademerat Religiosis Ordini-
bus facultatem admittendi Novitios
nisi ad certum numerum) & per illum
benigne concessa est, fuitque ejus fer-
vore mire recreatus, anno 1652. æta-
tis suæ 47. postquam Christum sequu-
tus fuerat ultra triennium in statu Ec-
clesiastico sæculari: ut sequeretur pro-
pius omnibus ambagibus expeditus,
assumpsit crucem Religiosam secunda
die (quæ fuit prima Veneris) Martii,
& recepit se ad Novitiatum, ne verbo
qui-

quidem dicto Dominae Matri, liberis, consanguineis, & amicis aliis, & in complexum ivit Societatis. Indemisit epistolam ad Sacerdotem virum caelestium praedivitem opum, sibi necessarium & familiarem, in qua extollebat uberem misericordiam, quam Deus illi fecisset, deducendo ad sanctam Religionem. *Gratia*, inquiebat, *quam nunquam promeritus fuisset ille, qui post infinitas offensas IESU suo illatas, dignus castigari, & precipitari in infernum; accepisset ab illo characterem suae salutis, & signum quod vellet se socium in caelo, in militiam sanctissimi sui nominis cum cooprando.* Hos & alios affectus expressit in illis litteris tam acres, ut bono illi Sacerdoti lacrymas excusserit: submisitque una litteras suo nomine tradendas Domino Cardinali Archiepiscopo, Dominae Matri, & aliis propinquioribus consanguineis, & amicis, plenas similibus documentis. Inter illos etiam scripsit ad Dominum Iacobum Philippum Durazzo cognatum suum, cum quo ob singularem bonitatem istius Domini, intercedebat illi magna necessitu-

do, & confidentia. Scripsit, inquam, ad illum sanguine sibi, virtute Deo conjunctum, ut præveniret & rogaret obnixè ut ne quid moveret in contrarium; sed fineret se frui quiete istius vitæ, quam post tolerantiam longæ inquietudinis delegisset. Postquam nova hæc mutatio dexteræ excelsi vulgata fuit per civitatem, non potuit impediri, quin à variis consanguineis & amicis fuerit visitatus, qui separationem illam summo cum dolore patiebantur; sed majori sensu admirationis, & sanctæ (inefficacis licet) invidiæ, contemplabantur illum totum alacrem, hilarem, & lætum, non aliter ac si totus plenus esset torrente voluptatis, & deliciis cæli. Quæ lætitia juncta constantiæ imperturbabili, in viro tanti ingenii & nobilitatis, & bonorum quæ Deus benedictus per eum, & per alios ab eo suscitatos operatus est, manifestum faciunt sumptam ab eo resolutionem ad eum modum, ut posset videri imprudentia; certo certi tamen fuisse impulsus Spiritus sancti, superiores communibus regulis secundum
 quas

quas solent & ordinarie debent mensurari tales electiones, non poterat controverti. Neque solum habuit eam hilaritatem in ipsis initiis, quæ in multis se prodit in novitate quietis & innocentiae religiosæ: at in ipso semper crescebat tam singulari cum consolatione, ut debeam præter illa narrare quædam de ejus vita in religione acta, & operibus sanctis, quibus decem annos implevit, quos vixit dein in Societate.

Prima virtus quæ in eo observata fuit, & reliquis præmittenda est, quod maximi fecerit statum Religiosum, illudque verbis, & actionibus singulariter patefecerit. Dicebat enim videri sibi tam magnam innocentiam, & securitatem, qua vivitur in Religione; ut vix major potuerit inveniri in paradiso Terrestri; ad consequendam autem felicitatem illius status, tam parvi faciebat totum id quod deseruerat in sæculo, ut cum aliquando fuisset à quodam domino interrogatus, utrum contentus viveret in Religione? Respondit: quod si haberet in manu universum orbem terrarum, collectum in

unum ovum, subito dejecturus esset in terram. Ex hac æstimatione, & magno affectu oriebatur in illo dolor & pœnitudo, quod tanto tempore tanto bono carvisset, idque creberrimè in familiaribus colloquiis auditus fuit deplorare; quin contigit eum hoc explicare tanto cum sensu, ut in admirationem rapuerit unum Patrem cum quo erat in recreatione quotidiana: cum enim cœpisset cum eo confidenter colloqui de quibusdam suis rebus inter alia dixit: se continuam mallei percussione sentire in corde, quæ culparet suam tarditatem, quod non citius totum se Dei servitio mancipasset; & quod ille scrupulus esset illi martyrium ingens, quo torquebatur perpetuo tam acerbe, ut adimeret consolationem, quam ceteroqui gustabat in oratione, & aliis exercitiis religiosis. Unde judicabat quod in pœnam suorum peccatorum, Deus hoc illi tormentum reliquisset, cujus nullum levamen sentiebat, ne frueretur cœlo per nimiam anticipationem, quod alias sibi promiserat in religione futurum & alii experiun-

riuntur. Eapropter sancta quadam invidia ferebatur, & singulari affectu complectebatur illos, qui cito erant admissi ad portandum suave jugum domini, & illo bono fruebantur ab adolescentia, intrantes adhuc juvenes in Religionem. Cum illis conversari volupe illi erat: gratulabatur illis de tanta felicitate, & lætabatur si videret ab illis cognosci eam, & pro meritis ponderari. Cernere erat eum cum gustu & amore agere cum eis in Collegiis & Novitiatu; quo invitatus libenter se conferebat, & sedens inter Novitios dicebat. *Nolite credere me senem licet incanescam, quoniam paulo plus temporis numero quam vos.* Innuens quod non haberet rationem annorum, quibus vixerat in sæculo; sed paucorum illorum, quos traduxerat renatus Deo in Religione.

Excitabat similiter istam æstimationem per desiderium ardentissimum, quo procurare studebat, ut alii quoque fierent Religiosi: ad quod statim eos adhortabatur non solum diserte, sed etiam efficaciter & privatim, ore-

tenus & per litteras. Ac præterea publice in concionibus, & exhortationibus multum, & ardentè hoc inculcabat. Prima vice qua in publico loqueretur Mediolani, fuit in congregatione secundæ classis Grammaticæ, ibi coepit discurrere tanta cum emphasi de vocatione Religiosa, ut postquam multa apposite dixisset ad juventutem de hoc argumento, conversus tandem ad Beatissimam Virginem, exprimensque istum affectum, sic eam affatus est. *Tu ergo quæ miserta fuisti mei in præceptis, permittes ut hi qui quasi in fasciis, crescunt lacte suæ erga te devotionis, maneant in mundo ut se perditum eant? absit ô bona Mater, ut tantum malum non avertas!* Et alia in hunc sensum prosequutus est tam affectuose, ut multi ex nostris Patribus qui erant præsentès non possent se continere à lacrymis. Videbatur nonnullis parum conveniens ad vitam religiosam adhortari pueros tam imbecillæ ætatis, & parvæ capacitatis; sed quid ad objecta haberet penes se reponere, ostendit non ita multo post, quando occasione festi B. Aloysii Gonzaga

zaga faciens in Sodalitate Rhetorum exhortationem, coepit statim ita, quemadmodum non solum tum fuit auditus, sed etiam postea inventum sua manu in chartis notatum.

*Dum prateritis diebus voluisset obedientia me facere exhortationem in Sodalitate Grammaticorum, in egressu fuit qui mihi diceret: Pater licet clara fuerit tua dictio, qua impulisti Auditores ad amplectendum statum religiosum, videtur tamen opera non bene fuisse collocata coram pueris, qui tum propter annorum imbecillitatem, tum propter immaturitatem iudicii, non sunt multum capaces ad status Electionem. Quadras-
sent ista melius si Rhetoribus, & Humanistis jam provectioribus, tua ista vendidisses; & fortasse ictus tuus non in irritum cecidisset. Me verti ad illum admirabundus, sed respondi mihi met ipsi: An forte beatitudo status religiosi, ita indiga est argumentorum, ut quantumvis non quinque vel sex, sed centum & mille essent in qualibet classe discipuli, non posset in unaquaque rationibus semper novis, ac novis, & abundantibus, & efficacibus discurri ad permovendum? Quin imo si amantissimus & libera-*

liſſimus Deus & Dominus, in vocatione ad ſtatum huiusmodi, fecerit mihi beneficium tam facile; non arripiam ego, ne perfida fiat mea ingratitudo, omnem occaſionem eam deprædicandi, & exaggerandi? Non, non, poteſtor coram quocumque qui me audit, & contenta voce proteſtor, quod quotieſcumque mihi concionandum erit ad iuvenes, qui tam bonæ electionis fuerint capaces, caverò mihi de alio argumento dicere. Igitur ut liberem meam fidem, propono vobis B. Aloyſium Gonzagam &c.

Non minus fecit iſta, quam dixit, & quoniam ob gratiam dicendi ex ſpiritu, ſemper invitabatur ad exhortandum in illa frequenti congregatione, & cum magna Spiritus & laterum vehementia effundebat ſe in laudes ſtatus Religioſi; nonnullis è noſtris Patribus viſa eſt res, quæ moderatione opus haberet, & fuit qui eum moneret: at ipſe quadam vice, dum ſolemne haberet orationem in Sodalitio Rhetorum Mediolanenſium, & cœpiſſet cum magno fervore deprædicare bonum ſtatus Religioſi, dixit quaſi per objectionem: *Sunt nonnulli qui non probant,*

bant, quod ego toties, & cum calore exhorter omnes ad vitam religiosam: verum illi de gratia hoc mihi condonare dignabuntur, etenim ego cum gravissimo meo damno expertus sum, quid sit esse sacularem; at modo cum incredibile meo gaudio probo statum Religiosum: ex comparatione unius cum altero, sentio me tam vehementer adigi ad explicanda mala illius, & bona hujus, ut, nisi vim mihi inferre velim & scrupulis agitari; nequeam resistere spiritui qui in me loquitur; & linguam cohibere, quo minus proferat, quod deus cordi inspiravit. Eam ob causam non potuit unquam refrigerescere in illo hic impetus, sed potius alios efficaciter inflammabat, ut diligenter secum adlaborarent in extrahendis hominibus è sæculi Ægypto. Ipse vero cum vera ista charitate, primum exercitata in Sancti Andreæ Tyrocinio Romæ, suis consanguineis & propinquis dicebat: *Invenimus Messiam*, & omnes nervos intendebat ut deduceret eos ad IESUM. Atque ita cum deberet Mediolano Genuam migrare, rogatus ut adhuc aliquantulum ibi subsisteret, renuit, & dixit: se velle quam

mox abire, ut quantum posset studii poneret in adducendo ad Societatem P. Hippolito Durazzo nepote suo; qui cum esset Prælatus, in Aula Romana magnæ auctoritatis, illis diebus se receperat in domum suam, ut extra strepitum in silentio tales cogitationes volveret, quas adjutus fidis consiliis & efficacibus exemplis Avunculi, postea in opus deduxit. Persuasit etiam ingressum Religionis Dominæ Mariæ Magdalænæ Durazzo sorori suæ, viduæ pientissimæ, etsi satis provecæ esset ætatis, & præterea in sæculo laudabiliter occupata operibus devotionis, & misericordiæ, & plurimum utilis ad gubernandam prudenter christianeque domum & prolem. His non obstantibus non videbatur P. Antonio Iulio posse esse rationem tam validam ad manendum in mundo, quin prævalerent bona securitatis, & felicitatis, quibus abundat Religio. Idem desiderabat & postulabat, licet non fuerit exauditus, à duabus suis filiabus & totidem filiis; nec erubuit publice è pulpito hoc declarare cum affectuosissima

invi-

invitatione ad eos permovendos : & minorem quidem natu adolescentem magni ingenii, & vivacitatis, qui spem maiorem faciebat sequendi sua, & Christi consilia, pluribus mediis conatus est eo inducere, usque est variorum amicorum ope, qui eum impellerent. Denique Taurino, ubi Pater concionabatur per adventum, dedit litteras ad unum e Magistris nostris, cujus scholam frequentabat; scripsitque in hæc verba : *In schola tua habebis subinde occasionem videndi mei filii. Obtestor ne ullam occasionem negligas, habendi eum sæpe penes te privatim : & amicabili tuo modo in agendo manuducendi, & instillandi ei salutaria monita, quæ prudenter cognoveris fore opportuna ad ejus expugnandum animum, quo subducat se tempestive tempestatibus mundi, & recipiat ad portum securum Religionis. Quin imo eo progressus est ut largis promissis, sollicitaverit eum, cui bonæ ejus institutionis cura commissa erat, ut induceret eum suaviter ad ingressum in Societatem Iesu. Illis quibus videbatur mirabile quod flocci penderet propagationem* &

& conservationem profapiæ suæ, respondebat cum sensu digno homine qui plenus erat spiritu Dei: nimirum quod ipsemet stuperet aliquem sollicitum esse posse pro familia conservanda, qui compertum haberet, quod non posset deportare secum in alteram vitam vel bona, vel consolationem: at contra futura sit maxima consolatio, quod res quæ serius ocysus debet habere finem, tota absorbeatur à Dei obsequio, & transplantetur in cœlum. Insuper dicebat cum ego tot modis offenderim Deum, æquum & justum est me latagere, ut ad minimum per meos filios non offendatur, sed perfectissime colatur, ne filii insistant vestigiis Patris, & exhauriant se in servitio Carnificis tam detestandi, quam est Mundus cum concupiscentiis suis; cum possint se salvos facere serviendo tam bono domino, ut est Deus. Et hoc iudicium de stoliditate & stultitia, quæ sita est in obsecundando potius mundo quam Deo, habebat ita fixum in animo, ut in pluribus occasionibus, & lingua & calamo hoc testaretur. Exemplo sit
una

una Epistola in tali argumento eloquentissima, utpote dictata eo in calore & æstu, quem tum hauserat in oratione. Scripsit Mediolano Genuam ad dominam suam Matrem, & orsus discursum de morbo in quem inciderat quidam Nobilis proxime illi sanguine junctus, ita fatur. *Indoleo de infirmitate Domini N. quæ tamen multum attulerit ei boni si convalescat, uti spero, & Deum oro ut vertatur illi ad salutem; & faciat eum cognoscere quam improspere & male exantlentur omnes labores & molestiæ, quæ mundi causa assumuntur, & quanto melius impendantur deo. Iam nunc absolvo horam nobis statutam ad orandum, in qua meditatus de Evangelio præsentis diei, quod nemo possit duobus dominis servire, Deo & mundo: tam palpabiliter & vivaciter quasi manu tetigi, & penetravi hanc veritatem, quod attinet miseriam anteponentium servitutem Mundi qui tam male remuneratur opera etiam diligentissime in ejus gratiam facta; servitio Dei; qui tam fideliter compensat ad desideria usque, quæ concipimus faciendi etiam minimum quid intuitu eius: quod certissime credam verti mihi cerebrum præ dolore,*

dolore, dum considero me totam vitam, non solum illi mancipasse, sed etiam martyrio affecisse, ut idolum illud adorarem, quod semper me odio prosequutum est, & victimam voluit facere aeternae mortis; & fecisset, nisi obstitisset robur, quo me à precipitio retraxit ineffabilis misericordia mei IESU, qui cum permiserit perire tot minores me peccatores inter catenas crudelium illorum tyrannorum; me demum dignatus est illustrare benigno suo lumine, quod me jubet sperare vitam aeternam. Revera deberent omnes meis gemitibus suos adjungere, & ad caelum emittere zeli Christiani suspiria, quando cernuntur deviare juvenes magni ingenii, perspicacitatis, & acutae sagacitatis, habiles, industrii, omnibus dotibus & talentis divites. (Qualis apprime est Dominus N. propinquus noster) & venari vanissimam auram quatuor vermiculorum terrae, cum tanto sudore, ut decima ejus parte possent suis viribus, divina gratia adjuti regna (ut ita dicam) & provincias integras ad Dei gloriam lucrari, & acquirere plausum omnium Calitum arrha è caelo accepta. Sed heu, dicetur mihi, tu pejus fecisti quam quivis alius. Est verum (fateor) verum,

verum, & nimis quam verum. Sed me pœ-
nitet, sed cor mihi dolore disrumpitur, sed
spero cum auxilio mei dulcissimi IESU non
futurum me in posterum talem. Verum illi
qui fallacis mundi machinationibus, illece-
bris, & imposturis deprehendunt se irreti-
tos, jam à triginta, quadraginta, quin-
quaginta, & quod superat, annis; & tam
male pro durissima servitute, quam servie-
runt, remuneratos; quomodo se diutius de-
cipi patiantur, & non potius laqueos omnes
rumpant ad libertatem filiorum Dei adspi-
rantes? Non capio quomodo non omnia,
quæ umbratilem aliquam pulchritudinis spe-
ciem præferunt, pede proterant? Quomodo
non cogitant de mutando domino, qui eos
tam crudeliter tamquam vilissima mancipia
tractat, & quasi fustibus excipit fatigatos?
Difficile est comprehendere. Idem ille domi-
nus N. qui habet ad aures Patrum, tam il-
lustre lumen Religionis tam sanctæ, qualis
est Theatinorum, postquam fuit ad melio-
rem statum redactus, quare non sumpsit
sanctam, & generosam resolutionem amu-
landi sibi tam propinquum, ut se redderet
dignum eo nepotem? Quanto magis attrahere
eum deberet ad sequendum Christus? Dig-

netur Deus pro sua immensa bonitate & clementia, lapsu temporis concedere, ut intelligent universi, etiam gnati mei, praesertim illud: quod nemo possit duobus dominis servire, & Deo (qui se dedit totum, & si se dederit totum, quid meretur à nobis in vicem recipere nisi totum?) & Mundo; quem iantum abest ut lucremur, ut potius nosmetipsos perdamus; debet ergo quod consequens est voluntarie repudiari: quia quando eum sectamur, non assequimur sed fummi instar evanescit, & dum eum captare volumus, fugit velut umbra, & rapi nos sinit in gehennam.

Hæc erant sensa animi circa servitutem Mundi & Dei, quæ non inutiliter tum sunt expressa & notata. Enimvero æstimatio quam fovebat de Religione, non erat impressio aliqua speculativa aut affectus aliquis sterilis ex simplici complacentia ortus, erga quietem status religiosi, sed multum efficax & foecundus illius virtutis & sanctitatis, quæ consentanea est domui Dei.

C A P V T V.

*Oratio P. Antonii Iulii & unio cum
Deo.*

CUM sit domus Dei peculiari quadam ratione domus orationis, P. Antonius Iulius præfixit eam sibi perinde atque principium virtutum suarum religiosarum, & magno studio & serio applicabat se omnibus exercitiis spiritualibus Orationis, lectionis, examen, & omni generi devotionis, per quæ media comparavit sibi arctam, assiduam, sapidam, & affectu plenam consuetudinem cum Deo. In hujus virtutis probationem, ut non hæreamus in generalibus terminis, serviant particularia, quæ subjungo. Exercitationes spirituales præscriptas in Religione exequiebatur omnes quotidie integras; quantumvis oppidò occupatus, & quam exactissime; impendebat illis totum tempus statutum, non tantum quando eas obibat solitis locis, & temporibus, ad signum campanæ communis;

G

munis; verum etiam quando ex aliqua occurrente occasione cogebatur eas implere aliàs & alibi, & tum *ut particula bona dici eum non præteriret* metiebatur tempus ad clepsydram, quam semper secum gestabat, etiam quando iter faciebat. Ad horam statæ orationis adjungebat indies aliam semihoram determinatam, quam sumebat sub vespere, non solum in Novitiatu; ut alii, sed etiam in secundo anno, quo adhuc tyro, fuit occupatus in Collegio ad repetendam Theologiam, & omnibus ex ordine sequentibus annis, usque ad finem vitæ: adeo ut bene dici posset, majorem partem suæ vitæ, & frequentiore occupationem fuisse orationem: quia si excludas tempus, quod ad conciones parandas collocabat in studiis, quasi semper reperiebatur in cubiculo, non vagabatur per domum, sed quærebatur in choro vel templo. Idque non dumtaxat in decursu anni, quando minus occupationibus distrahebatur; sed etiam quando concionabatur, & diebus immediate quadagesimæ proximis; apparebat si quidem præ-

præparationem ejus ad prædicandum
fuisse frequentem & continuatam ora-
tionem, unde *verbum* ejus *sicut facula*
ardebat: quemadmodum fuit Cremonæ
observatum, quo vix advenerat, ut
verbi divini præconem ageret in tem-
plo Cathedrali, quin hujus veritatis
specimen daret. Paucis diebus substitit
in Collegio, prius tamen quam migra-
ret in cubiculum palatii Episcopalis
(pro ut in Italia concionatoribus mayo-
ris notæ mos est) dedit se tantum seces-
sui & devotioni, ut conclave magis
ordinarium per diem videretur chorus,
aut angulus aliquis Ecclesiæ. Et hæ-
erant ejus visitationes, prelationes,
officia humanitatis, & invitationes ad
conciliandos auditores, & concursum
alliciendum, si quam in urbem venie-
bat probe cognitus & exspectatus. Ne-
minem autem eo tempore quo Eccle-
siastæ munereungebatur, admittere-
bat ad colloquium, nisi consilii, aut
opis spiritualis petendæ gratia. Ad hæc
mane quo debebat ascendere cathe-
dram ad prædicandum, impendebat
magnam temporis partem in eo modo

præparationis , meditando , & commentando ea quæ dicturus erat ad lumen Magistri sui Iesu crucifixi. Quod Taurini animadversum fuit à diversis, si quidem recipiebat se in cubiculum suum matutinis illis horis, & erat quid ordinarium eum geniculantem in terrâ in mediocubiculi, & orantem invenire. Unde surgebat quando tempus erat ascendendi suggestum, tam plenus Deo, & absorptus in Deum, ut videretur non meminisse alterius rei, vel personæ, quæ illi occurreret, sed ibat delatus à Spiritu *ad eruētandum verbum bonum*, quod mente collegerat. Dum deberet dicere Mediolani festo B. Francisci Borgia, egressus est cubiculo tempore debito, à nullo monitus; & quasi raptus extra se, progressus est ad pulpitem sine socio, & superpelli-
ceo; admiratus Sacristanus pone illi hoc apportavit, & postea adhæsit. Mane quodam invitatus ad faciendam exhortationem in quadam Sodalitate Collegii Genuensis, egressus domo professa ut eo iret, incessit tam collectus intra se per plateas, ut videretur
exta-

extasim pati, nec scire quis se salutarer, nisi à comite admoneretur; cui si diceret pauca verba, erant tam mutilata, trunca, & interrupta ut non posset socius colligere sensum: sed videns ita occupatum cum deo, non audebat interpellare, & longe meliorem conversationem interturbare. Cremonæ per illud tempus quo inter concionandum commorabatur in Episcopio, fuit notatum excepto eo otio quo necessario revidendæ suæ concioni vacabat, & erat oppido breve, totum reliquum quo non erat in alia distractus dare orationi, pari modo genibus flexis in medio pavimenti, & sæpenumero brachiis in formam crucis extensis. Officium divinum recitabat quotidie de genibus, interrompebat per intervalla frequentibus suspiriis devotionis, quæ cor exhalabat: de quo cum essent certiores factæ non paucæ personæ, prætextu quæsito, aut etiam furtim insinuabant se in ejus cubiculum; ut spectarent actiones tam singularis pietatis, & non digrediebantur nisi ædificati, & non minus compuncti, quam ex

concione prorsus devota. Præterea ibi adhuc fuit observatum fuisse illi familiare, & in nostris domibus, & ubicumque habitabat, quod singulis vespers secedebat è palatio Episcopali in cathedralem, ad lucrandas indulgentias, & includebat se longo tempore ad fundendas suas preces, in Sacello venerabilis Sacramenti. Pro qualibus & aliis suis devotionibus apparebat vix illi posse vacare tempus: sed ille sibi faciebat, subtrahendo visitationibus, & conversationibus superfluis, omnes illas horas quas poterat, ut impenderet commercio ejus, qui melius eum replebat pace interiori, & solidioribus voluptatibus solabatur. Cum hac devotione, non solum quasi cum robusta unctione, vigor ei accrescebat in laboribus, sed insuper quasi dulci succo condiebat omnes recreationes; ac propterea diebus relaxationi designatis, si erat invitatus, & jussus egredi ad villam foris, auræ captandæ gratia; auram quam captabat dulcior erat illa, quæ adspirabatur à collibus æternis. Ita vero. Et ideo quando erat in vinea Collegii Mediolanen-

lanensis circumdatus alijs Religiosis, ut gauderent ejus consortio, quod erat dulcissimum, & desideratissimum, frequenter inveniebatur in sylvis, aut sacello domestico, ubi transigebat multas horas diei, oblectans se cum Deo.

Obibat illa exercitia devotionis tanta cum collectione, ut non recordaretur se aut quæsitum aut vocatum. Evenit Mediolani, quod quispiam ad fores cubiculi sui in domo professa pulsaret ad ostium; & cum videretur illi qui pulsaverat se audiisse vocem quæ responderet *intra*, aperuit ostium, & vidit Patrem in medio cubiculi genibus nixum cum officio in manu, facie multum inflammata, oculis in cœlum elevatis, ita in deum abreptum, ut non adverteret januam apertam, nec se moveret. Quamobrem ille interpellator cum sensu reverentiæ, ne eum turbaret, iterum ostium clausit, & abiit. Alia vice non nemo ex operariis, qui consuevit pro domo laborare in Collegio Mediolanensi, intravit cubiculum ejus (fortasse opinatus Patrem ibi non esse) ut nescio quid utensilium reficeret.

ret. Offendit illum flectentem in medio cubiculi, expansis in modum crucis brachiis, in actu & modo se habendi, qui bene proderet, ubi versaretur cor ejus. Cum non percepisset Pater ex strepitu quod alter intrasset, permissus est frui suis deliciis sine turbatione. Neque solum in cubiculo, sed in aliis etiam locis magis tumultui expositis, ita se noverat ab externis subtrahere, & intra se recipere, tanta cum collectione, ut nequaquam reflecteret ad ea, quæ circa se agebantur. In villa suburbana Collegii Mediolanensis, de qua superius mentionem fecimus, quibusdam Dominis, qui venerant ad eum invisendum, cum nullibi reperiretur, fuit dictum: inventuros se illum in aliquo nemore orantem. Itaque fuit quæsitus in sacello, ubi est secessus in loco suavissimæ amœnitatis, & devotionis in medio duorum lucorum acclivis, elegantia rustica in similitudinem Montis Calvariæ adornatus, atque ideo à Patre multum dilectus ob venas dulcissimas spiritus, qui dense isthic saliebat *cum gaudio de fontibus salvatoris*. Et
vero

vero ibi statim fuit inventus, ita abstractus à sensibus, & absorptus in Deum, ut assequutus non fuerit adventum, nec audiverit loquentes sæculares, & alios nostros qui eos deduxerant, donec eum ad se revocassent & monuissent; tum enim sibi restitutus surrexit, & excusavit. Alias repertus in eodem sacello itidem à sæcularibus, qui venerant curiositatis gratia, ad spectandam villæ viciniam; flexis genibus se ita tenuit immobilem, ut nullum daret signum notitiæ quemquam supervenisse. Sociabat & fovebat orationem, potissimum quando erat solus, actibus externis devotionis, observatis quandoque absque eo, quod sciret præsentem. In supradicto sacello villæ fuit inventus stare in oratione brachiis apertis ante crucifixum, & vel ut veneraretur quinque vulnera, vel alterius devotionis intuitu, quinies osculari terram, eructando aliquas aspirationes; & permanebat stans, oculis fixis in IESUM suum cruci affixum, gemens & lacrymans cum demonstratione tenerrimi affectus.

ctus. De quibus & aliis hujuscemodî
 actibus alibi forte plura, quando tra-
 ctabo de ejus poenitentia, ad quam se
 comparabat: quod si præfagiret alios
 superventuros, ex desiderio non ma-
 nifestandi sensa suæ devotionis, fugie-
 bat ad fossas quasdam siccas, quæ erant
 in villæ confiniis, permittens aliis sen-
 tire quod vellent de suæ pietatis ex-
 cessibus; quando securus erat de studio
 secreti, quo cavebat ne aliis innotef-
 cerent; Quo tempore affectiones, quæ
 animam ejus inebriabant, erant tam
 uberes illius pluvix, quam Deus se-
 gregat hæreditati suæ, ut cor ejus dul-
 cedinis copia obrueretur; quamvis ip-
 se dissimularet, præsertim quando in
 conspectu aliorum orationi vacabat.
 Verum-tamen in vultu se prodebat, &
 faciei compositione, ut dictum est,
 multoque magis ex copia dulcium la-
 crymarum, quæ in suo corde, tamquam
 ex fonte Paradisi in duo flumina se di-
 videbant. Certe dum esset Novitius
 fuit observatum ab aliis Novitiis, quòd
 finita media hora orationis, quam per
 diem omnes faciunt in communi,

quan-

quando componebat se ad sedendum cum aliis, ut usus fert, ad faciendam recollectionem, & successum Meditationis expendendum, adhuc non poterat ^{ita} cohibere cursum aquarum, *quæ cum impetu fluebant de Libano*, ut non fuerint à nonnullis visæ manare per genas ubertim lacrymæ, quibus præter devotionem suam, aliorum quoque spectantium fœcundabat sterilitatem.

Dicebat sacrum cum tanta abundantia affectuum divinorum, ut impar ad refrænandam illorum vehementiam & intensiorem illorum actuum, quos in penetralibus versabat, cogeretur permittere eorum impetum se exonerare in suspiria, & transparere fulgetra piissimarum evaporationum, etiam exterius, quibus permovebat ad devotionem circumstantes; præsertim tempore consecrationis, & communionis, utpote magis sacrosancto, ex confortio præsentiae divinæ. Videbatur totus fermentari, adeo ut quandoque capilli in capite erigerentur, & quid igneum ex vultu ejacularetur. Unde factum quod sub initia habitationis suæ
in

in Collegio Mediolanensi , sæculares qui non noverant eum de nomine , moti sanctitate , quæ in eo elucebat inter celebrandum , appellarent sanctum Patrem. Quid in illius intimis visceribus operaretur Dominus , quando sacramentaliter eum in sinu pectoris gestabat , potest argui ex modica quadam conjectura , quam scripto reliquit , in quo ita dicit. *Operam dabo postquam sacramentaliter sumpsero Deum & Dominum meum : unire illum tam vivaciter per actus amoris internos cordi meo , ut mihi imprimat vividam imaginem , & similitudinem sui , quæ elevet , purificet , & virtutem ac præstantiam addat operibus meis , perficiatque semper magis ac magis in me imaginem & similitudinem illius Christi : & nunquam non debebo post sacrificium Missæ peractum , postulare illud donum , ut relinquat in anima mea illam fortitudinem & robur in ordine ad omnes meas operationes , ac præterea addatur mihi constantia ad perseverandum , & in dilectione ejus proficiendum. Ita ille. Unde non est mirum si animâ refertâ illis splendoribus , in vultum prorumperent*

rent radii singularis devotionis. Nec solum in operibus spiritualibus, verum etiam in aliis occasionibus vitæ activæ; conversans enim cum hominibus gerebat impressum fronti & oculis certum lumen vultus divini, & afflabat nescio quid cœli & sancti, maxime quando aliquis eum comiter, & cum charitate accedebat; atque in villa, quando cum juvenibus familiariter agens modulabatur cantiones spirituales, dicebant quidam, quod comperirent in illo accendi affectum erga argumentum carminis sacri, adeo ut similes devotos affectus in aliis quoque excitaret. Tempore morbi non erat illi gratum, si quis eum sermonibus de rebus indifferentibus distraheret, multo minus otiosis & vanis: sed omnem suam conformationem desiderabat è cœlo. Et quando Senæ ægrotabat, monstrabat se non haurire majorem consolationem, quam quando curabat sibi legi aliquem librum spirituales: si autem Nostri ob suas occupationes non possent hoc illi officium præstare, exigebat hoc à filio suo natu minore, adhuc sæculari, qui
per

per id tempus quasi in transitu in nostro isthic Collegio forte hospitabatur.

Neque erat cubiculo vel templo alligata ejus devotio : sed in Deum ferebatur præterea , quocumque iret , & vagaretur. Quando incedebat per domum , salutans obvios , non dicebat illis verbum , ne aspiciebat quidem , sed recta ibat vias suas : quod quibusdam visum speciem esse inurbanitatis , aut inadvertentiæ indecoræ ; qua de re monitus , utcumque hoc moderatus est , non tantopere tamen , ut respectui hominum non prævaleret , cura custodiendi cor suum , tanquam sedem Dei in pace. Quando ambulabat per plateas fuit observatum , quod citra occasiones extraordinarias , de quibus supra diximus , incederet oculis ita ad modestiam compositis , & quasi penitus in se reflexus ; ut non animadvertet , à quo esset salutatus : quod quidam prudentulus arbitrabitur fortasse excessum fuisse potius quam virtutem : sed qui sciverit quantum Deus occupet cor suorum , non improbabit quod ipse suo jure eripiat istud hominibus ; quibus

bus tamen sancti studuerunt etiam satisfacere quando poterant, sine præiudicio Domini. Atque ita P. Antonio Iulio gratum erat, si socius Nomenclatorem ageret, quando salutabatur; ostendens suum non persentiscere, provenire ex sua negligentia & incuria: Quæsitæ est causa dum esset Taurini à suo Confessario, tam accuratæ sensuum custodiæ: aperuit illi confidenter, se ejus satagere ob duas rationes; quarum prima erat, ut non solum excluderet omnem cogitationem impuram, quæ posset irrepere per oculos; verum etiam omnem quantumcumque tenuem affectionem quamvis involuntariam & naturalem, erga creaturas & Mundi vanitates: Altera ratio, ut mordicus retineret in vigore, principia illa æterna, quæ imbiberat; & experimento discebat facile evanescere, aspiciendo lenocinia sensuum, & agendo cum sæcularibus. Unde patet quod illa modestia non fuerit negligentia, sed sollicitudo studiose quæsitæ. Refectio, cum qua proficiscebatur, & leniebat tædium itineris, erat oratio:
Cum

Cum esset ex itinere delatus in Nove, qui est locus è præcipuis ditionis Genuensis, vix eo devenerat, quando dixit fociis; intelligo quod in hoc loco sit pulchra Ecclesia parochialis, divertam ad eam paululum ad videndam. Hoc dicto subduxit se ex diversorio, & tempore medio, quo alii partim quiescerent, partim facienda curarent; Ille se impendit visitando Domino Deo in templo: nec visitatio fuit cæremonialis aut per transfennam, sed duravit per sesquihoram, quam exhaustit precando. Venerat ex itinere Bononiam, & invitabatur ut se reficeret. Petiit ubi esset chorus, responsum est in Ecclesia; statim eo se contulit, ut quæreretur suum refrigerium. Alia vice de via lassus devenerat ad domum Professam Genuensem, derepente divulgatum est per domum adesse illum; accurrunt Patres ad cubiculum, cupidi eum videre. Non inveniunt. Quaque versum in circuitu eum quærunt; non comparet. Inquirunt ab obviis ubi sit, nemo de eo habet quod dicat. Tandem comperit eum se recepisse ad odæum Templi,

pli, non per modum volentis raptim & breviter visitare sanctum sanctorum, ut aliqui laudabiliter solent facere, ad ordiendum, vel finiendum iter suum ad pedes Domini: sed ad modum orationis lentæ, & quietæ, & ad absolvendum suas devotiones per viam interruptas. Licet essent tam gratæ ipsi significationes charitatis illorum Patrum & Fratrum in recipiendo, quam ejus charitas & adventus ipsis: non minus tamen abripiebatur ejus cor eò, ubi experiebatur officiositates minus habere phalerarum, & plus substantiæ. Porro hujus ab externa diffusione abstinentiæ & internæ tam perfectæ collectionis, aspernantis omnem curiositatem quantumvis rationabiliter allicientem, dedit singulare exemplum, quando in habitu Sacerdotis sæcularis profectus fuit Romam anno sancto. Etenim tam impigre fuit intentus quæstui illius sanctitatis, quæ eum eo traxerat, ut toto illo tempore, quo commoratus est in illa urbe tam abundante curiosis aspectibus, numquam dignatus fuerit videre palatia, fontes, hortos

amoenitatis, & alia hujusmodi oblectamenta, quæ distrahere poterant, & aliquid habere vanæ curiositatis: quodque magis mirabile, ne quidem illa loca spectavit, quæ quadam specie rerum sacrarum coruscabant, & excusare poterant curiositatem; qualia erant aulæ Cardinalium & ornamenta Ecclesiarum, adeo ut Româ discesserit, ne viso quidem Pontifice maximo, qui erat Innocentius X. Vilia illi videbantur omnia, quæ in mundo pro magnis & sublimibus habentur, & sicut dicit Sanctus Gregorius de divo Benedicto, contemplabatur mundum in radio Solis uno, & apparebat illi tam exilis, ut non esset dignus nostra æstimatione. Aspectus quem fixerat in illum splendidum & jucundum radium divinæ lucis, ita illum rapuerat, ut ita sentiret. Et pro ut testati sunt quidam, qui consuetudine ejus gaudebant frequentius, semper adspirabat ad beatam æternitatem; illam continuò habebat in ore, nec amplius invidia movebatur eorum, qui sicut cedri Libani eminebant in terra, sed eorum sortem æmulabatur,

tur, qui videbantur illi majores fore in
cœlo. Vnde cernens subinde pauper-
culos, nutu arridens opulentioribus,
inquirebat; isti miselli honoratiori loco
potituri sunt in cœlo. Ab isto divino lu-
mine ita illustrata fuit ejus anima, ut
sicut ejus Confessarius declaravit, ef-
fet repleta splendoribus, qui conscien-
tiam illi reddebant suam non quidem
scrupulosam, sed delicatam & exactis-
simam in cognoscendo omni nœvo,
quantumvis minimo. Et quidem ad
impetrandam illam tam perspicuam
notitiam etiam minutarum labecula-
rum, quæ animæ perfectum nitorem
quadamtenus obscurare poterant; non
veniebat illi solum illud lumen ab alto,
sine suo studio gratis infusum: sed ad-
hibuerat magnam industriam per seve-
ra & frequentia examina: quippe re-
pertum est in ejus annotationibus,
quod excuteret conscientiam suam
mane antequam egrederetur domo, si
quidem egrederetur; & sub prandium
iterum, dum erat regressus domum.
Pari modo à prandio priusquam se
componeret ad agendum cum proxi-

amœnitatis, & alia hujusmodi oblectamenta, quæ distrahere poterant, & aliquid habere vanæ curiositatis: quodque magis mirabile, ne quidem illa loca spectavit, quæ quadam specie rerum sacrarum coruscabant, & excusare poterant curiositatem; qualia erant aulæ Cardinalium & ornamenta Ecclesiarum, adeo ut Româ discesserit, ne viso quidem Pontifice maximo, qui erat Innocentius X. Vilia illi videbantur omnia, quæ in mundo pro magnis & sublimibus habentur, & sicut dicit Sanctus Gregorius de divo Benedicto, contemplabatur mundum in radio Solis uno, & apparebat illi tam exilis, ut non esset dignus nostra æstimatione. Aspectus quem fixerat in illum splendidum & jucundum radium divinæ lucis, ita illum rapuerat, ut ita sentiret. Et pro ut testati sunt quidam, qui consuetudine ejus gaudebant frequentius, semper adspirabat ad beatam æternitatem; illam continuò habebat in ore, nec amplius invidia movebatur eorum, qui sicut cedri Libani eminebant in terra, sed eorum sortem æmulabatur,

tur; qui videbantur illi majores fore in
cœlo. Vnde cernens subinde pauper-
culos, nutu arridens opulentioribus,
inquirebat; isti miselli honoratiori loco
potituri sunt in cœlo. Ab isto divino lu-
mine ita illustrata fuit ejus anima, ut
sicut ejus Confessarius declaravit, ef-
set repleta splendoribus, qui conscien-
tiam illi reddebant suam non quidem
scrupulosam, sed delicatam & exactis-
simam in cognoscendo omni nœvo,
quantumvis minimo. Et quidem ad
impetrandam illam tam perspicuam
notitiam etiam minutarum labecula-
rum, quæ animæ perfectum nitorem
quadamtenus obscurare poterant; non
veniebat illi solum illud lumen ab alto,
sine suo studio gratis infusum: sed ad-
hibuerat magnam industriam per seve-
ra & frequentia examina: quippe re-
pertum est in ejus annotationibus,
quod excuteret conscientiam suam
mane antequam egrederetur domo, si
quidem egrederetur; & sub prandium
iterum, dum erat regressus domum.
Pari modo à prandio priusquam se
componeret ad agendum cum proxi-

mo; denuo sub vesperam quando se recipiebat ad cubiculum; denique tempore præscripto sub noctem antequam daret se quieti. Quo usu se frequenter excutiendi, meruit & acquisivit illud lumen ut ne minima quidem festuca illum lateret.

C A P I T U L U M VI.

Zelus animarum quo flagravat P. Antonius Iulius.

AB illo lumine divino accendebatur in illo magnus Zelus animarum, qui profecto in illo fuit melioris notæ, & singulariter eum impellens, ut omnes nervos intenderet ad eas lucrandas. Si huic studio adhuc Sacerdos ita incumbibat; & concionabatur semper in vitia invehendo, summa libertate & ardore instar novi Eliæ, quemadmodum supra tetulimus, quanto amplius se exeruerit Spiritus qui in illo loquebatur, quando status Religiosus magis propriam illi fecerat libertatem Evangelicam: & si tantope-

re

removerit quando spiritus eum duxit in desertum Novitiatus, quanto alacrius eum impulerit, quando ex umbra fuit eductus in publicam lucem imbutus spiritu proprio Religionis, cui se consecraverat? Illud in quo se magis exercuit, & spectabilem præbuit fuit munus prædicandi; ministerium illi proprium ad quod à Tyrociniousque ad mortem à Superioribus fuit applicatus, tamquam functionem suæ vocationi apprimè congruentem. In concionibus ejus erat quidem videre vivacissimum talentum eloquentiæ naturalis, & acquisitæ, cum fluxu inter dicendum copioso, æstuante, vario, figurato, & robusto; elaborato ad regulas præceptorum meliorum, ac tali cum artificio, ut in naturam verterit, tantoque minus ostenderet studii, quanto plus habebat industriæ: sine fucis, sine affectatione, sine vanitate, sine illa levitate elegantiae quæsitæ, quam quidam flosculos vocant, & sunt puræ phrasæ, aut potius bracteæ pueriles; genus tamen dicendi erat ornatum, grave, majestatem ple-

num, & supra modum efficax, & appositum ad persuadendum, & movendum tali vi, quæ oblectando animos flecteret, quo vellet; sicut fecerat adhuc sæcularis, quando & in Conciliis Reipublicæ, & in congressibus cum Majestate Catholica, denique in Academiis, ubi dicebat exercitationis gratia, habebat nomen, quod dominaretur affectibus, perinde ac si laus hæc illi esset propria, & hac machina poliorhetica & victrice expugnaret animos adversariorum. Neque tantum valebat dexteritate in affectibus ducendis quo vellet, energiam etiam & vehementiam habebat in promptu, ad vim inferendam quando opus: etenim perorabat cum magno vigore animi, contentione vocis, ardore vultus, plenitudine, & frequentia quasi assultuum, unius post alterum, nullis datis induciis; neque enim desisteat donec extorsisset ab auditoribus signum, quod desiderabat. Quo modo dicendi mirabiliter assequutus est famam celeberrimi Oratoris, inter eos à quibus multorum annorum circumvolutione fuerat audi-

auditus. At ista tuba tam bene ex argento elaborata exportata ex Ægypto, quæ naturali suo clangore operata fuerat effectus tam miros, sed naturales; quando cœpit classicum canere ex mandato Dei, animata flatu sacerdotali, edidit multo mirabiliores supra naturam effectus haud secus quam si tot muri Hiericho essent deiiciendi, quot animas in vitiis obduratas ruere, & se subiicere Deo coegit. Contra eos omni laterum contentione animatus sancto Zelo insurgens: quia quando jam erat in suggestu antequam inchoaret, videbatur qualis revera erat, propter imbecillum suam valetudinem, debilis ita & caducus, ut nemo unus non judicasset, temerarium in illo esse exponere se ad dicendum in publico ad confertam multitudinem. Quod imprimis locum habuit quando aliquoties ordiebatur Quadragesimam recens à morbo, qui non ita multis ante diebus eum lecto affixerat. Mox autem ut pulpitem ascenderat, totus vigori pristino restituebatur, & loquebatur cum consueto majorique semper fervore,

& juvenili alacritate. Tractabat materias non solum sacras, morales & utiles, sed ut fortius & gratiosius influeret, vestiebat illas, & condiebat tanto sensu, & motu sui, atque auditorii, ut stupendum esset, qui posset habere, non dico affectum animi; sed vires ad tam arduum opus, quod socios nonnunquam sollicitos reddebat, & anxios, ne præ vehementia & cæstro dicendi collaberetur in cathedrâ. Ex iis unus qui illi per totam Quadragesimam serviebat, & stipabat euntem ad pulpitum, testatus est; visum illi miraculum, cum esset parcissimicibi, & plane sobrius, cernere eum concionantem tam ferventer & excitatè; perinde ac si robore corporis nulli cederet, & tanto cum spiritu & devotione, ut tantum non quotidie extorqueret lacrymas pluribus etiam invitis. Vnde in illa civitate acquisivit sibi nomen Apostoli & Præconis Apostolici; & in Episcopo dum habitaret tempore esurialium dierum, audiebat vir Sanctus. Conciones panegyricas, & solemnes non condiebat inventionibus juvenilibus,

&

& inutilibus ac vanis eloquentiæ prophanæ pigmentis, sed potissimam partem solidis argumentis implebat ad fructum & morum emendationem appositis.

Si modus & forma dicendi displicebat fortasse nonnullis, quos Apostolus vocat *prurientes auribus*, & *persuasibilibus humana sapientiæ verbis se oblectantes*: nihil dum movebatur, nec stylum dicendi mutabat ex metu minuendi ideo concursum Auditorum. Quando Romæ sacrum Oratorem agebat, nihil erat illi antiquius quam invehiri in vitia; nec ulla concio ab eo prodibat, quin ea perfringeret magno cum Zelo & impetu inflammatae mentis; nec ideo destitit etiam si id aliquibus accidebat grave & permolestum; atque adeo se subtrahebant, eo quod ulcus quo laborabant interius, nollent tangi: sed licet innotuisset inde auditorium minui, flocci pendebat, & prosequebatur constanter impetum spiritus ferventem, & utilem, quo impellebatur. Res rara, quam omnes Concionatores sibi proponunt, & facere se velle mag-

nifice pronuntiant; verum enim vero in aliquibus qui seduci se sinunt dulci illa cupiditate accommodandi se genio Auditorum ad alliciendum, desideratur nimis quam frequenter: sed nostro P. Antonio erat semper ferrum magistrale in manu, ad salubriter ferendum, & extrahendum, si non sanguinem, saltem lacrymas pretiosas. Raro videas tales successus in Concionatoribus, qui blandiuntur, & auram captant popularem. Abeunt ex eorum concionibus Auditores nec puncti, nec compuncti: at comperies quod plerumque qui evangelicè detonant, & mordent flagitiosos, concursu gaudeant. Quia experientia comprobatur, quod ejusmodi tonitrua etiam placeant iis, quos non percellunt: malunt quippe audire dicentem cum spiritu & fervore, quam assentantem. Non opus habuit P. Antonius Iulius magno studio, ut Deo offerret illud sacrificium, quo se privaret solatio auditorii frequentis, etenim hoc illi erat familiare, tanto plures habere præsentem, quanto utilius, ardentius, & Zelosius declamaret.

ret. Et si eveniret quod nonnemo se
doleret tactum ex altiori loco, ab illo,
inter dicendum; non offende batur,
nec male illi volebat, etiam si sensum
retineret; quoniam considerabat, quid-
cumque prolatum de se fuisset; non
prolatum ad lædendum, sed ad sanan-
dum. Ita concionatus est illis octo vel
novem annis, quibus post tyrocinium
vixit in Societate Romæ, Mediolani,
Genuæ, Taurini, & aliis nobilioribus
Italiae civitatibus, non minori semper
plausu, quam fructu, & concursu nu-
merosissimo; & in quibusdam locis
tam immenso, ut multis horis ante ini-
tium concionis, templa multum capa-
cia non caperent multitudinem Audi-
torum. In Quadragesima quam dixit
Mediolani; non solum habuit multitu-
dinem parem diebus solemnioribus; sed
præterea affluentiam incredibilem Ec-
clesiasticorum, Religiosorum omnium
Ordinum, & Nobilitatis. Quin & Ex-
cellentissimus Dominus Comes de
Fuenfaldaigne, per id tempus Guber-
nator Mediolanensis, intricatus gra-
vissimi ponderis negotiis, quæ deriva-
ban-

bantur ex Pace æque ac Bello, cui finis tum erat impositus; otium sibi faciebat ut concioni interesset: & seponendo etiam illa quæ per cursorem adferebantur ad suam Excellentiam; & aulica quæ tractabantur in palatio; veniebat omnibus prope diebus Quadregesimæ ad audiendum P. Brignole; atque adeo ut facilius se sisteret, & in silentio; veniebat sine apparatu, sine stipatoribus, sine pompa, vectus biga, cum significatione probatæ pietatis & utilis cupiditatis eum audiendi cum voluptate.

Non solum per Quadregesimæ tempus quod pietatis ferax est & ad illam favet conciliandam; sed etiam tempore Adventus, quando pluvix, & hyemis frigora incipiunt desævire; & in languoribus æstatis, quando Syrius ardet, aliisque quibusvis occasionibus concionandi, perpetuo fuit cupidissime auditus & expetitus. Æstate una qua Genuæ morabatur, die Veneris quodam *bonam mortem* fecit. Ita indigetant quædam exercitia devotionis, quæ diebus Veneris, aut alio die per heb-

hebdomadem commodo fiunt in honorem pretiosæ mortis Redemptoris; & ordinantur ad impetrandam à fidelibus felicem mortem, qui se illi congregationi inscribendos curant, & præscriptæ ejus observant. Obeuntur hæc magno cum emolumento spiritus in multis urbibus Italiæ; at in domo Professæ Genuensi nihil deest ad concursum populi æque ac affectum & decorum singulare. Illo anno tamen, quo ibi auditus est P. Antonius Iulius, fuit extraordinarius concursus populi, Nobilitatis, utriusque sexus virorum, ac mulierum, quibus cupiditas eum audiendi, tolerabilem faciebat æstum, paulo post prandium sumptum; & in istis magnis caloribus replebat templum. Patri autem non erat satis proponere simplex punctum ad meditandum de cruciati-
bus Christi, aut incertitudine & conditionibus mortis nostræ; verum animabat argumentis tam validis, & vi dicendi tam pathetica, ut universim fletus cieret, neque illos steriles sed fœcundos operum bonorum & stabilium conversionum. Similiter anno

1661. qui præcessit illum, quo ex hac vita migravit, in templo Sancti Fide-
lis Mediolani, ubi celebratur cum mag-
na Solemnitate & devotione novena in
honorem S. Francisci Xaverii; dum
quotidie vesperi Pater ibi dicendo se
exerceret, & impetum spiritus laxaret,
semper habuit templum refertissimum.
Vna autem vice auditus ab Illustrissi-
mo, nunc Eminentissimo Cardinali
S. R. E. Alphonso Litta Archiepisco-
po Mediolanensi; qui venerat sua spon-
te non invitatus, nisi famâ, quæ de eo
percrebuerat: ita influxit & lucratus
est benevolentiam istius amabilis Præ-
lati, ut quantocyus eum depoposcerit
addicendum per solemne jejunium in
sua Cathedrali; & fuerit opus solvere
eum promissis alibi factis, intuitu tam
magni Præfulis & vastissimæ illius Ba-
silicæ, cui solum præferendum est cœ-
lum, quod non nisi post mortem obti-
netur, Genuæ vero ubi sæpius concio-
natus est; quo diutius diceret, plus spi-
ritus in eo percipiebatur qui nunquam
languesceret, sed augeretur; quod
Auditores ei cumulabat, qui nunquam
fuere

fuere crebriores, quam quando mortuus est. Dignus profecto qui finiret vitam stans, sicut egregius Imperator inter victorias, in illo ipso labore, tanquam nobilissima, & sanctissima occupatione totius suæ vitæ.

Verum tamen fructus concionum ejus non consistebat in concursu sterili, sed sequebantur motus compunctionis, conversiones personarum fordescentium, & senescentium in vitiis, quas ex voragine illa potenter virtute spiritus sui extrahebat, mutationes vitæ admirabiles, eleemosynæ largiter erogatæ, & alii effectus notabiles Deo gloriosi. Prædicante eo per Quadagesimam Genuæ, Nobilis quidam occurrit duobus è nostris, qui ab eo quæsierunt, quam concionem eo mane habuisset P. Antonius Iulius? Quid ille, nequaquam parvus laudator, respondit? Supra omnem modum utilem, quam majore solito efficacia & entheo ardore hodie ad finem usque prosecutus est. Cogor hoc dicere, inquiebat, quia filius meus juvenis petulans, & in iram pronus, rediens è concione do-

domum, abdidit se in cubiculum; totus attonitus, & absorptus; noluit venire ad mensam, & cibum sumere; atque rogatus quid ei deesset? Non habuit aliud dicere, quam illa concio, illa concio tam insignis cor meum nimium quam pupugit. Neque toto hoc die prodiit è conclavi, nec ullum ad colloquium admittere voluit. Hujusmodi motuum constanter immobilium in animabus, quos organum hoc Spiritus sancti excitavit ad salutis semitam capeffendam, effectus perquam frequentes adduci possent, si particularis eorum memoria fuisset servata; sed copia fecit vulgares, ideoque minus sollicite in adversaria relati sunt fructus prodigiosi, quos gratiæ opitulatio cooperans facundiæ & spiritui, & exemplo vitæ religiosissimæ, quin & recordationi ejus quis fuerit in mundo, & quam generose eum aspernatus fuisset, produxit. Unde cum transfiret Bononiam rogatu nostrorum Patrum, quasi ex improvviso conscendit suggestum tribus festis Pentecostes, & repræsentavit, prout scribit unus ex illis,

lis, qui audivit dicentem; ad vivum, Beatum Patrem Franciscum Borgia, concurrente tota civitate, quasi diceret se venire magis ad contemplandum, quam audiendum virum notum omnibus, qui sola sua præsentia potentius quam eloquio persuaderet contemptum mundi: Confirmatur hoc ex eo, quod concionante eo Romæ cum fama eloquentiæ victricis animarum, quas Deo conciliabat, summus Pontifex Alexander VII. dixerit, se non mirari, quod fuerit tam omnipotens in aliorum vita mutanda, qui fuisset tam generosus in mutanda sua; & persuaderet despicere mundum, qui exemplo suo ei nuntium mittere docuisset.

Porro illa functio evangelizandi verbum Dei non constabat illi exiguo labore & molestia. Solus labor & tædium se parandi erant illi gravissima. Invenitur ab eo scriptum in hanc sententiam. *Iam accingo me ad agendum, vel ut melius dicam, vim mihi inferendam, ut me fatigem, sententiis quibusdam latinis memoria mandandis pro mea concione; quippe durante debilitate memoriæ*

ad imprimendum intellectui ad verbum res latinas, oporteret me non cogitare de quadragesimali dictione; totum enim tempus deberem huic vexæ impendere, ut nihil mihi amplius otii superesset. De hoc defectu memoriæ sæpe querebatur, & quamvis nonnulli putarent, dicere hoc illum ex humilitate, ad celandam suam felicitatem, quæ interdicens non poterat non apparere; ex eo tamen, quod per modum querentis, exponebat quid in hoc genere pateretur, iis, cum quibus fidenter conversabatur; fidem faciebat, quod cum haberet complexionem cui multum terrei erat admixtum, uteretur memoria utcumque difficili ad apprehendendum, licet fideli in proferendo. Præterea detentio illa quadraginta dierum esurialium, homini solito frui sua libertate, erat tædii tam intolerabilis, ut semel in una sua epistola diceret. Incipio paululum respirare in aëre libero, terribili vinculo quadragesimæ exsolutus. Iterum aliàs. Expertus sum auxilium efficax orationum, quas pro me fuderunt amici, quod potuerim cum sanitate nunquam interrupta, continuare totum illud

lud onus quadragesimale, quod vix potueram sperare, ob ordinariam meam debilitatem auctam per extraordinariam indispositionem, quam sentiebam immediate antequam telam ordire. Fateor tamen me perpeßum gravissima fastidia quæ vel meminisse molestum est. His & similibus formulis exponebat, quid pateretur ab istis tædiosis molestiis, certè non exiguis: etenim declarabat eas tali cum sensu, homo ceteroqui non facilis in manifestandis, ne dum exaggerandis suis passionibus, ut planum esset ex plenitudine cordis ea proferri. Accedebant alia incommoda defluxionum & infirmitatum contractarum ex labore concionandi, vel oratarum ex lucta quam subibat, ut superaret aversionem, qua affligebatur in se præparando. Semel contigit ut curaret catharrum, qui deciderat in linguam, & impediabat quo minus tam expedite loqueretur, ut putabat decere; & ne Auditoribus molestiam pareret, longæ curationi se commisit, & adhibuit remedia abstinentiæ, ciborumque abstergentium; donec videret non succedere, nec prodesse quidquid malo

abigendo adhiberet; imo gravius damnum sibi timeret à complexione alias sicca. Quam ob causam coactus fuit desistere. Quando concionatus fuit per Quadragesimam in insigni collegiata Ecclesia S. Michaelis, quæ Lucæ est, discessit tunc temporis Genua, tam male affecto corpore, ob intemperiem humorum, qua laborabat, & temperamentum dissipatum, ut præter alia accidentia haberet tibias inflatas & debilitatas, & præter cruciatum quem provocabant, vix pedibus consistere & gressum dirigere posset. Quapropter ubi Lucam venit, sicut Angelus Dei acceptus à Domino Decano S. Michaelis Prælato illi & Societati addictissimo: coactus fuit Medentibus se tradere, qui unanimiter censuerunt quod considerata mali occasione, complexione Patris, exiguis viribus, tempestate anni adversa, utpote frigida, quibus jungendi essent labores concionum, quas intra tres quatuorve dies deberet auspicari; temerarium foret si curandum eum sumerent, & niterentur impedire, quo minus malum, quod cum

cor-

corripuerat, non ingravesceret; atque adeo censuerunt in ea ætate & defatigatione, ut arte sua prorsus sibi restitueretur, sperari non posse: sed commodiorem curam suo tempore præciendam. At Pater quemadmodum ratione invaletudinis non fuit cohibitus, quin Lucam veniret, ita non est passus Zelum suum intelescere, nec animos deiecit metu mali augendi, verum non obstante denuntiatione Medicorum, licet spectatæ essent auctoritatis & peritiæ, statuit concionari; & auspicatus est, placuitque Deo ardens servi sui desiderium sibi gratificandi, etiam cum periculo suæ sanitatis; & concurrit tam provide, ut sine ulla potione purgativa, vel remedio; sine balnei tepidi usu ex aqua minerali, Pisa in eum finem evocata, & ei præscripta; Pater solum sibi propositam habens salutem spirituales proximorum, senserit assidue in melius proficere salutem suam corporalem: nec enim in fine concionum deprehendit amplius tumorem in tibiis malo omni profligato. Qui eventus habitus fuit si non miraculosus, admi-

nimum actus opis divinæ valde prodigiosus. Dicens ergo indies cum ea invaletudine, quæ toti civitati erat explorata, ascendebat pulpitem ita male affectus, & ex remediis tam pallidus, emaciatus, & exhaustus; & initium dabat concioni voce tam languida & debili, ut serviverit pro exordio valde pathetico, quia in auditoribus semper frequentissimis prodebat se teneritudo, compassio, & devota quædam commiseratio. In progressu tamen dictationis acquirebat pedetentim plus & plus alacritatis & fortitudinis, ut respiratio fieret illi tam valida, & se intenderit fervor pectoris, vocis, & affectus tam expeditus, ut qui erant semper præsentēs dixerint; eum quandoque videri potuisse, vomere ignem & flammæ, & spargere incendia; certe excessisse vires naturales hominis etiam bene robusti, nec suppetere modum explicandi, quos motus faceret in animis Auditorum, moesta illa & pia in principio compassio, superveniente stupore & terrore, quem concipiebant in progressu & fine concionis, ex tremen-

menda & efficaci peroratione qua in-
vehebatur in peccata : melius tamen
hoc comprobarunt opera quam verba:
siquidem ultra innumeras exomologe-
ses, quæ per totam civitatem institue-
bantur, quidam Societatis Sacerdos,
qui comitabatur P. Antonium Iulium
totodie, mane, & vespere, vidisse se,
ait, perpetuo obsessam sedem confes-
sionalem pœnitentibus. In fine autem
quadragessimæ, tantum in audiendis
confessionibus generalibus, etiam spe-
ctabilium personarum sæcularium æ-
que ac Ecclesiasticarum, occupabatur
quotidie usque ad tertiam vel quartam
horam noctis; sic metens fructus ad ma-
turitatem proventus falce Apostolicæ
prædicationis. Non deberent toleran-
tiæ exercitationibus, ad quas zelus
cum impellebat, accenseri viæ perdis-
ficiles, & arduæ superatu; utpote om-
nibus Concionatoribus communes, ni-
si illi triplicato labore stetissent, ob
continuum languorem & strictissimam
paupertatem, quam sibi in viaticum
assumpserat, quando iter faciebat, uti
postea dicetur. In hac serie posset me-

rito collocari assiduitas concionandi per totum annum, à qua non fuit possibile illum exonerare; quia tam avidè expetebatur ab Episcopis, & urbibus, quibus non poterat concedi quadragesima, oportebat eis satisfieri per adventum & æstatem. Et licet multi superiores considerantes, quod si posset per hyemem aut ad minimum æstatem desistere à concionando, in meliorem formam reducenda esset ejus non modo sanitas, sed etiam dicendi gratia magis perpolienda, viderentque per laborem nunquam interpolatum periculum creari, paucis tantum annis, ejus potiundi (ut deinde evenit) nisi eum ab assiduitate illa liberarent, & darent inducias justæ & necessariæ quietis. Neutiquam tamen induci potuit vel experientia propriæ debilitationis vel persuasionibus amicorum, ut suorum conatum fructibus fraudaret sive bonum publicum, sive Dei honorem. Nunquam sane sibi iners otium postulavit, sed semper prompte & alacriter se contulit quo mittebatur. Hanc ob rem aliqui non judicantes, hoc illi evenire

nire ex motivo robustæ, & lassari nesciæ virtutis; sibi persuadebant quod ad labores impelleretur irritatione quadam propensionis naturalis, illi usitatæ etiam in vita sæculari, quæ solet non parum id, quod per se arduum est & molestum temperare. Verumtamen ut fuerit olim illi proclive in sæculo se probare præstantem Oratorem; contra qui eum intime perspectum habueret in Religione, melius aliis callebant, honorem Dei & Zelum animarum non potuisse plane tollere asperitatem molestiarum & difficultatum quas patiebatur. Dixitque nonneminî confidenter: quod etsi fuisset certus, habiturum se præsentes, omnes Mundi Reges & principes inter Auditores: & relaturum omnem plausum imaginabilem; nihil eorum permoturum se fuisse, ad assumendum laborem, quem exhauriebat. Concionari se intuitu dumtaxat amoris Dei, qui solus posset digne remunerari. Iste amor Dei, & Zelus animarum tam insaturabilis, non solum eum provocabant ad concionandum toto anno, sed quando nancisci pote-

rat pascua copiosiora, quam essent ordinariæ conciones, illa sequutus, insidiabatur ad cumulum nunc huic, nunc illi escæ minori. Finitis igitur concionibus quadragesimæ, tempore tam modico Paschalis solemnitatis, necessario imprimis ad vires restaurandas; vel feriis autumnalibus, etiam si per æstatem non quievisset, non cessabat ab operibus charitatis in obsequium animarum, ad quæ Spiritus eum impellebat. Ibat adhortatum Monachos in Oratoriis, & eos quos in triremibus scurras inveniebat, libentius vero ac sæpius in hospitalibus, & carceribus ærumnosos, ut permoveret ad confessionem & succurreret animabus eorum pariter & corporibus. Uti de facto ejus intercessione à multis quibus pietas erat cordi, etiam fuerunt adjuti. Mediolani in hanc rem intentus, ut captivis solatio esset, cum in uno carcerum deprehendisset non esse facellum; unde miseri illi inclusi privabantur Sacrificio Missæ: ostendit se multum mirari; & tantum effecit rogando & exhortando, ut brevi tempore fuerit excitatum unum, cui

cui provisum fuit de celebrante. Efficacius adhuc huiusmodi operam impendit Genuæ, ubi certior factus in Lazareto quod vocant *foce di Bisagno*, quo multi pauperes confluxerant, etiamsi locus illis non esset destinatus, & à Magistratu Pauperum multi centum ibi sustentarentur templum deesse, quod in tanta animarum multitudine erat plusquam necessarium; Zelo illico succensus, cum esset adhuc in statu Sacerdotis sæcularis, statuit ibi facere concionem, quo, quamquam facile milliari diffitus esset à civitate locus, concurrerunt plurimi nobiles ad eum audiendum. Dixit tanta cum vehementia; ut excitaret præsentés ad conferenda subsidia istis miseris, in opus, quo maxime animabus consuleretur, & in præsentiarum in fabricam alicujus Ecclesiæ: ut de facto collecta fuerit summa pecuniaria tam notabilis, quæ sufficeret ad ædificium ædis desideratæ, licet non magnæ. Non stetit in hoc ejus desiderium: censebat illi quasi impossibile, ut tum propter distantiam loci à civitate, tum ob defectum aquæ,

aquæ, aliarumque rerum necessariarum, pauperes perpetuum isthic domicilium haberent. Quod tamen ardentius cupiebat videre stabilitum, cum quadam reformatione, quæ erat recentius introducta in temporalibus juxta ac spiritualibus. Erat istius opinionis quod eleemosynæ manuales, quæ dantur stipem petentibus mendicis, non essent tam utiles, nec pro animabus illorum, nec pro publico bono, nec pro ipsamet necessitate eorum corporali; quemadmodum sunt illæ quæ diriguntur ad negotium stabile, & vitæ ad bonum ordinem compositæ foundationem: ubi non solum boni mores & doctrina Christiana docentur, sed etiam artes & opificia, quorum ope, postea illo loco egredientes, honeste vitam possent sustentare. Qui modus juvandi pauperes, præterquam quod sententia fuerit aliquorum, eum ex præscripto divino usitatum fuisse in Republica Hebræorum, etiam ab Apostolis in primordiis Ecclesiæ nascentis fuit adhibitus. Quare Sixtus V. in constit. 57. *Quamvis infirma eundem sanc-*

vit

vit Romæ, ob rationes prægnantes & convincentes quæ probabant eum esse non solum utilem & congruum, sed etiam necessarium ut in ordinem vitæ Christianæ redigeretur illa colluvies, & fæx civitatis quæ nulli Parochiæ alligata, quia certum non habet domicilium, facillime se subtrahit omni correctioni superiorum; & præceptis abit in omnia vitia, & morum dissolutionem.

Itaque P. Antonius Iulius ut operam suam conferret in rem tanti momentum, pro animabus & gloria Dei, æstimatam & à se, & in aliis regionibus maxime in urbe Genuensi, multis è capitibus pro longe utilissima: loquebatur sæpenumero & privatim & publice in commendationem illius negotii, quin & fecit de industria integram in illum finem concionem, qua rationum pondere accedente movit, & plurimum animavit præcipuos cives ad aggrediendam & promovendam rem tantæ utilitatis, & ut exemplum daret manus liberalis, quam linguâ facundâ prædicabat; cum dedisset itaque Magistra-

gistratui pauperum quadraginta millia nummorum Florentinorum (de quibus dictum est superius) reservata sibi libera declaratione, in quæ opera pia deberent fructus tantæ summæ impendi; exposuit suam esse mentem applicandos erectioni fabricæ, quæ ad hunc finem splendide exstruebatur, extra portam Carbonariam, prope antiquos urbis muros, situ multo commodiore, quam haberet Lazaretum *della Foce* ad cogendos pauperes vagabundos, ibique alendos & coercendos. Ad quod opus accelerandum in testamento suo adiecit adhuc quatuor millia, & quod superat, scutorum Romanorum, sicut supra perhibuimus. Denique sub finem vitæ habuit hoc solatium, quod viderit se multum debere charitati, & diligentia Excellentissimi Domini Emmanuelis Brignole, dignissimi sui cognati, & munificæ pietatis imitatoris: voluit enim inter ultimos vitæ halitus eam afflare nonnullis aliis Dominis sibi propinquis & amicis. Ita Spiravit usque ad vitæ suæ clausulam Zelum animarum & charitatem erga proximos, etiam

etiam occupatus illis curis, quando cogitans de solo transitu suo in cœlestem patriam, seposuerat omnia alia negotia, & sollicitudines rerum terrenarum.

Cæterum huic operi misericordiæ, quod scopum sibi proponit subsidium animarum, non vacabat specie tenus, languidè inquam ac oscitanter, sed seriò, alacriter, & hilariter, præcipue si aliquem de domo concerneret. Videre enim fuit in quibusdam Collegiis, & domibus in quibus versabatur, plurimum illum resuscitare suo exemplo & conversatione, fervorem in procurandâ per diversa opera, Dei gloriâ: & multi qua Sacerdotes sæculares, qua nostri Patres proximorum auxilio destinati, fassi sunt se multoties deliberatos ad subtrahendum se alicui operi charitatis, vel laboris metu, vel quod viderentur sibi nimio onere prægravati, & sub occupationum multitudine fatiscentes dissuasos, animos resumpsisse ad perseverandum in sua Sancta functione; fervore invictò adhortationum Patris Antonii Iulii, cui confiden-
ter

ter aperuerant suas cogitationes sibi restituti. Familiare enim illi erat, eos compellere ut Deo fiderent, nec honoris ejus curam deponerent, sed vocationis suæ memores, satagere pergerent in eo opere non dimittendo. Genuæ adhibitus doctrinæ Christianæ explicandæ rudibus, & sordidis pueris; in plateis & compitis civitatis eos colligebat, & deducebat ad claustrum domus Professæ, ac ibi in rudimentis rerum animam spectantium, eos erudiebat tam amabili charitatis obsequio, longo temporis spatio, ut pueri illi quantumcumque impoliti, & petulantes, benevolentia tamen sui Magistri tam amabilis, catervatim à prandio sumpto ad eum currerent, & invicem invitarent ad eum quærendum, etiam neglecto prandio, ut fruerentur pabulo spirituali, & alimento quod noverat condire apposite ad eorum palatum, & tam sapidum reddere, ut appeterent etiam nauseabundi. Pari modo in domo Professæ Genuensi, etiam si ibi non versaretur nisi per modum transeuntis, aut ad concionandum;

voca-

vocatus nihilominus à Portario ad excipiendas confessiones in loquutorio, ibat confestim, nec unquam se excusabat prætextu cujuscumque impedi-
menti. Imo vero rogaverat portæ custodem, ut sibi neutiquam parceret, sed omni tempore interpellaret, in quo fuit subinde exauditus; accurrebat autem tanta promptitudine, ut evenerit illi non nunquam, quod opus illi esset interrompere, &, sæpius uno die iterum, officium inchoare. Maxime autem ferebatur in Confessiones pauperum audiendas, quod munus obibat, cum tanto affectu, ut multi eorum jam absoluti, dum abirent, quærerent ab Atrienfi: quis ille esset Pater? Dicerentque quod esset sanctus. Nec in illo dumtaxat; sed in aliis insuper locis, ubi ad breve tempus morabatur, aut ad populum dicebat,ungebatur libenter munere Confessarii, insigni cum fructu pœnitentium; versans per æstatem aliquando in Albaro, loco vicino Genuæ, ubi propter frequentem nobilitatem, quæ eo mensibus ob caloris flagrantiam æstuantibus,

bus, se recipit ad vicina civitati viridaria ut delicietur; qua de causa domus Professa, per id tempus habet ibi præsto aliquot e suis Patribus, per modum Missionis ad solita ministeria Societatis, cui semper hamus pendet; dum concionibus utilibus habendis ibi insudaret, non videbatur illi alimentum sufficiens igni voraci suæ charitatis, quo solo festis diebus pascebatur; sed in ipso illo loco dilatabat cor suum, & feriatis etiam diebus animis juvandis se strenue impendebat; excurrenteque ad vicinum fluvium Orientis, adiecit Missionem in Sancti Martini vico, quæ ipso adlaborante per exercitia devotionis multum emolumenti attulit populis illius districtus, & Nobilitati per illum tractum dispersæ & rusticanti. Impedivit diversa tripudia, & dissolutas ludorum petulantias; Tradidit doctrinam Christianam, tertio aut quarto per septimanam; separatim autem Hortulanis, & pedissequis, & adolescentibus sanguinis claritudine à fæce vulgi secretis. Ita in hoc opere charitatis consumebat dies &

& horas , quas æquum fuisset sibi sumere ad quietem. In itineribus quæ multa oportuit eum absorbere, habebat optatam occasionem socios , in quos per viam incidebat, in spiritu adjuvandi. Sæpe numero agens cum classariis, & nauticis hominibus, rhedariis, & aurigis, agazonibus, & mulionibus; cum cauponibus & eorum famulis in diversoriis, & cum omni conditione hominum derepente eos adoriebatur discursibus de rebus spiritualibus, omnibus annuntians verba salutis cum artificio gratæ affabilitatis, quæ se mirifice insinuabat, simul & efficacitatis, nullum medium omittens, aut opportunitatem, quam arbitrabatur idoneam ad instruendum, corripiendum, & ad morum emendationem impellendum; potissimum inculcans illis præcepta doctrinæ Christianæ, & exhortans ad peccatorum expiationem: atque hac industria extorsit ab omni genere hominum aliquot non poenitendas sed multum deprædicandas Confessiones. Et licet aliquoties in tempore & loco viderentur sermones

ejus intempestivi, non superledebat idcirco seminare semen verbi Dei *opportunè, importunè*, & Deus dabat incrementum, atque adspirabat desideriis tam ferventis Operarii, & omnia fortiebantur successum: uti factum est quando cum aliis sociis se contulerat in Carcerem Mediolanensem, ut miseris illis captivis, & quoad corpus, & quoad animam opitularetur. In egressu Præfectus carceris vir satis timoratae conscientiae, laudabat Patres quod in reducendis istis perditis ad frugem, officio suo perquam laudabiliter fungerentur. P. Antonius Iulius ignarus quam bonæ mentis esset homo ille, & forte ratus esse suo officio conformem, vertit se ad ipsum, & interpellavit hac interrogatione: Et tu bone vir quando redibis in viam? & prosequutus est admonitionem oppido severe hortans eum ut plus sollicitus esset de anima sua propria, quam de corporibus detentorum; magna cum admiratione Sodalium, & metu ne homo ille cæteroqui probus, & benevolus illis, qui veniebant, ut suis captivis bene facerent,

rent, maneret offensus. Ipse tamen reprehensionem cepit in bonam partem, & cum humilitate respondit : se venturum ad Patrem, apud quem bonam vellet instituere Confessionem. Pater autem certior factus de hominis integritate & fruge, mansit confusus, & de illa importuna reprehensione se ipsum corripuit. Profectus Genua Lucam, ut ibi Præconem Evangelicum ageret, coactus fuit Massæ tantisper subsistere, & ob intemperiem auræ, & ad instantiam Principum utriusque sexus, ibi commorantium, à quibus fuit magna cum significatione affectus perhonorificè habitus. Atqui ipse persuavit sibi se eo delatum, non in suum commodum; sed ut laboraret in bonum animarum. Erant illo tempore dies Bacchanaliorum, qui actutum fuerunt mutati in dies devotionis. Nam Domini illi in gratiam P. Antonii Iulii curarunt exponi solemniter venerabile Sacramentum, per orationem quadraginta horarum. Ubi ipsis assistentibus, & ingenti concursu populi affluente, licet ubertim plueret; Pa-

ter concionatus est singulari cum devotione sua , & Auditorum. Ita dies illi alias Cacodæmoni festi , traducti sunt sanctè ludis spiritualibus publicis, & privatis, in fundendis precibus, audiendo sacro, maxime Patris, qui fuit rogatus, ut diceret illud in Palatio, adistarum Excellentiarum consolationem. Atque ita, si ibidem fuerit aliqua recreatio, illa hausta est ex musica spirituali, composita ab ipsomet Principe ; qui cum sciret quantum Pater oblectaretur concentu ejusmodi harmonico, detinuit eum secum aliquot vesperis , ut frueretur illa dulcissima devotione. Similiter Mediolano se conferens Taurinum ad prædicandum Adventum , cum ob abundantiam aquarum quas offendit, traicere vetaretur, coactus fuit uno alterove die morari in aliquo territorio Navaresii, quod gerit nomen Burgi Vercellenfis. Hic ne esset tantisper otiosus, insiluit in eum spiritus Domini, & quo commemoratio illa esset non inutilis populo (quod deberet esse principium omnium hominum de Societate, ut deferrent

rent pacem & salutem in omnem domum, quam intrarent) statim convenit Parochum & persuasit ut boni confuleret, si cum ibi non haberet, quod ageret: bona ejus gratia posset per modum Missionis quadamtenus occupari. Pulsatae sunt campanae, concurrit populus, Pater incipit praedicare cum tanto fervore, ut cum dixisset per se sequi horam spuerit sanguinem. Omnes credebant rupisse eum sibi venam in pectore, sed Deus noluit tam caro illi stare lucrum illarum animarum, & cito sanatus est.

Demum patuit quam parvus illi visus fuerit Mundus ad ignem sui fervoris, quandoquidem ambiverit traicere Oceanum, ut ad orbem novum penetraret; inventus enim est calidissime commendare se orationibus P. Alexandri Fieschi, ut posset impetrare Missionem Indiae Occidentalis, & petere tamquam à suo Patre spirituali, qualis tum temporis erat, ut sibi inspiraretur: quid futurum esset è majori Dei servitio, & profectu spiritus? Permisit illi Pater, ut desiderium suum Superiori

manifestaret, quod fecit tam arden-
ter, & iteratis frequenter litteris ob-
secravit, ut admitteretur ad molestant
illam, & periculosam vineam, cui non
dubitabat ætatem suam jam declivem,
& vires suas jam attritas, & fatiscentes
consecrare. Semel percunctatus, cur
tam importune expeteret expeditio-
nem, ad quam antequam perveniret,
poterat probabiliter timere; quod pro-
pter senium, & debilitatem in longo
illo tractu Maris emetiendo, esset mor-
iturus? Respondit, aut ad abrum-
pendum sermonem; aut quod illud es-
set ejus judicium humile, simul & ar-
dens; *Prorsus hoc ipsum est meum deside-
rium, & ideo hoc appeto: ut possim car-
nem meam dare in escam piscibus maris, si
non sum dignus sanguinem dare pro Chri-
sto.* Videns dein suas preces non exau-
diri, ad minimum decrevit vitam suam
devovere operibus charitatis, cujus
specimen egregium dedit, quando
Deus flagello pestilentie civitatem
Genuensem, in qua versabatur, anno
1656. afflixit. Comparavit animum
suum ut in sua patria Indias reperiret,
obtu-

obtulitque generose Deo & Superioribus vitam suam in victimam, quam impenderet totam nobilissimo exercitio charitatis. Non obscurum fuit, quantopere in illo opere se promptum & alacrem exhiberet: etenim vix coeperat lues grassari, quando venit quodam die homo festinus expetens Confessarium pro altero, qui paulo prius correptus fuerat contagione. Cum casu esset in loquutorio P. Antonius Iulius, & audiret casum, quam mox sine dilatione cucurrit ad Superiorem, & prostratus in genua supplicavit, ut permetteret sibi illo opere charitatis perfungi, pollicens quod summæ gratiæ loco veniam illam esset semper habiturus, eo quod per illam nancisceretur oportunitatem optimam divinæ iustitiæ pro suis peccatis satisfaciendi. Noluit tamen eum Superior sciens & volens obiicere discrimini tam præsentis, sed potius subtrahere connisus est; altero usus, qui & subivit. Hinc illi dictum, quod necessitati aliter fuisset provisum, & quod Deo sola ejus voluntas accepta esset futura; cæterum quod

reservaretur aliis laboribus pro amore ejus subeundis. Vehementer doluit de repulsa : sed inde arripiens occasionem se humiliandi, dixit postea uni amico: Speraveram ista vice expurgare, & delere omnes meas culpas, per actum unum heroicum. Verum enim vero sunt tam immanes, ut præpediant me quo minus illis satisfaciam, oppetendo mortem ex charitate.

C A P V T VII.

*Charitas P. Antonii Iulii erga proximum
in rebus temporalibus.*

Charitati erga proximum, quod spectat bona animæ, ob affinitatem, congrue copulari potest Charitas erga Proximum in bonis corporis, & alterius modi obsequiis. Quemadmodum dum esset sæcularis, in eorum beneficium tam largiter profudit suas facultates, ita dum Religioni se dedisset damnavit se, ut personam suam illis devoveret; imitans illud Apostoli: *ego autem libentissime impendam & superimpendam*

dar ipse. Quantum huic virtuti exercendæ incubuerit, luce meridiana clarius patuit in occasionibus permultis, cum promptitudine perpetua, & amabili propensione, omnibus gratificandi, etiam cum incommodo suo. Apparebat in illo sensus quidam teneritudinis erga unumquemque, qui patiebatur, & facilitas quædam contracta ex longo usu afflictis succurrendi, ut videretur versa in naturam. Poterat merito dicere: *Ab infantia crevit mecum miseratio*. Cum transfiret Patavium, ut tenderet Genuam cum duobus aliis ex nostris Religiosis, venit primo mane Mulio, quem vettorinum in Italia vocant, cum jumentis, quibus infiderent. Pater traxit eum seorsum, & informari voluit; quod eorum esset deterri- mum. Illud sumpsit sibi, & sociis reliquit commodiora, eo quod essent debiliores, & parum valentes. Illa tamen virtus fuit ex illis una, quarum actus multos edidit, quamvis pauci fuerint observati: quia illi erant ei communes, & usitati: nihil enim illi solemnius, quam in itineribus & Collegiis, in ve-
stitū,

fitu, & cubiculis, & omni alia re, cal-
 liditate uti & industria, ut aliis optima
 quæque cederet. Quantum diversus ab
 illis miseris Religiosis tam abiecti cor-
 dis, ut excogitent astute media, qui-
 bus serviant suis sensualitatibus, &
 non sine nota inurbanitatis de optimis
 quibusque sibi præ reliquis prospiciant!
 non satis memores illius Regulæ, quam
 vellent erasam, monentis quod sibi
 persuadere debeant, quæ vilissima e-
 runt; ex iis quæ domi sunt, sibi tri-
 buenda ad maiorem sui abnegationem,
 & quæstum rerum pretiosiorum. P. au-
 tem Antonio Iulio alte infederat ani-
 mo, omnibus viribus conniti, ut non
 solum in victu & vestitu Religiosis sibi
 æqualibus, sed etiam famulis domesti-
 cis pejus haberetur. Hinc factum est,
 quod cum in Collegio Mediolanensi
 fregisset sibi tibiam Pistor vel furna-
 rius, sæcularis homo, qui morabatur
 nobiscum, & ministrabat in domo; Pa-
 ter adiverit illum, ut consolaretur in
 lecto decumbentem; quod officium
 charitatis moris habebat exercere erga
 omnes infirmos: inter verba sola le-
 nien-

nientia non stetit consolatio, sed reflectens ad culcitram, super qua jacebat, esse duram & male fartam: mota sunt viscera ejus ad compatiendum misello isti doloribus afflicto; & meditantundus, quomodo posset ejus incommodo subvenire, statim ivit quæsitum suam propriam, & nulli dicto vel verbo, occulte illi illam ipsam detulit, & aprè supposuit decumbenti, proponens sibi per noctem dormire in asseribus nudis: ea propter adjuraverat ægrum, & extorserat promissum, quod nemini mortalium revelaret. Sed *quis celaverit ignem, lumine qui semper proditur ipse suo.* Non potuit bonus homo à se obtinere, quamcumque vim sibi inferret, ut quod pollicitus fuerat, reticeret. Clam in aurem insusurravit cuidam fratri Coadjutori secretum; qui deinde abiens ad conclave Patris, eum ex improvviso deprehendit decumbentem in tabulis ligneis solum stragulis desuper coopertum, & illi de alia culcita prospexit.

Erga infirmos etiam sæculares, multoque magis nostros, charitas ejus erat in-

invicta, & insuperabilis. In eodem Collegio Mediolanensi diu periclitatus fuerat ex gravi morbo frater Thomas Thomatis juvenis non vulgaris probitatis, qui citra mortem malum illud tædiofum, magna cum patientia & alacritate jam diu tolerabat. Pater qui tum in illo Collegio repetebat Theologiam, non solum ægrotantem assidue invisebat, & consolabatur in sua afflictione; sed serviebat promptitudine indefessa, etiam nutus ejus præveniens, & faciens circa illum omnia perinde ac si fuisset Infirmarius, usque ad officia vilissima & fordidissima se abiiciens, quæ nauseam parere potuissent: adeo ut infirmus ipse stupefactus de tanta charitate, cum non posset ei persuadere, ut abstineret ab ista longa, & indubitata servitute; quo signo aliquo proderet sensum qui se invalerat, quod videret virum talem se ita dimittere ad serviendum, qui dignus erat cui potius serviretur; nec posset ut desiderabat pedes ejus osculari: adegit illum cum quadam specie protestationis, ut porrigeret sibi unam è crepidis suis, quam

quam arcte pectori appressit, & basia-
tus est. Ad quem actum plane inexpectatum Pater verecundia suffusus mire
erubuit; quamvis omnes infirmi po-
tuissent merito in similes demonstra-
tiones admirationis & reverentiæ pro-
rumpere, spectata ejus charitate, quæ
se erga omnes ita extendebat, non vi-
sitationibus in superficie blandis, non
ad distinendum illos inutilibus confa-
bulationibus: sed semper ex corde &
cum emolumento: scribendo pro illis
aliquid, prælegendo illis librum quem-
dam spirituales, & qua posset sapide
consolando: sicut fecit Taurini, ubi
inter studia concionum, & multa alia
impedimenta charitatis, quæ toto die
occurrebant in beneficium proximi;
non patiebatur se ita intricari, quin
quotidie ad minimum sibi seponeret
horam unam liberam, quam impen-
deret juvando & consolando fratrem
quemdam Coadjutorem, qui jacebat
ex morbo lecto affixus, toto prope eo
tempore quo Pater isthic mansit. Pau-
peribus adhæc sæcularibus & ægris ex-
pandebat brachia suæ dilectionis, &
mini-

ministrabat eis libenter; & sæpenumero in Nosocomiis, Tritemibus, & carceribus, non solum tempore tyrocinii sui; conformiter ad experimentum quod de suis alumniis sumere solet Societas, per ejusmodi exercitia charitatis, humilitatis, & abnegationis sui, ac victoriæ reportandæ à seipsis. At at ille & tum, & deinceps perpetuo, etiam exhaustus laboribus, & celeberrimus orator verbi divini reipsa dicendo distentus, à charitatis impulsu ferebatur ut ministerium verbi Dei condiret exemplis ministerii erga pauperes, & infirmos. Ita Cremonæ dicens per quadragesimale jejunium omnibus diebus Sabbathinis, in respirationem & quietem concessis Concionatoribus, moris illi erat se conferre ad Nosocomium: & hoc erat illi pro diverticulo & recreatione, quod posset refocillare pauperculos illos & misellos; exercens cum illis eam virtutem, quam in decursu septimanæ alios docebat. Actio merito observata, cum insigni ædificatione, à prudentibus & honoratis, quæ diu postea illorum memoria

moriæ inhæsit. Haud aliter se gessit Mediolani, Taurini, & alibi, dum prædicaret. Offerebat se illico ad servendum in Hospitalibus, ad confessiones excipiendas in ergastulis & carceribus; quo pergens aliquando in hunc finem cum uno Patre, cui Parmæ ea cura commissa erat, obviam habuit Serenissimam Ducissam Matrem: quæ voluit scire quis esset? & quo iret? Quod cum percepisset, hæsit perquam attonita, & admiratione defixa. Itaque ubicumque degeret excitabat & fovebat spiritum talium operum vere Sanctorum, non solum in Nostreis, verum etiam in sæcularibus, quin imo in personis auctoritate præstantibus, quæ permotæ ejus exemplo, etiam ipsæ, omni studio & affectu se impendebant. Non latuit hoc cives Taurinenses, qui viderunt eum non solum sine mora euntem ad Hospitale, conferre eleemosynas quibus infirmos reficeret, confessiones audire & ministrare singulari cum amore: sed etiam provocantem viros principes, & Matronas nobiles, ad amplectenda hæc exercitia pietatis, & libera-

ralitatem suam convertendam in recreationem illorum ærumnosorum, quibus ministrabant in persona. Verum enim vero ut erat *dux facti*: ita plus eminebat in vincenda generose naturâ, ad objecta prorsus intolerabilia, maximè personæ nobiliter & delicatè educatæ: in tali enim occasione Heroem se probavit uno mane, in vigilia Nativitatis Domini, dum ferviret in magno hospitali, quod celeberrimum est Mediolani. Hic posuit se circa senem ægrum, totum squallidum, immundum, & oblitum sordibus male olentibus; & postquam lectum ejus composuisset, assumpsit illum intra brachia, & reposuit, & osculatus est, & blande tractavit ad spatium temporis satis largum, tanto cum gaudio, & voluptate cordis, ut facile fuerit videre, quem ipse in illo infirmo cognosceret, & amaret, & cui officia sua deferret. Addo quam fideliter in praxim deduceret propositum, quod fecerat, dum adhuc in habitu Sacerdotis sæcularis fecerat exercitia spiritualia S. P. Ignatii, in quibus meditando de puerulo Ie-

su posito in præsepio, inflammari se sensit, & scripsit: *In præsepi volo servire Christo, componens fœnum lectuli sui: & hoc exequar ministrando in hospitalibus infirmis, magna cum charitate, & humilitate.* Tantum etenim se probavit occupando se circa illum infirmum, ut aliqui Iuvenes è nostris, qui erant illi socii in illa functione, ad solum hoc spectaculum senserint se accendi, ut pari cum lætitia & sensu pietatis munus illud charitatis obirent.

Cui porro non poterat servire in persona, eo quod vel ipsemet male valeret, vel absens esset; quacumque alia ratione conabatur prodesse. Inter sua bona proposita adnotaverat hanc pulchram reflexionem charitatis. *Semper satagere eorum, in quorum absentia contra illos sermones miscentur.* Eadem cautela charitatis erga absentes prospiciebat illorum necessitatibus, & licet non esset rogatus, opem illis præstabat. Perceperat quemdam Patrem ob calores quibus immodice æstuabat sentire sibi certis temporibus profutura quædam refrigerantia; & cum iudicaret sanita-

tem illius Patris utiliter impendendam ad gloriam Dei, prompte ea ipsi procuravit: nec enim solum illa vice, sed deinde quovis anno, stato tempore, memoriam ejus servans, etiam non sollicitatus evocabat Mediolano provisionem sufficientem, quam Genua submittebat. Inculcabat insuper cum terminis dulcissimæ charitatis, ut eo remedio non parcere uteretur, scribens illi, & petens, ut se certiores faceret, si quando posset in aliquo illi gratificari, vel prodesse; paratum se fore, idque cordate. In unis istarum litterarum ait: *Si ad confirmandam ejus valetudinem possit aliquid conferre, securum se eum reddere se facturum; quod si formidaret hoc sibi omnimoda libertate aperire, se graviter offensum iri, quod Amicus alteri vero Amico nequeat se, quod toto affectu cuperet, tribuere. Ita se affectum, ut si posset vel sanguine suo sanitati ejus consulere eum non gravate propinaret. Nec hic erat affectus peculiaris ex humana consideratione ortus, qualem quandoque experimur ratione patriæ, consanguinitatis, necessitudinis, aut sympathiæ*
natu-

naturalis, sed ex vera charitate divina originem ducebat; nec consistebat in verbis, & ceremoniis, sed opere & veritate se prodebat, exercita erga omne genus ærumnosorum. Atque hinc hanc ipsam charitatem huiusmodi refrigerationum, adhibebat etiam jam tum in Novitiatu Mediolanensi, ad juvenum illorum recenter Deo consecratorum conservandam sanitatem.

Multo libentius id postea faciebat, quando poterat se fraudare; uti fecit semel dum deberet iter facere. Datum illi erat munus saccari confecti: quid ille? è vestigio detulit dulciaria illa ad Superiorem, petiitque licentiam ut vendere posset, & pretium distribuere pauperibus in eleemosynam. Quod & factum. Contigit quod comperisset Mediolani carceri mancipatis apparari tenue prandium à Nostreis in Collegio, ut vel sic illa esca allicerentur ad devotionem. Dum ea cura distraherentur, intelligens quod solo pane, & juscule essent reficiendi: Charitas zelum Patris acuit, & dixit fratri cui erat commissio data istius refectionis curandæ,

debere pauperulis illis etiam vinum dari. Excusavit se ille ob defectum pecuniæ: verum Pater Antonius Iulius non acquievit; sed omnino voluit ut suo nomine iret ad Superiorem, & promissis illis peteret merum fundi. Annuuit Superior fidens charitati industriæ Patris, cujus vidit bene cito effectum. Quippe vix erat provisio delata ad carcerem, & ecce supervenit mandatum à persona pia cum sufficientibus nummis, ad emendum vinum, carnem, & quidquid esset obsonii congruum ad honestam refectiorem in vinculis detentorum. Alia vice cognovit illos carceres scatere innumeris captivis: cum enim ea tempestate Ducatus Mediolanensis arderet Bello, omnes Franci, qui in prælio manus hostiles evadere non potuerant, erant in illos compacti; & propter copiosam multitudinem multifariam patiebantur; in tantum, ut tabescerent sub illo modico stramine, quod illis subministratum erat ad dormiendum; essentque in summa penuria omnium quæ vitam sustentant. Tacta sunt commiser-

feratione viscera Patris ad hoc nuntium, & schedula missa tantopere excitavit charitatem Domini Emmanuelis Brignole, qui opportune tum erat Mediolani: ut sine ulla cunctatione ille cum nummis & hominibus subsidiariis & fratre Societatis, qui ei id denuntiaverat magnaque cum humilitate & affectu applicabat se tali operi; contulerit se ad carcerem, curaverit mundari & expurgari ergastula, prospexerit de novis paleis, succurrerit squalidis, varia stipe, & duobus gravissime laborantibus prospexerit de Sacerdote, qui Sacramenta administraret morituris; nimirum in tempore, siquidem sequenti nocte expirarunt. In hunc modum P. Antonius Iulius, qua per se, qua per alios semper fuit sollicitus Procurator indigentium.

Quod si fortasse non nemini videatur, nimis minutas has esse probationes suæ hujus magnæ charitatis, & hinc conficiat deesse alias insigniores: hunc velim apud animum suum reputare, quod sit singularis effectus tenerimæ charitatis, esse etiam sollicitum

in rebus minimis, enimvero in illo laudem hoc meretur & obtinet maximæ. In his porro & aliis studiis charitatis, non volebat ab hominibus cognosci: sed si quis ei hæc accepta ferret, & gratias ageret, videbatur prodere quid indignationis; sibi autem applaudebat, si titulo compensationis, daretur occasio exercendi actum alicujus alterius virtutis. Cum Romæ versaretur, venit eò Mediolano P. Ioannes Maria Olgiati, qui non ita pridem Profectus est in Indiam Occidentalem. Tum juvenis adhuc sæcularis, qui studuerat in nostris Scholis Convictor Collegii Helvetici, quod est Mediolani, & ambiebat ingressum in Societatem. Etiam si Patri Antonio Iulio esset prorsus ignotus, quia tamen ab uno Patre erat illi commendatus; amplexus est illum magna charitate, servivit illi cum omni sedulitate, insinuavit illum in gratiam variorum Patrum, deduxit eum ad Novitium, & mille benevolentiae signa ostendit. Post tres annos, alibi in eum incidens, cum de beneficiis ab eo acceptis juvenis gratiam apud suum pat-

tro-

tronum memoriam refricaret : habuit se quasi eorum ignarum; nec alicujus rei recordari : solumque expetiit, ut sui in precibus ne oblivisceretur. Atqui quantum ipse recusabat sibi gratias referri, tanto gratiorem se probabat erga alios pro minimo officio, quod illi præstabatur: testatus hoc est inter alios quidam Pater, qui Florentiæ ei dederat nescio quid ad usum itineris; postea, inquit, tanta grati animi significatione & verbis & per litteras, hoc beneficium prosequutus est, ut me rubore suffunderet.

Si verum hoc est, quod solet dici, amorem naturalem descendere; non minus vi charitatis descendendo P. Antonius Iulius visus est rejuvenescere, & quasi sanctè repuerascere, aut, ut melius dicam, similis fieri Apostolo qui noverat *lac dare parvulis in Christo*. Anno 1658 fuit missus ad villam suburbana[m] Collegii Mediolanensis tempore vacationum Autumnalium, tum ad levamen suum, tum ad solatium Nostrorum qui erant omnes satis juvenes, & biennium studiorum impleverant; in

quo loco & tempore noverat illis mirifice se accommodare; atque una satisfacere suæ devotioni, multis horis vacando orationi, atque Sancto illo exercitio nemora illa & sylvas Deo consecrando, sicut superius narravimus; neque hoc oberat quo minus Charitati erga illos juvenes locum daret, & religiose ad hilaritatem suo statui consentaneam provocaret. Aliquos docebat Musicam, quam ipse probe callebat, & licet ea delectaretur, nunquam cæteroqui visus erat se cantu recreare. Ibi non solum contentus erat eos audire inter psallendum à concentu deviare, sed ipse quoque dulciter & patienter melos suum adiciebat. Vespere deinde intererat ipsorum confabulationibus, quæ solent ipsis indulgeri post coenam, quibus pauci Patres ex antiquioribus se subinde socios jungere non dubitabant; eratque objectum non parvæ ædificationis cernere, quod homo quinquagenarius & cæteroqui totus serius, atque solitudinis amans, & in se collectus; in medium proferret nunc unum, nunc alterum curiositatis junc-

jucundæ argumentum, facetum & argutum, & summa cum facilitate subiret istam pœnitentiam, demittendo se ad istos lepores, & innocentes jocos, qui ex vitio illorum juvenum ab eo exigebantur; ipso solo modeste totam recreationem ad vitam & hilaritatem animante. Virtus parum grata iis, qui ponunt in eo omne momentum Religiosæ perfectionis, si habeant arcum semper tensum; adeoque illi ideo postea fuit suspecta, ut alibi dicitur. Sed in illo fuit tanto majori admiratione digna, quanto magis haberet animum aliis cogitationibus, & sensibus devotionis, quos totis diebusolvebat, oppido refertum. Quia diversis ab hac horis, quando juvenus illa aliis diverticulis se distrahebat; ordinarie se subducebat, vel ambulabat solus, secum habitans, internæ vocationi intentus, & aliquid pii meditans. Hinc conficio: quod si ejus conversatio eum successum habuerit; quid dicendum de illa Religiosorum perfectorum, sancta juxta & amœna, & nihilominus omnibus summe

me desiderata & accepta? Atqui quid mirum quod vir iste charitate æstuans se accommodaverit & contraxerit coram parvulis suis fratribus, ut sua dilectione, quæ non inflabatur, eos accenderet; si non fuerit dedignatus idem præstare cum scurrilibus pueris, triobolaribus & rusticis, fæce hominum? non solum, ut eos erudiret in rebus ad salutem animæ spectantibus, sicut supra dixisse me memini? Certe fuit observatum, quod aliquoties per urbem incedens occurreret alicui civis filio squallido in vultu, & qui secundum faciem præ se ferret morbum, eum aggressus fuerit gratiose, & magna cum affabilitate interrogaverit, quid mali haberet? exploraverit arteriam, tentaverit pulsum, suggererit aliquod remedium opportunum, procuraverit quampiam eleemosynam, aut subsidium. Et in his *super omnia vultus accedebant boni*. Totum peragebat modis suavissimis, eaque benevolentiae significatione, qualem propriis filiis exhibuisset.

C A P V T V I I I .

*Humilitas P. Antonii Iulii communiter
ab eo usitata.*

ET ecce sicut virtus præstantior est, cui manum adiutricem porrexit Dei gratia, ita charitas libenter Humilitatem habet sibi comitem & conjunctam. Nec immerito, quoniam videbatur permoveri ad similitudinem parvitatæ, & vilitatis propriæ, quam ipse sibi animo non fictè impresserat; vere factus ex se ipso parvulus Evangelicus, de quo dixit cuidam bono Sacerdoti sæculari, cui erat perquam fidenter familiaris, cum ostenderet se mirari Patrem sibi signa honoris deferre, dareque manum dextram omni conditioni hominum; quantumvis vilium, quin imo pueris egestate pressis. E vestigio enim respondit: *Nisi efficiamini sicut parvuli non intrabitis in regnum cælorum.* Quodque ipse multum contrahi deberet, si id vellet intrare. Ita ipse apposite. Et vero humilitas fuit
vir-

virtus ipsi tam propria, ut palmam obtineret super omnes ejus alias operationes, easque transcenderet; licet in illis quæ aliam virtutem concernerent, niteretur continuo ad distinctionem radium humilitatis intermiscere. Illâ universa sua opera & affectus, & habitus, corpus suum, & vultum imbuerat; in quibus omnibus spirabat semper modestissimum sui contemptum, & humillimum sensum; cum esset vir tantis & tam eximiis talentis ornatus, fortunæ, naturæ, & gratiæ, & prorsus admirabilis virtutis, spectatæ simul, & amatæ. Et revera erat ipse venustissimum lumen omnium, qui dotium numero cum illo in comparisonem venire potuissent.

In sæculo cæperat, ut dictum, exercere se in ista virtute, sed mundo egrediens dedit singularia indicia, quod secum eam portasset omnino radicatum, quam huc usque in alieno solo aluisset; sed volebat transplantare in terram bonam, & optimam, ubi fructum centesimum proferret. Atque ita paulo antequam se Religioni traderet, cum adhuc

huc esset Sacerdos sæcularis, & vacaret exercitiis spiritualibus in Novitiatu Genuensi, præter multas humiliaciones quas faciebat; uno mane induit vestem ex tela subrufa, quam subinde assumunt Novitii ex mortificatione, & Fratres Coadjutores in servilibus functionibus operum gravioris laboris; & cum illa posuit se pronum in terram in ingressu portæ, qua triclinium subitur, ad similitudinem cadaveris; unde factum, quod omnes accedentes ad mensam, per illum transirent, tamquam rem nihili, & dignam pedibus calcantium proteri. Cum omnes intraissent, & composuissent se ad accumbendum; erexit se in pedes ipse, & ingressus abiecit se in genua in medio cænaculi; dixit suam culpam, non minori sensu aliorum, quam suo, de suis multis & grandibus erratis in genere; & in particulari de libris à se compositis scatentibus vanitate noxia, & contraria modestiæ Christianæ; deque scandalo per ipsos orbi dato: & poenitentia comedit in medio refectorii ad parvam mensam, præparatam ad assi-

assidendum nostris Fratribus in pœnam,
vel ex devotione; & instructam frustis
panis obsoleti, ut inter nos moris. Non
permisit mutari quidquam, nec ut pa-
nis recens, & integer apponeretur, sed
illis pastus est fragmentis, & solis edu-
liis communibus se refecit. Cui scenæ
humilitatis licet voluerit interesse om-
nes nostros Religiosos Novitiatus, &
insuper suum generum D. Alexandrum
Iustiniani; potuit tamen censi actio
privata intuitu ejus, quam in detesta-
tionem illorum leviculorum & nimis
petulantium, ac effrenatorum ingenii
partuum publice fecerat; de qua jam
ante meminimus; & non destitit ali-
quanto post tempore deinde facere,
concionando coram frequentissimo
auditorio, & retractando suam illam
libertatem sæcularem; deprecando ve-
niam de malo & pernicioso exemplo à
se dato, & damno spirituali lectoribus
illato; obtestando omnes, ut quotquot
ex illis opusculis quidquam penes se
haberent, ea vel lacerarent, vel con-
cremarent; ad quod obligabat quan-
tum poterat cunctos in conscientia;
num-

numquam denique finem faciendo dolendi & damnandi, & accusandi seipsum eo ex capite, usque eò, ut in prima quadragesima, quam Religiosus dixit Genuæ; non veritus fuerit pronuntiare, quod satius comparere debuisset in theatro, quod nomen gerit Sancti Dominici, ad ejurandam suam nequitiam & perversitatem, quam stare in pulpito Ecclesiastico ad prædicandam Sanctitatem.

Porro ut revertamur ad ejus Novitiatum, in illo, utpote palestra & schola humilitatis, progressus est assiduè se perficiendo continuis exercitiis humiliationis; in quibus tantum profecit, ut teste suo Magistro Instructore omnium esset tyronum humillimus. Non ostendit umquam difficultatem in aliquo genere functionum servilium, & sordidarum; in verrendo, lavando, serviendo in culina, in mortificationibus publicis: etenim non contentus ire aliquoties mendicatum per civitatem, sicut alii, iis in vicis quò ordinariè mittuntur: importune institit ut liceret sibi ire cum mantica in humeris

petendæ stipis gratia ad publicam porticum Albari, locum in quem magna pars Nobilitatis Genuensis convenire solet ad conversationem; sicut etiam ad genio indulgendum post prandium sumptum, concedit in villas circumjacentes, quarum deliciis pro more habet, per æstatem, interpolare, & lenire civilium negotiorum molestias & labores. Eò etiam non erubuit pergere, & invenit ibi non paucos è suis propinquis & amicis, forte cum majori illorum mortificatione quam sua. Non quæsit umquam intuitu suæ ætatis eximi à rebus certis, quæ Novitiis juvenibus communes sunt. Ibat cum illis in processione ad civitatem, & quando habebatur concio in nostra Ecclesia, & illi sedebant demissè in gradibus Altaris majoris; jungebat se in eorum ferie, & sedebat infimus, homo id ætatis, & sæpe sæpius visus in civili gubernatione spectabilis, & è sacro suggestu avidissime auditus. Insignis æmulator S. P. Ignatii, cujus Sanctitatem cepit Deus manifestare Barcinone, quando in concione inter pueros sedebat

bat in infimo gradu Altaris. Si in P. Antonio Iulio non apparuerint radii visibiles caput coronantes: nihilominus sedens inter illos juvenes Novitios Novitius, tam maturus, spirabat ex humillimo vultu aspectum tam devotum, & bene observatum, ac in admirationem rapientem unumquemque, qui eum noverat; ut omnium oculi essent in eum coniecti, tamquam in obiectum miraculi singularis. Iam dubium oritur, & quæri potest utrum humilitas major sit quæ publico exposita est an exercita in occulto? Utcumque hoc se habeat: certum est humilitatem, qua P. Antonius Iulius pollebat, in utramque partem se probasse. Videns Magister ejus tam expeditum ad omnia officia humilitatis, statuit eum tentare repulsâ, & humiliare, vituperando. & reprobando ejus humiliationes. Præcepit quidem ut serviret coquo, consuetum Novitiis humilitatis experimentum: sed unâ coquo dat in mandatis, ut de illo tam provecto tyrone, periculum faciat humilitatis non usitatum. Vadit ergo Pater ad mini-

sterium sibi impositum, & offert se Fratri ad obsequium: Hic ille ad primum conspectum finxit se mirari, & recusavit illum admittere; dicens, se stupere nec capere posse, quod Superiores, à quibus expectaverat juvenem habilem, fortem & expeditum ad juvandum, mittant sibi senem inutilem, qui nesciat quid faciat, nec sibi in re quapiam usui esse possit. Nequaquam se turbavit Pater ad casum hunc inopinatum, tantummodo studuit eum placare inquiens: operam se daturum, ut idoneum se præstet, ad omne id, quod volet imperare. Verumtamen alter tanto magis præ se tulit ægro se animo ferre, mitti ad se senem morosum & molestum, magis factum ad labores suos impediendos, & intricandos, quam sublevandos. Scena erat bene apparsa, & actores exquisite partes suas agebant. Unus in petendo ut admitteretur ad probationem, alter in reiiciendo, & in exhibendo tantum non Herculem furem, aut implacabilem Iovem. Durum Patri merito videbatur, non tam quod inutilis haberetur ab eo,

eo, qui se Confessario utebatur; at quod minimum non experiretur, quid & quantum subsidii & opis adferre posset? Dirempta tandem lis, tantum dixit, tantum sollicitavit, tot precibus supplicavit, ut Frater ostenderit se cedere, qua supplicationibus, qua necessitati obediendi: & imposuit illi nescio quam rem futilem faciendam; ad quam Pater impigrè se tanto nisu applicavit, quanto umquam in functione Magistratus se commenda verat, ut aptiorem se modo probaret ad serviendum, quam tum ad imperandum. Desideravit deinde scire Pater ille Magister Novitiorum, quem motum fecisset in animo P. Antonii Iulii inexpectata illa acceptio; &prehendit non alium fuisse in eo sensum molestiæ, nisi quod verè sibi persuaserit multum sibi deesse, quo par esset ad opitulandum Coquo. Atqui desiderio ardens proficiendi rogavit obnixe, ut in ista probatione sibi liceret aliquanto adhuc tempore perseverare. In quo cum exauditus esset, itabat quotidie ad culinam; eam ingressus illico prosternebat

se in genua ante imaginem Beatæ Virginis Deiparæ, ac recitabat Salutationem Angelicam, offerens illi suum illud opus quod ibi auspicaturus erat, & petens gratiam perfectæ id implendi. Ac dein surgens quærebat à Coquo in quo operam suam collocari vellet? Qui secundum instructionem datam à Superiore, jubebat laboriosum quid aggredi, cui è vestigio se impendebat; vix orso præcipiebat ut desisteret; & Pater ipso facto desistebat: mandabat ut aliquid nullius momenti sibi fumeret perficiendum, & Pater se totum illi applicabat. Dictum illi fuit, ut festucam jacentem in medio culinæ tolleret; confestim se demisit in genua, ut eam elevaret. Aliquando asperè & ruditer in suo opere reprehendebat, ut strenue mortificaret, exprobrans illi quod esset homo nihili; & quod eum ejecturus esset è culina tanquam fungum: & Pater pro ut frater ille narravit, cum rubore in facie, & capite demisso, sine ulla commotione, aut signo perturbationis, sicut homo *non audiens & non habens in ore suo redargutio-*

tionem, prosequeretur cum omni ac-
curatione imperata: & quando frater
absolverat sua impropria, ante illum
poplites flectebat, ut sibi condonari
flagitaret, semper retinens vultum tam
compositum, & serenum, ut proderet
humillimam devotionem, qua in tali-
bus circumstantiis operi incumbēbat.
Oportebat eum bene profecisse, quan-
do nolebat æstimari actiones virtutum,
nedum in splendore dignitatum, & in
frequentia theatrorum, in quibus fue-
rat spectabilis; sed etiam abditus in an-
gulo neglecto, expositus oculis solius
Dei, contentus esse spectaculum illis;
placere divinæ suæ Majestati, qui pre-
tium virtutis tam præclaræ cerneret,
& ponderaret, in eo qui fuerat non ita
pridem pro Senatore honoratus, & in
aulis Monarcharum pro prudentissimo
Oratore in veneratione habitus: hunc
inquam eo devenisse ut revereretur
correctiones unius Coci, crederet se in-
eptum ad ei serviendum, vim sibi infer-
ret ad se habilitandum, quo vel medio-
crem successum in eo ministerio tam
abiecto assequeretur: numquid profe-

Et o humilitas fuit stupenda? non solum id facere intra se, & recipere ab aliis omne genus humiliationis; sed insuper eo attigisse, ut haberet de se opinionem & iudicium vilitatis, & despicientiæ, adeoque reputaret se non solum pro peccatore, & damnaret ob vitam, quam aiebat se in sæculo perversam duxisse, reprehenderetque multum præterea defectus, in quos inadvertenter incurrebat in Religione, quamvis levissimos: sed quod magis ponderandum est propter raritatem, sibi certo persuaderet, se esse parvi iudicii hominem, æque inter concionandum (ut postea meminero referre) quam in omni alia operatione, in quibus profitebatur sibi deesse prudentiam & moderationem? Hanc temeritatem declarabat multoties modo dicendi plane familiari, sine affectatione, & simili dicenti verum; etiam dum Sacerdotem sæcularem ageret. Quibus si addidero actiones ab eo editas illo tempore contemptus sui & mundi; sapientiæ humanæ videbuntur exorbitantiæ & stultiæ; illis tamen assequutus est, quod
cu-

cupiebat, quia ad eum altissimæ sapientiæ Christianæ gradum pertigit, quem Regulæ Societatis præscribunt: videlicet ut velit haberi pro homine iudicii indigo, & æstimari fatuus à nonnullis, qui intime non penetrant ejus medullam, in verbis & actionibus sistentes. Certe uni è Societate evenit, qui cum alterius Ordinis Religioso erat in itinere, ut inter confabulandum mentio incideret de P. Antonio Iulio. Hic de eo loquebatur tam abjecte, ut ostenderet se eum arbitrari hominem exigui cerebri, & adderet erroneo conceptu falsiorem probationem, asserens: Patrem olim petiisse admitti in suum Ordinem, sed quod sui Patres judicantes eum volatilis & instabilis mentis, remisissent candidatum ad illos, qui eum procarentur. Haud tamen dubium quin mundo patefecerit, neminem esse profundioris sapientiæ, quam illi qui dicunt *nos stulti propter Christum*. Ex hac impressione quam alte imbiberat se esse vitiosum, & indigere alterius directione, consilio, & correctione, oriebatur in eo

sincerissimum desiderium & cupiditas, ut à quolibet admoneretur, & instrueretur. Quam hoc manifestum sit, conficere facile est ex eo, quod cum in Collegio Mediolanensi, syllabum suorum defectuum, quos notaverat, tradidisset, ut de iis publice in Refectorio corriperetur, pro introductione præfixerit hæc verba: *Cum non sint defectus infrascripti, nisi minima & levissima pars meorum errorum, propterea quod cæcitas amoris proprii, qua laboro, passa non est me plura cognoscere, obtestor per viscera misericordiae Domini Dei nostri, quemlibet ex Patribus, & quemlibet ex Fratribus, ut vel publice vel privatim mihi (prout satius judicaverint) indicent omnes alios meos defectus, quos habeo; aut cognitos per se, aut intellectos ab aliis; etenim non sumam hoc in malam partem, sed summi beneficii loco habebo. Conscientiam uniuscujusque compello, quàm possum, ad hoc officium mihi præstandum; ut inde pateat sincerus ardor meæ voluntatis. Neque dumtaxat in ista publica protestatione ab omnibus, sed à quocumque poterat, accipiebat grato animo charitatem*
ea.

earum admonitionum, & pro viribus urgebat, ut sibi impenderentur. Patri cuidam sibi amico scripsit in hæc verba. *Suæ charitati det impetum, ut mihi suggerat, quando ad me scribit, aliquod lumen salutare in ordine ad meam emendationem, & profectum in Spiritu: quia quantumvis in libris multa inveniam, non crederes quanto maiorem efficaciam habeant in me, tractus manus, quos exarat amicus verus, vivus, & domesticus.* Quia tamen sunt aliqui qui petunt errorum suorum commonefieri, & dicunt hoc sibi placitum: at quando monentur, sentiunt & perturbantur. Indicio manifesto quod ista petitio sit velamentum tacitum vane spei, quod inde magis sint laudandi, quam arguendi: aut oriatur ex quodam desiderio corrigendi suas labes languidè, & ad speciem tantum. Nemo opinetur hac fuligine aspersum fuisse P. Antonium Iulium, ejus postulationes fuerunt sinceræ, deliberatæ, & fundatæ in credulitate, habere se defectus multos occultos. Quod videre erat dum reprehenderetur, de culpis quibusdam etiam inad-

ver-

vertenter commissis ; ex gaudio quo perfundebatur , & professione singularis erga monentem obligationis. Cum scriptum illi esset ab amico nescio quo, respondit, ut sequitur ; *O quam mihi cara fuit Epistola R. V. Visa fuit stillare nectar & ambrosiam ut poetice loquar : quia inde conficio , quam cordato affectu erga me utatur : siquidem quod nomine libertatis , sed revera sincerissima Amicitiae fiducia me moneat , quam gratum mihi fuerit , difficile est exprimere. Attulit mihi sane lumen tam efficax , tam clarum , tam suave , ut multa perturbationes , quarum agitatione imperfectum meum & pusillum , licet nullius ponderis essent , ita in anima meo fuit quassatum , & in diversa distractum , ut ad tranquillitatem redire nequiverit. Loquar candidè : verba tua mihi sapuerunt , & fuerunt signum liquidissima charitatis. Magis liquide hoc admonitionis sibi faciendæ desiderium exposuit ex occasione , quod discedenti Mediolano , non nemo eum certiore fecerat , observari in illo , nescio quem vel gestum vel actum in sacro dicendo minus decorum , ortum fortasse ex devotione*
ne

ne plus animosa, quam bene ordinata: verum cum esset hoc dictum in genere, & quasi per transennam, Pater quidam quicum illi magna intercedebat consuetudo, censuit disertius hoc illi explanandum, maxime quando illi celebrandum esset foris extra Ecclesiam nostram, quo, ad concionandum, erat illi eundum. Per epistolam ergo illum monere non est veritus; cui P. Antonius Iulius rescripsit. *Etsi Epistola R. V. sit responsoria ad meas, nihilominus quia continet gemmam pro me tam pretiosam, adauctum me video ut cordatissimas gratias agam. P. Rector insinuavit mihi quid simile, sed obscure, & per modum figurata loquutionis; habuerit sine dubio debitam opinionem exiguae meae virtutis, & fortasse timuit, ne sensum incuteret; ideoque servavit mihi patinis, ut vulgo dicitur coopertis. Sed R. V. Pater mi amantissime noverat non esse ita; adeoque si ad quoslibet defectus quos in me animadverterit, me corripuerit; profitebor me obstrictissimum, nec ullum amicum habere in mundo fideliorum R. V. quacumque demum via, sibi innotuerit quidpiam, quod iudicet posse conducere*

ducere ad utilitatem spiritualem misella anima mea , utcumque acerbum accidere possit sensualitati meæ , quaeso te , ne me celaveris. Tantopere desiderium cognoscendi suas imperfectiones , eum stimulabat.

Cæterum quando vel alterius reprehensione , vel propria reflexione , recordabatur , aut etiam sibi videbatur se deliquisse , nunquam fuit auditus nævos suos velare , aut prætexere *excusationes in peccatis* , quod tamen omnibus naturale est : sed contra illud vitium erat optime præmunitus , valido proposito notato inter primæ notæ , quæ cordi sumpserat ; hisce verbis. *Numquam me excusare , & illud notare , & ex amore IESU mei observare.* Unde monstrabat summam tristitiam de quolibet defectu , in quem lapsus fuisset , & profunde se ad illum humiliabat. Accidit dum exerceretur in Novitiatu , discurrens illum paulo vehementius in communi cum aliis colloquio , quod recreationis vocant ; post paucas horas P. Rector casu illi occurrens , ei dixit : P. Antoni Iuli , habes sonoram vocem.

Subodoratus est statim quo illud monitum spectaret, & provolutus in genua dixit: Pater, sum, fateor, inconcinnus & absurdus. Responsum profecto egregiæ humilitatis & per se, & ob personæ conditionem, & ob casum inopinatum. Videbitur nihilominus fortasse res parvi momenti, eo quod inter Religiosos hoc sit familiare, præsertim in Novitiatu. Igitur majoris erunt ponderis, alia indicia humilitatis, in quibus semper magis ac magis proficiebat. Fuit quando diceret, se non potuisse frui recreatione in Villa, ob poenitudinem verbi, quod imprudenter sibi exciderat; & arbitrabatur ejusmodi, ut posset alteri umbram displicentiæ adferre. Cum per inadvertentiam aliquantum adussisset linteum quodpiam in Collegio Mediolanensi: detulit ad Fratrem qui lineæ suppellectilis curam habebat, & ante illum prostratus in genua, culpam suam agnovit, & postulavit ut se fustigaret, dicebat enim se verbera mereri.

Romæ absolutis Quadragesimæ concionibus abiecit se ad pedes Fratris, qui
fue-

fuerat eum comitatus; precatus est veniam malæ suæ ædificationis, quam aiebat multitudine defectuum se illi dedisse; nec voluit se erigere, antequam Frater diceret se illi ignoscere. Genuæ cum ex domo Professa festo B. Aloyfii Gonzagæ ivisset ad Collegium, fuit usque ad occasum solis detentus ab illis Patribus, qui ejus religiosa conversatione rapiebantur. Dumque illi eum deducerent abeuntem usque ad portam Collegii, invenit ibi Coadjutorem sibi socium, qui vel ex tædio, quod tam diu eum præstolari debuisset, vel ob festinum opus, quod domi faciendum habebat sivit, se ^{im-}patientia abripi, ex sensu tam longæ expectationis, verbis satis acerbis & mordacibus compellans eum indiscretum. Quid ad hæc Pater? Ne minimum quidem se turbavit hæc audiens in præsentia aliorum obiici à sibi inferiore; sed agnoscens se culpabilem, Frater, inquit, da mihi hanc gratiam ut condones mihi hanc indiscretionem: neque hæc fatus est ut carperet ironica confessione erroris exprobrati: sed demonstratione seriæ

seriæ consuetudinis, & benevolæ humilitatis, impigre exercens documentum illud Sapientis: *Quanto magnus es, humilia te in omnibus, & coram Deo invenies gratiam.* Non solum Deo reddidit se amabilem P. Antonius se humiliando, sed etiam hominibus, coram quibus quanto plus se dimittebat, tanto pluris eum aestimabant, & cum admiratione virtutes ejus deprædicabant: quemadmodum contigit in uno Fratre Domus Professæ Mediolanensis, dum Pater isthic concionibus esset occupatus. Visebat infirmum & animadvertit in quodam genere edulii non optime illi provisum, secundum necessitatem, & morem charitatis Religiosæ: ut erat teneri affectus erga morbis afflictos, non potuit se cohibere, quin in egressu cubiculi obvius advenienti Infirmario diceret precatoriis verbis; studere niteretur obire suum officium ea diligentia, quam requiret charitas, & meritum quod apud Deum assequi posset. Hæc amica denuntiatio, per id tempus cecidit in terram non multum comparatam ut faceret

N

ret

ret fructum. Unde Patri ita respondit, ut ostenderet sibi parum gratam hanc suam sollicitudinem, & ingressus cubiculum ægroti, erupit in quandam excandescentiam dicens: non incumbere Patri eum admonere. Parum illum scire quantum habeat operæ unus Infirmarius. Eum assuetum fuisse in sæculo pro sua commoditate servire; & cum vix venisset ad religionem adhuc tyro, Zelum sibi sumere ad stimulandum eos ad opus, qui tota vita laborassent. Interea Pater contulerat se ad cubiculum suum, quod contiguum erat ipsi infirmi valetudinario, adeo ut ex uno in aliud esset transitus per simplex ostium, quod tunc erat occlusum; proinde illa & alia, quæ à Fratre illo sonora satis voce erant prolata, perceptu facilia erant Patri, & potuissent alteri parere indignationem: verum ille ita fuit compunctus, ut in se redeunti visum fuerit, Fratrem querendi justam habere rationem, seque male fecisse eum conturbando. Egressus ergo cubiculo præstolatus est in ambulacro, foras ab ægro prodeuntem, quem

quem ubi præsto habuit in loco illo propatulo, flexis genibus rogavit, condonari sibi culpam, quod molestus ei fuisset: & addidit merito illum dixisse se senem inutilem venisse ad religionem: id enim esse verissimum, uti & carere discretione, & compassione erga alios: imperitum quoque se loqui ut oportet. Oraret Deum pro se. Frater erubuit ad illum actum, nec habuit quod responderet, sed iussit surgere & abire, scitè eruditus tam singulari & salutari documento. Concionatoris partes agens in domo Professæ Mediolanensi, ordinarie dicebat sacrum non pro commodo suo, sed templi; & ad beneplacitum Aeditui. Quodam mane, quo pro invaletudine debebat sumere nescio quam medicinam, petiit celebrare aliquanto citius; Sacrista autem voluit diceret serius, quod fortasse ita ordinem aliarum missarum difficulter posset immutare: Pater cum omni modestia ei dixit: quæso te compatere magis misello Concionatori; atque hoc dicto abiit: sed paulo post reflectens ad illam exilem speciem impatientiæ, &

existimans se verbis illis deliquisse; quasi saperent vel jactantiam, vel iram; rediit in Sacristiam & genuflexus ante Sacristanum, petiit veniam de renitentia in obediendo, precatusque est sui nullam haberet rationem, nec plus sibi deferret quam bestię, qualem ajebat se esse. Quin imo non voluit se levare prius, quam Sacristanus ostenderet sibi factum satis. Preclara sunt hæc humiliationis specimina; sed magis mirandum, & fortasse non imitabile, quod eo narratum; & exhibuit personæ prorsus abiectæ. Veniebat Pater Româ ut iret Senam ad concionandum per ætatem, & ob virium debilitatem ab obedientia jussus erat deferri leſica. Mulio partim ob malignitatem viæ, partim ob incultos mores, quibus id genus rude hominum assuevit, ad singula momenta excandescibat, & emovebat iram, nunc Deum blasphemans, nunc Patrem diris devovens; quem, ut dicebat, experiretur suorum incommodorum parcum æstimatorem; utpote cujus causâ tantum laboris & molestiarum exhauriret. Ali-

quanto

quanto temporis spatio id tulerat Pater, & nequidquam corripuerat: cum tandem ex aliquo ardore dixit. Quæ hæc impudentia? si alio modo me gestare renuas in aliam lecticam me recipiam, nec deinceps opera tua utar. Hæc dixerat, nec amplius: at vix verba hæc siverat elabi ex ore, mansuetus ille David percussit pectus suum: ob tam levem acrimoniam, usitatam non contra regium paludamentum, sed contra petulantiam tam sordidi, & contemptibilis hominis, statuit se castigare; paulo postquam diversorium subiwerant, vadit eum quæsitum, invenit garrientem inter suæ sortis scurras, abiicit se ad ejus pedes, vult eos osculari, petit sibi ignosci, quod importune, inquiebat, eum arguisset, quando compati debuisset. Quo stupore illius gentis inconditæ, facinus hoc insolitum acceptum fuerit, non attinet dicere. Mulio mutatus in alium virum postea se emendavit, paruit ad omnia, quæ Pater voluit, & eum in omni veneratione habuit: cumque Senam advenisset, accessit ad Collegium,

& quæsit, quis esset iste Pater Sanctus? atque ibi, nec non reversus Romam, retulit Nostris memorabile illud exemplum humilitatis.

Non minor fortasse fuit modestia, qua tulit aliam mortificationem tanto majorem, quanto digniores erant personæ, in quarum præsentia eam passus est. Cum deberet approbari ad audiendas Confessiones, Examinatores tractarunt eum rigidius, quam mens Prælati ferebat. Pater moleste non tulit; sed aliis dolentibus & compatientibus respondit: illos laudabiliter functos officio, sibi que gratiam fecisse, usque erga se urbanitate; interrogasse enim ad minimum decem casus diversos, se autem facile in quinque errasse. Proinde in rigore non debuisse illum censi dignum, qui confessionibus audiendis adhiberetur; ad quas tamen admiserant se cum plena approbatione. Præterea cum in examine quæstiones proposuissent Latine, & ipse per inadvertentiam respondendo in vulgari lingua eos aliquantum offendisset. Dixerunt: responde *Latine*.
Sta-

Statim paruit, & quod vernaculo sermone usus fuisset excusavit, causatus non in advententiam, sed quod senex ingressus Religionem non multum latinitatis sibi comparare potuisset; licet reapse, excusationem everterit: perrexit enim expedite Latine respondere, etiam cum elegantia. Ita gaudebat haberi ignorans, coercendo illum à se tam formidatum appetitum ostentandi se litteratum.

Dum esset Novitius, & legeret ad mensam, sæpenumero de industria errores committebat. Dissimulanter pronuntiabat syllabas natura sua longas, ut breves; & contra: & quandoque legebat periodos tam indistincte, ut videretur non capere sensum. Adhæc in publicis concionibus crebro fatebatur tenuitatem, & lapsus memoriæ suæ parum habilis: idque modo dicendi tam sincero, ut credibile videretur. Multo magis privatim id affectabat: agens enim cum externis sæcularibus, nunquam dabat specimen doctrinæ, ea se poltere, aut quandoque excelluisse, quasi nunquam libros versasset, aut

calamos tractasset. Amabat præ se ferre quamdam ignorantiam, ut videretur subinde idiota, qui imperitus esset omnium, nec sciret aliquid vel litterarum, vel Mundi, vel perfectionis; imo quandoque ne quatuor quidem verba proferre: quod correxerunt in eo nonnulli Superiores, quando desiderabant, ut quidam viri nobiles ex ejus commercio evaderent Deo & virtuti addicti. Præcipiebant, ut ageret cum illis tam dextrè, quam posset: tum enimvero faciebat id tanta cum gratia, ut animos lucraretur cunctorum. Sicuti fecit nominatim cum Domino Marchione Paulo Torriano, qui fuit Heros magnarum partium, capacitatis, auctoritatis, & ingenii in fastigiis honorum sæcularium: sed multo magis spectatus ob generositatem, qua Deo donavit in Societate filium suum unicum, in quo familiæ spes definebat. Eò privatus omnibus omne solatium suum collocavit in consuetudine & necessitudine contrahenda & conservanda cum nostris Religiosis, quorum commercio mirifice delectabatur.

Desi.

Desideravit is sibi copiam fieri colloquendi cum P. Antonio Iulio sibi de fama noto. Qui cum in primo congressu, cum assumpta illa siccitate illum accepisset, non respondit Marchionis expectationi : sed postea præventus Superioris præmonitione, conversatus est cum illo tam ingeniose, solerter, & sapidè, ut illum summe sibi & Deo conciliaverit, cum notabili profectu in virtute, illius boni Domini, quicum deinde magnum commercium, amicitiae exercuit & præsens, & absens, ut videre fuit in amica mentione, quam Pater in variis suis litteris de illo facit. Eundem successum habuit cum Excellentissimo Domino Marchione de Pianezza exploratore magnarum virtutum, non solum ob doctrinam, prudentiam, sagacitatem, & mentis præstantiam omnibus perspicuam, & in pretio habitam apud Duces Sabaudiae; sed etiam ob exercitacionem virtutum magis heroicarum in tali viro principe prorsus admirabilium. In hujus benevolentiam tentavit se insinuare P. Antonius Iulius, cum larva

hujus apparentis simplicitatis, quod humanissimum nobilem non terruit. Agente illo singulari cum humanitate & confidentia, Pater mutua officia reddidit, unde tam arctum amicitiae vinculum ex spiritualium rerum reciproca inter illos dissertatione, inter eos coaluit, ut Marchio illud perpetuum esse voluerit, & Pater vicissim frequentissimis, & affectuosissimis litteris semper aluerit.

Sed resumamus sensa P. Antonii Iulii in materia humilitatis. Non erat illi satis reprehendi, quin imo ambiebat reprehendi de culpa, ubi culpa non erat. Proprietas, quam Divus Gregorius tribuit animabus selectis: Atqui supergrediens istos terminos, inveniebat quod reprehenderetur etiam in rebus, ex quibus laudem merebatur. Supra spectatum est, quanta humilitate simul ac charitate se accommodaret in vacationibus, ad religiosas recreationes Juvenum Scholasticorum condiendas, vitam illis addens suis facetiis & leporibus dignis admiratione, cum communi omnium ædificatione. Nihilomi-

nus

nus in actione tantæ virtutis, quam Græci εὐτραπείαν vocant, invenit quod displiceret, & in se reprehenderet. Nam in charta, quam postea dedit ut publice corripereetur, posuit hæc verba: *Dedi malum exemplum, & turpe scandalum modo meo agendi, maxime in recreationibus vacationum, in quibus sectatus sum vanam, insulsam, vilem, & indignam complacentiam in exhilaranda communitate, & monstrando me dextrum, & peritum in ea oblectanda. Sunt demissiones, quas commisi nimie levitatis, indecentes personæ provecta, religiosa, & Sacerdoti. Supplico omnibus qui interfuerunt ut condonent mihi defectum malæ edificationis, & caveant sedulo me umquam imitari in malis exemplis quæ ex me scaturientia, toto animo aversor & detestor. Quis non dixisset auditis his verbis, eum multum exorbitasse contra decorum religiosi status? & tamen secundum sententiam optimorum religiosorum, quotquot fuerant præsentibus à modestia probati, erant actiones laude & commendatione dignissimæ; & quas appellabat levitates indecentes, poterant*

rant aliquæ ex illis cenleri, argutiæ ingenii, concionum simulachra, exercitia linguarum, & similes actiones alienissimæ ab omni indecentia, & prorsus licitæ ad finem moderatæ relaxationis, usitatæ à viris Sanctis; & in eo non condonandæ, ut ipse volebat, quasi mali exempli; sed admirationem meritæ instar actuum consultissimæ & decentissimæ charitatis. Dici tamen non potest, utrum illi non fuerit suspecta sua intentio, aut perinde ac Iob timuerit omnia opera sua, & voluerit uti suo timore, & eorum credulitate, qui non adfuerant, ut posset sibi acquirere notam imprudentiæ, & fructum humiliationis. Unde merebatur in illo particulariter id argui, cum vituperio illo ironico, quo quidam Provincialis Lusitaniæ prædicabat laudes P. Hieronymi Natalis, dicens: eum esse magnum murmuratorem, quia semper de se ipso mala proferebat, eo usque, ut obligari videretur ad suæ restitutionem famæ. Et merito, si quidem vitia, quæ sibi affricabat, poterant apud eum, qui virum non nosset, mul-

multum illum infamare, & vituperabilem reddere. Non tantum poterat P. Antonius obstringi sibi ad restitutionem famæ, sed etiam honoris, tot erant nomina probrosa vituperii, quibus se deturpabat; nominabat se peripsema, bestiam, jumentum mortuum, & foetidum, & his pejora, quæ hic non exprimuntur, quia veretur calamus prodere excessus humilis linguæ, non usurpatos ex cæremonia spiritali, aut affectatione, sed suggestos ex affectu illo, quo mens & cor plena erant, ut nihil ingenii inventionibus relinqueretur.

Quadam vice exiens petitem eleemosynas cum mantica mendicatoria in humero, una cum socio Novitio oppidò juvene, oneratus furfuribus, dixit per jocum comiti: Tibi ut comptiori datæ sunt merces elegantiores; mihi, qui sum animal brutum, dederunt quod in me quadrabat, eleemosynam ex furfuribus. Subinde solebat se indigetare ferrum vilissimum, sed cupidum semel totum candescere, igne amoris divini: conceptus, qui potest illi condonari, quia

quia revera hoc illi evenit : hausto enim semel illo Sancto igne in corde ejus, materia forti & constante, formatum est vas omnium virtutum consummatissimum.

Quando jam eo sagacitatis devenerat, ut discernere posset, an defectus sui morales haberent propius aliquam speciem virtutis ; incepit indagare an nihil vitii naturalis sibi adhæreret, cujus intuitu vituperio exponi posset? Ex natura non erat tam politus & accuratus in rebus suis extimis : res proclivis iis, qui multum intra se occupantur. Unde partim ex innata propensione, partim quia erat assuetus curam earum rerum relinquere illi, qui sibi serviebat; apparebat non ita nitidus, & compositus in suo cubiculo, vestitu, & similibus, quæ in usu sunt quotidiano. De hac incuria sæpe audiebatur se accusare publice, & privatim verbis, quæ proderent magnum hujus imperfectionis sensum, quasi in eo magna culpa lateret; donec tandem ex lumine cælitus illapso, coepit habere quandam cupiditatem apparendi vilis & defectuosus: facta

facta enim reflexione, dubium illi subiit, an qui videbantur in se defectus, essent actus virtutis. Atque ideo verrere cubiculum, efferre sordes, & ejusmodi alias atque alias actiones assumere, quæ habentur viles; differebat facere in tempus, quo cerneretur à nostris & sæcularibus. Alias faciebat quæ videbantur paulum diversæ ab usu communi: Benedicebat quandoque mensæ legendo in suo diurnali, portabat in sinu clepsydram arenariam, quando publice concionandum illi erat in Ecclesia; metiebatur ad illam in conspectu omnium suas preces & actiones. Gestabat secum libros visibiles, & volumina manuscripta in templum, & alia loca exposita; ut se occuparet interim non inutiliter, quo expectandum erat. Hæc & similia actitabat, quæ non nullis videri possent quidpiam singularitatis sapere: & suusus iis abstinere, parum admodum se emendavit. Cave tamen hoc vitio vertas, & tribuas incuriæ, quasi flocci faceret aliena consilia, aut monita, quæ tantopere ambiebat, & æstimabat; vel languori voluntatis in se

se emendando : cum in emendatione aliarum rerum fuerit generosissimus & summè deliberatus : vel inadvententiæ, ut quidam opinabantur, quia fuit deprehensus in se advertere, & notare res minimas observantiæ, & studiose in ea intendere, quæ videbantur ei casu excidere : superest ergo ut dicatur illud, quod quidam postliminio sapienter judicarunt, ultra exercitium aliarum virtutum, quibus velificabantur tales actiones, pullulasse hæc ex occulta radice summi affectus erga humilitatem, & ex cupiditate videndi se annihilatum & redargutum : quæ quando alte est in corde Sanctorum plantata, semper parit actiones, quæ primo aspectu habent quid reprehensibile & singulare.

Verum enim vero quantum quærebat reprehendi & carpi, tantum semper adnitebatur alios laudare, & bene loqui de iis cum affectu, & signis sinceræ lætitiæ, procul ab omni fictione & simulatione. Atque ita ex pretio, in quo aliquos habebat, excurrerat in tantas eorum laudes ; ut, nisi provenis-

sent

sent ex sinceritate cordis vere humilis, potuissent videri excessus blandientis immodicè adulationis: equidem contigit eum non formidasse nominare in pulpito, cum insigni commendatione personas quidem laude dignas, attamen adhuc viventes. Si quisquam ederet quodpiam indicium ingenii, talenti, aut probitatis, quod alteri non videbatur nisi vulgare, & ordinarium: Ejus judicio erat tanto illustrius, quanto ipse de se præ aliis abiectius sentiebat. Hinc fuit aliquoties auditus multum deprædicasse res in aliis non animadversas, aut laudari insuetas. Nec solum encomia stem se faciebat aliorum ex proprio sensu, sed alia industria utebatur humilitatis simul & charitatis. Si persentisceret, quod quandoque bene loquebatur coram quopiam, cui non optime conveniebat cum persona laudata: significabat prudenter in quam bona opinione esset apud alium, eo utens artificio, ad majorem inter illos duos affectum conciliandum dilectionis, & conjunctionis: & ut demonstraret, quanti

ambos faceret. Hoc exercitium cordi habebat in primis, quo semper esset in opere edomandi tantopere ab eo formidatam & continenter oppugnatam, demumque debellatam passionem desiderii, quo concupisceret in quapiam re præcellere aliis, & dignus præconio videri.

Nec solum verbis, sed insuper in omni modo operandi, & conversandi, volebat videri, qualem se judicabat; id est postremum omnium; quia agebat cum unoquoque, etsi ætate & conditione illo inferior esset, summo cum respectu & veneratione, perinde ac si illi deberet primas deferre. Neque tantum cedebat locum omnibus, eo se habendi modo, ut appareret esse reverentiam non cæremoniam: sed sibi præripiebat semper deterrimum & ultimum, cum certa quadam animi libertate, quasi hoc absolutè ita fieri oporteret; etiam in casu, quo peregrè adveniens hospes esset, aut Concionator. Idque moris habebat facere tanta cum resolutione, ut vix reperiretur quispiam, quamvis inferior, qui aude-

auderet cum illo contendere. Quod si quandoque illi obveniret contentio ex conflictu humilitatis, quæ unicè est laudabilis inter Religiosos; non fatiscibat animo, nec deserebat, quantum posset, suam defensionem. Ita gratiosa fuit concertatio, quæ illi evenit Alexandriæ, quando illâc transibat, ut pergeret ultima vice Genuam, cum Patre, qui eum comitabatur per viam; à quo cum non potuisset obtinere, ut occuparet primum locum lecticæ, qua Superiores ob debilitatem, qua laborabat mittendum putarant; cogitavit sibi prævalendum interventu maioris auctoritatis, & prius quam atrio excederet, traxit P. Rectorem seorsim, quasi haberet quid gravioris momenti in aurem ei infusurandum, & omnibus ingenii sui viribus usus est, ut litem suam evinceret, adductis mille rationibus, & precibus, ut præciperet Socio Patri, ex intuitu quod esset se senior professione Religionis, federet in loco honoratiori. Negotiatio hæc non fuit tam occulta, quin in vultu se proderet, & ex modo agendi

demisso circumstantibus, quibus hoc probatum fuit; & socio, si non ob aliam causam, saltem ob charitatis meritum imperatum est, ut obsequeretur, ne cum afflictione P. Antonius Iulius iter ingrederetur. Ita consolatus in viam se dedit. In hac, & in omni alia occasione, visus est assidue se gerere, tanta cum submissione, & contractione, quantam posset præferre pauper & inops mendicabulum, in domum de gratia admissum. Semper monstrabat in moribus & vestibus, tam modestum & humile de se iudicium, quam poterat, in gestibus & compositione corporis atque in modo agendi; adeo ut qui eum sibi familiarem habuissent in sæculari vita, vix eum cognoscerent, & in summam tantæ mutationis admirationem raperentur. Hoc usu venit Excellentissimo Domino Comiti Galeatio Trotti, Præfecto militiæ generali suæ Majestatis Catholicæ, in statu Mediolanensi, cui Pater probe notus fuerat, & ex usu, & consuetudine probatus, quando fungebatur officio Legati Reipublicæ in aula Hispa-

panica. Cum essent ambo Alexandriae in patria Comitum, consultum censuit Superior, ut eum Pater honoris gratia iret salutatum. Ivit, & prudens ille Princeps contemplatus tam humilem, modestum & cum aspectu tam diverso ab antiquo, totum compositum, & spirantem auram vitæ prorsus religiosæ, (ut retulit Pater, qui erat illi socius) postquam illum benigne accepisset, iussissetque sedere, totus in tenebritudinem abiit, & ex motu intimo lacrymas continere non potuit, ac dixit; quod ei sanctam illam sortem sanctè invideret. Ita comparuit non vilis ut ambiverat, sed pretiosus, & venerabilis ob ornamentum non affectatæ, at sinceræ humilitatis.

C A P V T IX.

Humilitas P. Antonii Iulii exercita in munere concionandi.

VIta religiosa P. Antonii Iulii fuit quasi tota impensa Ministerio Evangelicæ prædicationis. Etenim ex-

tractus è Novitiatu sub finem primi anni, missus fuit ad Collegium Mediolanense, ad repetendam privatim Theologiam sub directione cujusdam Professoris, qui illi materias distribuebat; ne illi deesset solidus apparatus doctrinæ, quo erat opus habiturus ad docendum populum; cui muneri erat à Superioribus destinatus, & à pluribus jam tum expectatus, ob præclara ornamenta naturæ & gratiæ, quibus erat à Deo copiose locupletatus. Interea ne esset diu otiosus, maxime in ætate 48. annorum, non est permixsus longo tempore in illa occupatione hærare: confestim absolutis necessariis studiis, quæ propter capacitatem, & velocitatem ingenii, exiguo tempore durarunt; nec non examine peracto ad professionem, in quo judicatus fuit sapere supra mediocritatem, & excellenti doctrina pollere; stabiliter applicitus fuit dicendi muneri, & cepit continuo concionari, quamvis tenuiter ad hoc comparatus; neque enim umquam omisit, vel interrupit hoc opus, usque dum median-

tibus

tibus istis Apostolicis laboribus, gloriosum finem consequutus est. Positus ergo in gradu tam sublimi Oratoris Evangelici, in quo animæ languidæ & leviculæ sinunt se evanescere, & incipiunt se respicere: Pater Antonius Iulius ostendit quam firmo valeret capite, & in humilitate solidato, ut opere pretium me facturum existimem, specimina virtutis hujus in isto ministerio data, quia sunt valde singularia, conjunctim hic recensere.

De suis concionibus humillimè sentiebat: & nihilominus, si videretur fructus, quem in aliis faciebat, & audiretur plausus Auditorum, qui sequebatur: dixisses hominum nullum ita loquutum. Ipse solus instar Pauli recenter conversi *apertis oculis nihil videbat*, & quod amplius *apertis auribus nihil audiebat*, procul remotus imo contrarius illis, qui omnibus tacentibus, ipsi soli sentiunt & vident sua decora, quamquam à nullis aliis percepta. Dum diceret in quadragesima, plane alienus fuit ab omni invidia quod alii majori gauderent auditorio; quod procura-

rent per Dominos , & amicos , & commendationes concursum , quod gloriantur de multitudine qua ipse carebat. Totum hoc non probabat , nec volebat ut alii pro illo , vel de illo loquerentur. Atque ita finita concione , sive secedebat ad cubiculum ut aliquantum quiesceret , sive ascendebat ad fastigium domus , ut in loco aliquo separato deambularer ; & subtraheret se congratulationibus tum , & semper illi importunis. Si non potuisset se subducere , & non nemo intraret , ut loqueretur de sua concione , eamque extolleret : ostendebat sibi displicere , & vel silebat , aut dextrè discursum divertebat , aut apertè alium longe diversum introducebat. Exemplo hoc stabilio. Non poterat declinare laudes , quas non nemo ex Patribus cumulabat , de una concione , quam non ita pridem habuerat Mediolani. Initio tacuit aliquanto tempore : sed cum non cessaret dicere , aliis placitum , sibi odiosum acroama : vertit se ad alium ibi præsentem & ex abrupto illi dixit. Ibi ne brevi Genuam ? non credo quod ibi me ita belle videbis depictum. Qua
inter

interjectione tam absona , turbavit concentum tam ingratae musicae , & facta est pausa. Et sane erat tam seria, & cordata displicentia, quam hauriebat è suis laudibus , ut nesciret sensum suum dissimulare : erumpebat exactibus & vultu adeo manifeste , ut semel eam animadverterit Pater unus Taurini : & motus commiseratione , ne molestiam illi ulteriorem crearet , ipsemet abruptit discursum , quem in ejus commendationem instituerat. Si personae , quae cum eo sermocinabantur essent ejusmodi , ut ob humanitatis decorum consultum esset omnino tacere , nec minus celare displicentiam : narrationem detorquebat aliquo dicto arguto , & amœno : sed tincto pretioso illo ostro humilitatis ; ut aliquoties factum , quando recenscebantur coram , illi fructus eximii quos referebat ex concionibus diserte respondit : Personae meae repræsentatio plus oratorem lacrum agit , quam verba , quae pronuntio ; quemadmodum patibulariis contingit , qui cruci proximi , fidem faciunt verbis , quanta infelicitas sit esse sceleratum ,

sed populus plus credit spectaculo, quam concioni. Judicabat tamen satius silentium ad antevertendum. Multo minus introducebat umquam de illo sermonem: nec enim auditus fuit umquam loqui de concionibus, Panegyricis orationibus, aut compositionibus aliis factis ab eo, aut dictis vel in bonam, vel in malam partem; vel de prædicando, vel vituperando, ut non raro fit ad laudem ciendam: Ut magis se ab omni occasione gloriolæ illius removeret, non audiebatur vel in familiari colloquio narrare res, quæ acciderant; & mentionem adijcere suarum concionum: sicuti solent quandoque alij dicere in conversatione: quando prædicabam ego Romæ. Quando concionabar Mediolani &c. de his rebus, quæ tam sæpe nobis in ore versantur, servabat constans & revera humile silentium. Nec honores, qui illi deferebantur, à populis, Principibus, & Prælatis cum frequentia aliis inusitata, loquendo cum illo tamquam cum filio tonitruum, & Apostolico Prædicatore, visitando, invitando, colendo,

do, delicijs afficiendo, & alijs modis singularis æstimationis præveniando, alio modo non accipiebat, nisi quo dextrè quilibet declinans & honorum fugiens posset. Et hæc fuga videbatur adhuc illi honorata nimis, si ostenderet se dissimulare, si non velificaretur, si prætextibus coloratis se extricaret. Sic factum Romæ, ubi habebat Cardinales, & multos Prælatos, & nobiliores Dominos sibi propinquos, & veteres amicos. Et Mediolani quidem, ubi plausibiliter conversatus fuerat, dum adhuc sæcularis esset cum Dominabus, & equestris ordinis præcipuis. Illos non invisebat, nec visitationes admittebat; sed ita se erga illos gerebat, ac si omnem antiquam notitiam abolevisset. Lucæ autem ubi ipse sæcularis, & Marchio ejus filius sæpe fuerat versatus, nemo erat illorum Dominorum, quem cultis suis moribus, & conciliatrice lingua non demeruerat. Volebant illi, quando isthic concionabatur, antiquam consuetudinem tanto plus colere, quanto cernebant accessione religiosarum virtutum magis
no.

nobilitatam : verum ille tum titulo concionum , quas , agebat , sibi nimium operæ dare ; tum pretextu curationis , quam ratione infirmitatis supradictæ per diem adhibebat ; omnibus visitationibus vel faciendis , vel acceptandis se exemit ; & quod sequebatur molestia audiendarum suarum laudum liberavit. Tantum admittebat per intervalla colloquium probi unius sutoris , habiti in illa urbe pro viro exemplaris , & inculpatae vitæ , cum quo jucundum illi erat aliquot hora traducere conferentiis spiritualibus. Cremonæ numquam voluit uti per civitatem rheda , nec recipere ullam demonstrationem humanitatis officiosæ à benevolentissimo & prudentissimo Domino Episcopo Francisco Visconte ; ne quidem illam , qua sapiens ille Antistes dignari consuevit alios Concionatores , quos solitus erat aliquoties mensæ suæ adhibere , maxime ante , vel post dictam quadragesimam. Sed quidem terrebat ? quod cum ab eo cognitus fuisset Romæ , quando adhuc juvenculus eo profectus fuerat

rat cum Patre suo Legato Reipublicæ; quæ eum, ut moris, miserat ad præstandam obedientiam suæ Sanctitati, suspicabatur sibi plus reliquis honoris deferendum. Nihilominus è compluribus talibus blanditiis, non invenit semper modum se extricandi. De ejusmodi honoribus aut acceptis aut recusatis absolute semper tacebat, aut si esset interrogatus, loquebatur quasi non dignaretur respondere, nisi semper verbis, quæ impressam gerebant ipsissimam effigiem humilitatis. Concionatus fuerat Quadragesimam Mutinæ, & invitaverant eum, ut aliquanto tempore penes illos maneret Serenissimi Principes, qui eum cum magno sensu pietatis audiverant dicentem, & desiderabant fatigatum ex singulari favore extra civitatem aliqua recreatione afficere in locis deliciarum, quos Principum more foris habebant. Ipse se operosè excusavit prætextu negotii prægnantis, quod dicebat se Mediolani habere; & exigebat, ut ibi quam primum se listeret. Et vero statim post festa properavit Mediolanum, quo cum

venisset citius, quam quisquam opinatus fuisset; obviam factus est cuidam fratri; qui admiratus dixit: quomodo R. V. reversa est tam cito, ut ne quidem prænuntia habuerimus eam venturam? Respondit Pater: egregia res! nunquid è Magnatibus unus ego sum; qui debeam apparatus præmittere, ut nuntiet me brevi adfore? In honoribus porro, quos videbat se excutere non posse, utebatur alia industria humilitatis, non velle videri humilem se humiliando, nec acquirere honorem cum inutili repulsa honoris; tum enim moris habebat non loqui vel verbum, nullas excusationes humanitatis adhibere, vel instantias ad recusandum. Quando idem ille Episcopus Visconte Patre destinato jam ad dicendum per quadragesimam, è suggestu suæ Cathedralis, singulari circumspeditione Concionatoribus Societatis reservato; miserat suum Secretarium cum rheda sex equorum, ut adduceret, & reduceret. Pater ad insolitum istum honorem, quem cum decore, non poterat reiicere, non ostendit id sibi placere
 vel

vel displicere, gratum esse vel ingratum, accipere vel detractare, sed sivit se vehi contentus quod humiliaret se, monstrando se æque facilem in acceptando, quam honesto prætextu ad resiliendum. Erat utique tam remotus ab omni specie præsumptionis, cujus impulsu prætenderet in domo majus sibi deferri obsequium, aut delicias in victu, aut majorem curam suæ personæ, quæ esset in tanta auctoritate in Ecclesiis, in quibus concionabatur; ut domi se gereret, quasi minimus omnium, nec plus dareturbationis, quam si non esset in rerum natura. Si excipias quod cibum sumeret in cubiculo, quando per quadragesimam concionibus destinabatur; quamvis esset illi non levis mortificatio; faciebat id ne periculo se exponeret, publico præjudicandi: cæterum non admitterbat, nedum petebat rem quampiam, quæ speciem haberet singularitatis, etiam abstinens eo, quod fatigatio & debilitas suo jure requirebant. Absoluta deinde quadragesima, tam procul erat ne evanescens gestiret,
de

de magno auditorio, singulari applausu, & fructu extraordinario sequuto, ut semper potius tam dejecto animo reperiretur, quod quandoque oportuerit eum consolari; contra quam aliquibus contingit, quibus displicet illud quod faciunt ex appetitu gloriæ; quia revera judicabat se defuisse partibus suis, & pulpitem dehonorasse, eo quod videretur sibi dixisse quædam, quæ haberent plusculum licentiæ, & levitatis, quas opinabatur præcone verbi divini indignas.

Si contingeret elapsum ei quidpiam fuisse dignum censura, aut in se, ut possunt etiam prudentiores errare; aut propter adjuncta, quæ quandoque exigunt particularem circumspeditionem; ipse non solum non detrectabat correptionem, nec excusabat dictum, sed errorem plene ac sincere agnoscebat. Cum aliqui ad P. Generalem detulissent, excessisse in invektiva quadam è pulpito ex nimio zelo facta, non tantum se non purgavit, sed P. Provinciali supplex fuit, ne se defenderet, ut merito poterat, apud suam Paterni-
ta-

tatem ; sed permetteret mortificationem dignam, ut dicebat , propter suam temeritatem, sibi injungi. Notabilius aliud documentum, quod Romæ dedit; ubi cum magna vehementia gravius perstringeret vitia, & exaggeraret gravitatem peccatorum, quam arguebat ex plagis, quas Deus immitteret Christiano orbi, flagellans etiam ferro hostili : exemplo usus est rei, quæ Magnatem aliquem perturbavit. Quare iussus est in pulpito hoc temperare. Sine ulla tergiversatione, & oppositione sumpsit in se, non solum id facere libenter, verum etiam fecit cum maxima claritate, & tranquillitate, observata à compluribus prudentibus, Religiosis æque ac sæcularibus: & insuper libenti animo subivit impositam sibi in refectorio pœnam, nec doluit eam innotescere personæ offensæ; quin imo dixit P. Generali, etiamsi præciperet cum recte ad collum alligato accedere ad suam Excellentiam, ut peteret sibi condonari offensam, se non defuturum. Et in omnibus ejusmodi eventibus eo se gerebat modo, ut licet culpabilem se

non inveniret, paratus esset dare satisfactionem, & fateri se vere errasse, atque mereri correctionem. Scribens deinde hunc successum ad Amicum, solum dixit: *De meis concionibus absolutis cum consueta mea imprudentia; nihil tibi habeo dicere, ne fastidium pariam argumento parum lectione digno.* Qua parsimonia in scribendo, volebat se præterea privare illa consolatione, quæ sentitur ex eo, quod in simili casu quis possit Amico fidenter aperire, quid sibi sinistri acciderit: dici tamen potest eum non habuisse sensum afflictionis, quem alteri posset communicare; quia apud alios gravius se inculabat absurditatis & temeritatis, quod caruisset semper judicio; & quod meritis fuisset expelli à Societate, cui non noverat servire, at solum damno esse. Nec hoc erat iudicium actuale unius vicis, causatum ex aliquo casu extraordinario, sed perpetuò, quantumcumque res illi bene & prospere secundum communem opinionem successissent, humilitas eum in suo tribunali condemnabat. In Epistola ad amicum,

cum , post prædicatam quadragesimam Genuæ anno 1656. maximo concursu , plausu , & fructu : ita fatur : *Fecit mihi Dominus gratiam supra communem , quod dederit mihi vires ad continuandum usque ad finem : sed ego illi correspondi more meo , hoc est absurde ; quia subinde timui illi servire , eo quod illum sæpenumero offenderim , effutiendo res insulas , & indecentes , quas non adverti esse tales , nisi postquam protulissem. Si antea reflexissem , voluissem conferre cum aliis , qui me prudentia antestant. Has vero quas vocat absurditates , & indecentias , nemo cogitet fuisse vana & levicula , poëticiis phaleris , & verbis ad prurientes aures compositis , & risum concitare natis pigmentata , & depravata ; sed solum erant tractus aliqui , magis arguti tamen , quam Sacri , qui ex assuetudine librorum variæ eruditionis à se in sæculo stylo eleganti editorum , illi adhæserant : Quemadmodum S. Hieronymo elegantiae Marci Tullii Ciceronis , & ex versibus Virgilii , quos non satis cum maturitate Sacri Oratoris potuerat ad limam revoca-*

re: enimvero Zelus se, & alios salvandi desiderium, cito eum rapuerant ex Academia ad Ecclesiam; nec dederant otium commodum studio Sanctorum Patrum, quorum lectione, ita ejus eloquentia reformabatur, præscindens ornamenta Magdalænæ, & in locum assumens Iudithæ, ut si illi plus temporis relictum fuisset ad se perficiendum, reliquisset normam perfectam sacræ eloquentiæ, forte à multis expetitam, sed à paucis impetratam. Qualiscumque tamen fuerit, omnibus erat admirationi, preterquam sibi soli: ea propter arbitrabatur dignam, cui silentium saltem in urbibus imponeretur. Hinc in alia sua epistola, dolens se Senâ Missum Romam in lecticâ, ad quod fuerat adactus, quia de facto febricitabat; eratque ejusmodi morbus, ut phtysim minaretur in aëre Senensi: ita tamen scripsit. *Haud dubie habebis quod doceas, quando intelliges me alteri rei servire non posse, quam quod proficiscendo nunc uni, nunc alteri Collegio molestus esse, & onera creare debeam: verumtamen me consolor hac satisfactione, quod*

quod Superioribus plus una vice repræsentaverim prævisionem meorum successuum, & quod par non sim deinceps futurus, licet alii meliorem de me haberent opinionem, itineribus conficiendis. Ex humili hoc sensu quem de se ipso habebat in munere annuntiandi regnum Dei; oriebatur illud magnum desiderium, quod supra, illum notavimus habuisse in aliis rebus; nec in hac functione defuit, instructionis accipiendæ; & promptissima facilitas accommodandi se aliorum consiliis, atque secundum ea componendi æque alias suas actiones, ac conciones; quia numquam sibi persuadere poterat quod in arte dicendi magister esset. In quadam quadragesima, Pater, cui multum tribuebat, observaverat non nulla ex concionibus ab illo auditis, quæ videbantur posse corrigi, ac emendari: aliquo igitur post quadragesimam finitam tempore, ad eum detulit puncta à se censurata. Quibus P. Antonius Iulius ita recreatus fuit, ut voluerit sæpius recurrere ad eundem Patrem, quo melius reminisceretur, & clarius il-

las animadversiones perciperet : nec finis erat gratiarum , quas ei referebat , dicebatque dolere se quod non omnibus suis concionibus interfuisset , ut de omnibus suis erratis iudicium prudens ferre posset. Apud alios vero profitebatur , illum Patrem se habere pro amico sibi carissimo , qui se de omnibus secundum veritatem & rationem commonefecisset : condemnans seipsum , nominatim in quibusdam , de imprudentia commissa non parva. Dum versaretur Mediolani , fuit rogatus ab Excellentissimo Senatu , ut peroraret in solemnitate , quam sacrum illud collegium celebrabat , in Die natalitio ultimi Principis Hispaniæ. Pater se excusavit quantum potuit , quia non libenter ratiocinabatur nisi cum fructu , cujus ejusmodi Panegyres parvam spem faciunt. Nitebaturque illum honorem , & plausum excutere , utpote semper hostis omnium earum concionum , quæ pompam habent ; & in genere exornativo plus ostentationis præferunt quam rei. Ista autem vice magis difficilem se præ-

præbuit in admittendo , quia sibi in animum induxerat , non posse se discurrere hic & nunc cum satisfactione , tam sapientis & gravis confessus. Verum cum excusatio non esset admissa , humile ejus cor suggestit illi rarum conceptum : petijt enim ut alter componeret discursum , quem ipse sibi imprimeret , & recitaret. Eo nec probato , nec concesso ; non supersedit , donec assignaretur ei Pater , qui auxiliarem saltem ei manum in componendo præstaret , & secum conferret. Et de facto contulit , mutavit , correxit , dēpsit & addidit ex arbitrio illius Patris , quidquid suggestum fuerat. Nec solum mutavit , accommodando ex virtute certo quodam modo voluntatem , sed maiore virtute penitus subijciens intellectum , fatebatur recte esse emendatum ; & ostendebat ipsemet personis , quæ ignorabant alienam manum intervenisse , censuram quam tulerat ; & arguebat illa , quæ primo in chartam coniecerat , tamquam inconcinna , aiebatque se multum debere illi , qui plumbum suum

verterat in argentum & aurum. In his
 erat multo liberalior, corripbat, &
 delebat, quando minima umbra appa-
 rebat auctoritatis Superiorum. Atque
 ita Cremonæ significaverat se decre-
 visse de pulpito proponere casum qui
 evenerat recenter: Superior curavit
 eum moneri per Fratrem Coadiuto-
 rem, qui erat illi focius, conducibi-
 lius fore, si id non diceret. Ipse statim
 paruit, & erasit. Incumbebat illi Me-
 diolani concio de B. Francisco Borgia,
 in ejus festo die, quæ maiori quodam
 apparatu celebrabatur, ob præsentiam
 D. Ioannis de Borgia præfecti Castri
 Mediolanensis. Multum tergiversatus
 est, etiamsi multa illi erga Beatum il-
 lum intercessisset propensio tam in sæ-
 culo quam Religione: tandem tamen
 acceptavit laboris solius intuitu: quem
 appetebat, & à quo alij se subduce-
 bant; cum esset tempus, quo studia
 cessabant. Et tum quidem quod atti-
 net argumentum, non dabat occasio-
 nem, timorem demonstrandi, ne es-
 set aliquid in suo conceptu quod esset
 incongruum, aut suspectum de Iudicij

defectu : ut ne tamen imegisse se nesciret , petijt studiose à quodam Scholastico nostro, ut se moneret, si alicubi exerraret. Cæterum quando offerebatur necessitas præstandi aliquam actionem, quæ nata erat ei parere plausum singularem , nec posset excutere , aut obscurare , quasi haberet horrorem illius splendoris humani, confestim se recipiebat ad orationem, & ut posset ex animo dicere : *diem hominis non desideravi*, etiam lucem diurnam excludebat, colligens se in tenebris; fortasse ad imitationem P. Vincentij Caraffæ, qui honore affectus à Prorege Neapolitano, ut Patrini vice assisteret filio, Sacro fonte Baptismatis lustrando; reversus domum in obscuro se abdidit , & quæsiuit occasionem, ut omnem aulæ recordationem à mente sua excluderet. Non abfimiliter P. Antonius Iulius, Taurini concionatus festo Circumcisionis coram Celsitudinibus suis Regijs , & tota Aula nobilissimæ claritudinis : continuo se subduxit in cubiculum : quo caritas suggessit cuidam Patri, ut eum conveni-

ret, ex sollicitudine, ne deficientibus alijs, qui eum curarent, solus relictus esset, & male illi provideretur; pulsavit ad ostium, & cum ob strepitum, qui foriserat, non audisset, an Pater respondisset; aperuit, & reperit eum in obscuro cum toga, stola, & superpelliceo, sicut descenderat è suggestu, genuflexum in medio cubiculi; ut cor suum cum Deo recolligens, abstraheret ab illo plausu, & honore externo, qui ei utcumque lenocinatus fuerat, & mentem distraxerat; quo ostenderet pluris se facere illam sui desertionem, qua dignum se censebat, quam concursum.

Confugiebat ad omnes illas latebras (si tamen ita appellare fas est) quibus ejus studebat humilitas procurandis, adiunctas claritudini concionum ejus, quam dum nitebatur caligine involvere, magis acuebat ad splendorem. Omitti hic tamen non debet magnum & assiduum, quo flagrabat, desiderium non prædicandi in urbibus celebrioribus, & magnis; nec è pulpitis, quæ nomen & famam conciliabant; sed in exiguis pagis & oppidis, ac locis
igno-

ignobilibus ; imo prorsus desistere à concionandi munere optabat. Movebatur autem eo ex causa , qua zelum animarum moderabatur ; quod diceret se jam inde à sæculo habuisse appetitum se ostentandi , & quod ille perpetuo sibi adhæreret , faceretque concionari cum ambitione & vanitate. Fatebatur id tam ingenue, & eo candore, ut credibile faceret, sibi relictum aliquem ex illis Angelis Sathanæ, qui eum colaphisaret puerilibus illis vanæ gloriæ insultibus, ut per illam infirmitatem perficeret se in virtute virili & robusta humilitatis, quæ sub illis ictibus vigorem hauriebat ; & ex adverso suspectas faciebat negationes illorum, qui subinde spirantes vanitatem in dictis, in aspectu, in persona , non habent tamen minimam humilitatis scintillam in corde. Fatebatur P. Antonius Iulius sibi tales favillas aliquando in pectore subfilire, sed tanta cum celeritate eas excutiebat, ut non solum *odor ignis non esset in illo*, sed etiam repercuteret eò, unde venerant ; ut inimicus ringeretur, & arderet invidia. Sic Cremonæ, ubi
fuit

fuit libentissime auditus, quodam die ob exequias celebres, quæ alibi celebrabantur, habuit in concione paucos præsentēs: de quo sensit primo intuitu displicentiam quandam naturalem, sed illico ut *faceret cum tentatione proventum*, se humiliavit, manifestando imperfectum suum fratri sibi socio, & dicens; quod utcumque sensisset, videre auditores tam raros; sed simul adiecit quod si obedientia ei præcepisset, concionari ad nudos parietes; eodem tenore & fervore dicendi, quo alias, usus fuisset. Verum enim vero licet hanc insidiantem sibi ambitionem studeret tantis animis superare, quia tamen recordabatur antiquarum inanitatum, non fidebat sibi usquequaque. Ut itaque isto se metu liberaret, & in pœnitentiam suorum peccatorum; sæpius proposuit voce & scripto suis Patribus Spiritualibus, ac Superioribus, sibi adimerent ministeria ista speciosa, & occuparent se in locis & functionibus inferioris ordinis. Quam autem sincere hoc cuperet, in litteris suis satis exprimebat, In unis
ad

ad amicum scripsit in hæc verba. Absolvi conciones esurialium dierum magno cum tædio & labore. Nunc cum approbatione Patrum meorum, quibus Spiritus curam concedidi: cogito Patri Generali proponere aliquas rationes concernentes, alias corpus, alias Spiritum; ob quas mihi appareret, si debeam perseverare in munere prædicandi, satius fore spheram Concionatoris Provincialis, quam Generalis percurrere, id est prædicare in pulpitis tertiæ classis, quam primæ vel secundæ, quæ P. Provincialis dispositioni relinquuntur. Hac illi vivaciter proponam, & postea cum resignatione promptum me exhibebo, ad omne id, quod de me statuet Obedientia. Id cum exequutus fuisset, paulo post scripsit ad eundem: scripsi non fictæ, sed ex corde Patri Generali, & proposui illi nervose multa solida in utramque partem argumenta, quibus permoverem, ut consideraret, utrum expediret magis me applicari pulpitis speciosis, in locis, & urbibus conspicuis, quam condicenis minoris, non tamen minus, at fortasse magis idoneis ad fructum colligendum. P. Generalis rescripsit mihi sibi gratum id accidisse, nihil tamen in par-

particulari resolvit. Equidem hoc lucratus videor, quod in illo splendore nihil habiturus sum mei, & me promptum obtulerim ad descendendum à summo ad infimum gradum scalæ, sine ulla vel minima repugnantia; uti per Dei gratiam palam faciam, si periculum fiat.

Porro licet videret, quod Superiores prudenter anteponentes gloriam Dei ejus judicio, & desiderio fugiendi vanam gloriam; nec non civitatum, & Prælatorum expectationem, bono humiliationis ejus, non annuerent ejus petitionibus: quia tamen illæ proficiscebantur ex sincero corde, & cupientissimo, non apparendi humilis, sed vilis, ut sibi persuadebat se esse; non desijt umquam prolaxis id litteris sollicitare, & instanter à Superioribus deprecari, nec desijt, usque dum vita suppetere. Anno 1661. quatuor præter propter mensibus, priusquam ad meliorem vitam migraret; dum esset Mediolani ut diceret per Adventum, eo quod debilitas virium se proderet in vultu, & indicium esset, quod affligeret se maioribus doloribus, quam par erat

erat, præcepit illi P. Provincialis, ut chartæ committeret omnes orationes, devotiones, & austeritates corporis, quas faciebat, quo eas moderaretur, & solatijs reficeret. Quid ipse? Quamvis esset humillimus, paruit tamen confestim, & quod erat iussus facere, in folio descripsit, & tradidit: de quo postea redibit mentio: finita autem enumeratione poenitentiarum, non reflectens, quod non exigeretur ab illo recitatio desideriorum, quibus flagrabat ad se humiliandum; quoniam tamen ijs plenum habebat cor, ut quocumque loco & tempore ea excitaret, adiunxit etiam ea *opportune importune*, & verbis suis expressit, quæ operæ prætium erit ad edificationem hic referre. Et licet alibi aliquid in hanc rem perstringendum est, nec ingratum, nec superfluum erit ea subiungere tamquam spirantia præstantem virtutem. Dicit itaque in hunc modum: *Habebam ex natura meretricium genium ad studia litterarum, & vanitatis, quæ ex illis resultat, cupidissimum; nec habilis supra vulgarem ad ea assequenda deerat.*

deerat. Verum enim vero Pater meus ei non velificabatur, non permittens me frequentare scholas. Sed domi dabat mihi Magistros parum peritos, à quibus cum facile didicissem, quidquid habebant scientiæ, credebam me affatim sapere. Postquam vero in virum excrevi, vidi me parum scire: & quasi phrenetica quadam ambitione in cupiditatem abreptus, me in doctrinis perficiendi; volui tempus deperditum recuperare; atqui totis diebus & quasi totis noctibus incumbendo studijs, sensi me magis, ut ita dicam intricari, quam proficere: ad eum modum, ut licet stomacho præditus essem & capite fortissimo, post quinque, vel sex annos, quibus eam vivendi normam sectatus fuissem, expertus sum unum & alterum ita labefactatum, ut invenirem me plane inidoneum, qui deinceps aliquid præstare posset. Perpetuo tamen per annos plurimos, violentâ illâ passione doloris fui cruciatus, quod caruissem bona directione in conquirendis scientijs, & quod valetudinem pessumdedissem ex ambitione eas assequendi, & per earum splendorem eminenendi. At licet mihi per Dei gratiam lux aliqua affusa sit rerum æternarum, qua ille pas-

passiones non parum fuerunt refrenatae, non tamen fuerunt penitus extinctae; nam per intervalla melancholicis insultibus me impugnarunt, nominatim suggerendo appetitum commorandi in locis celebrioribus, in quibus obeuntur functiones illustres, & litterae efflorescunt; tum quando isthic iudico de tali vel tali juvene, quod in re litteraria laudem tulerit, mihi recurrit in mentem, quod cum essem adhuc aetate inferior, plus praestitissem, si pares praecipitores habuissem. Quae omnes ariditates ex vanitate Spiritus originem habebant, cui fui extremè obnoxius; neque adhuc modo ab illâ sum omnino immunis. Puto me vero, ab ea impugnatione penitus liberatum iri, si vivere mihi detur in quopiam Collegiolo, ministerijs iam splendidis non occupato, sed omnibus ignoto; & sub Superiore, qui ex natura contrarius meo genio, occasionem det abnegandi meam voluntatem; quod si autem pars tunc sensitiva sentiret, repugnantiam in parte inferiori; nihilominus pars Superior, ut mihi persuadeo, pro emolumento spirituali haberet non leve subsidium. Quare R. V. infimis precibus obtestor, in genua abiectus, ut pro gloria Do-

Q

mini

mini Dei nostri, mihi hoc tribuere dignetur. Hæ erant impressiones & cogitationes humillimi illius cordis, in quibus ultra notitias, quas dedit suæ excellentiæ naturalis, tanto securioris, quanto magis comparatæ ad se humiliandum, manifestarunt se tantæ virtutes, quantas poterit observare Religiosus Lector, cupidus proficiendi.

C A P V T X.

Mortificatio passionum in animo P. Antonii Iulii.

Mortificationi hæroicæ passionis tam superbæ, possumus Socias addere, quasi in comitatum triumphi, alias passiones animi, quæ fuerunt ab illo tam alacriter coërcitæ & refrænatæ, ut cum ne quidem parvi motus fuerint ei familiares, non potuerit deprehendi quo firmo animi decreto dominium eorum sibi comparasset. Sufficient tamen pauca iudicia in argumentum victoriæ tam generosè obtentæ. In eorum seriem accenseri potest

test

test illud desiderium supra relatam, vivendi in aliquo Collegio obscuro, non solum humiliationis gratiâ, sed etiam cum accessione Superioris, qui eum assiduè exerceret, in abnegatione propriæ voluntatis. Tale fuit postulatio, ut posset se tamquam vile mendicabulum ostendere in porticu Albari, & vanitatem sæculi explodere, mortificando se in ipsa mortificatione amicorum, & propinquorum. Tale item constantia in gestando habitu vili, cum esset Sacerdos sæcularis, in conspectu totius civitatis cum sensu suorum consanguineorum, inter quos ut fuerint multi pietate præstantes; tamen cum necdum pervenissent ad eam Philosophiam, quæ latet sub hoc pallio, habebant se pro dehonoratis & læsis: sed alia sunt præterea quæ non sunt adhuc commemorata, recordatione tamen & imitatione digna. Sunt autem hæc: Eo tempore, quo Oratoris munereungebatur in aula Hispanica, & meditaretur reditum cum tota sua familia, fuit per mortem ereptus filiulus, qui illi erat longè carissimus,

& de quo scribens ad Dominam suam Matrem dicit : *profecto tam inopina mors & jactura, pupugit mea viscera, quia puel-
lus elegantior, & indolis placidioris, non poterat vel imaginatione alicujus concipi & fabricari : dein recensitis qualitati-
bus ejus bonis, robore & valetudine, quæ præferebat, statim prodidit, quam Christiane viderit eum, spatio non am-
plius quatridui, quadam specie epilep-
siæ expirantem, dicens : Et tamen quando finge-
bamus nobis spem affulgere pe-
riculi cessantis ; subito extinctus est. Pa-
trentia. Dominus dedit, Dominus abstulit,
sit nomen Domini benedictum ! meliorem
sibi sortem securam reddidit, & migravit,
ut æternum beatitudine gaudeat ; cujus fi-
dem certam habemus : proinde dignus est
invidia, non lacrymis. Attamen qui cor
habet Patris & oculos ad cernendum, sibi
eripi pusionem & infantem tam amabilem
totum venustum, & mansuetum, & totum
bellum qui sortitus erat animam prorsus
bonam ; non potuit non esse lacrymabundum
etiam illud gaudium, quod sit beatus. Cæ-
terum orabit pro nobis, intercedet pro no-
bis. Deo gratias agamus. Ita noverat suo
tem-*

tempore concordēs reddere affectus Patris, & Christiani. Aliquanto post, cum esset Sacerdos sæcularis, mortua est sibi senior filia, non ita pridem marito iuncta. Indiciū sensus hoc solum edidit, quod receperit se ad Novitiatum nostrum foris Genuam, ubi sequenti manè, plus quam per horæ spatium discurret quidem cum uno è Nostri de rebus bonis, & salutaribus, sed ne verbo quidem illato de tali morte, nec minimo perturbationis signo dato: adeoque qui non percipisset aliundè casum, ne tum quidem recordatus fuisset; nisi quando Pater, qui recenter fuerat Sacerdotio decoratus, se paravit ad celebrandum, & rogavit ejus opem, ut quæreret in Missali Sacrum pro defunctis, quod intendebat pro eâ facere: per cujus mortem, quanto minus commoveret se, ad sensus doloris inutiles eliciendos, sicut & ceteri qui spem non habent, tanto magis resuscitati sunt sensus illius tristitiæ, quæ in salutem stabilem operatur. Etenim illo ipso mane dedit in rectorio communi quædam signa hu-

militatis, & pœnitentiæ; de quibus dictum jam est superius. Argumenta animi altè, & Sanctè in Deo fixi. Neque minus ponderanda est fortitudo, quâ, licet jam Religiosus, accepit obitum Domini Iacobi Philippi Durazzo cognati sui, quem singulari amore complectebatur, tenero simul ac forti; utpote qui fundatus erat, non solum in communione sanguinis, verum longè amplius in soliditate virtutum, quæ illi præsto erant in supremo gradu, & exercebantur moribus gratiosis & benevolentia plenis; quod ei etiam conciliabat gratiam apud non conjunctos, & reddebat supra modum spectabilem inter Nobiles; utpotè qui tum honoribus civilibus, & auctoritate privata in sua patria emereret. Cum ita nobilitate, atque una præfulgeret ornamentis virtutis, finivit optimam vitam morte, quam fecit pretiosam coram Domino, fortitudine animi, pietatis affectibus, & crebris actibus virtutum Christianarum. Quod cum relatum esset P. Antonio Iulio, qui tum temporis versabatur Senis apud Dominam suam sororem,

rem, viduam defuncti: dedit ad illam Epistolam spirantem quid Sanctitatis, in quâ, uti non patefecit minimum infirmitatis humanæ indicium, eo quod perdidisset propinquum tam arctè sibi devinctum, & amicum tantopere adductum illi, & toti Societati; ita attulit sorori consolationem planè robustam, desumptam ex certa fiducia bonorum æternorum; & nixam spe certâ, quam conceperat de salute animæ ejus, quod gauderet remuneratione, qua bonorum suorum operum aliàs patratorum, qua cruciatuum in morbo & morte constantissimè toleratorum. Vndè concludit: *quod me attinet nullus dubito; quin ipse ut summum, ut summum inquam tantum transierit, quasi per ignem, & modo dicat: O beatæ & felices afflictiones, quæ paucorum dierum levissimis pœnis, me redemerunt ab illis, quarum singula hora superant annos integros, quibus aliquis decumberet in lecto, omnibus Iobi miseriis, & morbis oppressus! Eia ergo soror amantissima, noli angi corde circa retransactas: sed esto secura, quod Deus usque ad extremum habitam Marito tuo astiterit, & cu-*

stodierit paterno suo, & amabili, & liberali modo agendi, quo solet divina misericordia uti erga suos, quos magis diligit. Certè quasi manibus palpandum dedit quam luculentè noverit premiari eos in morte, qui dum viverent, illi benè servierunt. Hæcerant sensa, quæ in morte carorum vivebant in corde P. Antonii Iulii mortui omnibus aliis. Nec enim solum mortuus erat suis consanguineis extinctis, sed insuper etiam vivis. Invitatus aliquoties ad domum vel prandium à dicta Domina sua Germana, ubi, ob conspirationem animorum quæ erat inter illos, poterat esse securus, tractandum se magis ab eâ ad modum Magdalenæ, quam Marthæ. His non obstantibus quantumcumque rogaretur, & licet in ejus domo sæpè versaretur. Dominus Franciscus filius suus secundo genitus sibi per dilectus; numquam induci potuit, ut iret, nisi forsalsè unis vicibus, ut suis Superioribus obsequeretur; & tum tam frigidè se gessit, & animo tam distracto, & aliis cogitationibus occupato, quasi esset à se diffitus, & ut volebat S. Antonius,

nus, esset Monachus extra cellam, videreturque piscis extra aquam. Quin imo quando ille, & illa degebant Mediolani; quantumvis dicta Matrona videret alio se non gaudere solatio, quam ex ejus conversatione spirituali; aut aliquorum ex suis filiis Religiosis; ita tamen erat ab illâ abstractus; ut subindè alia de causa egressus domo, si quæreretur à socio, an non vellet eâ occasione uti ad invisendam sororem? responderet: non certè: quia esset perdere tempus. Cum esset missus Genavam, ac ibi multis mensibus subsisteret, numquam accedebat ædes suorum consanguineorum, aut propinquorum ad eos invisendos, nisi ob aliquod officium misericordiæ & Charitatis; cujus instinctu multo tempore de industria astitit sedulo Dominae Matri suæ in morbo & morte; nec voluit interea immiscere se negotiis ullis familiæ, prout fecisset alibi: sed solummodo impendit se salutis & devotioni illius animæ, quæ istis pietatis obsequiis consolatissima ex hac mortali Vita migravit ad immortalem. Cæterum ex

humanitate, quamvis intra terminos Religiosis non dissentaneos, non ibat quemquam visitatum, dicens habere se rationes, quare sibi magis, quam cuilibet alteri, maximè Genuæ conveniret ab omni simili urbanitate abstinere: unde per æstatem concionanti in templo nostro quod habemus Albani, cum insinuatum esset à Superiore moris esse, & consultum Ecclesiastæ, visere personas eminentiores, nobis magis addictas & devotas: ne obedientiæ se subduceret, paruit: aliquot earum cum ipsomet Superiore adivit; atque ita se gessit demissè, ut apud illos Dominos non solum benevolos erga Societatem, verum etiam familiariter notos, & veteres amicos, cum quibus paucis ante annis fuerat familiariter conversatus, & nominatim, in domo Marchionis Rodolphi filii sui; manserit vacationi internæ intentus, & abstractus; & tam parcè locutus fuerit, & se ostentaverit, quam faceret minimus Frater Coadiutor in socium assignatus. Fuerunt illi actus mortificationis multo insigniores, quam si visita-

sitationibus illis abstinuisset, in exemplum profecto Religiosis, multum dignitate illo inferioribus; laudem mereri, non tantum moderatum esse in visitationibus, verum etiam in usu libertatis, quam existimabat se dedecere. Negotiis & commodis suorum propinquorum, etiam filiorum tantum supersedebatur, quantum sibi licitum erat & possibile: multoque magis aliorum, quibus minus erat obstrictus. Hinc factum quod cum versaretur Bononiæ, & ibi curaret nescio quæ, pro quibusdam suis propinquioribus amicis, se ostenderit tam ab illis alienum, ut scripserit prudens quidam Religiosus, quod viderentur illi consanguinei sui ad instar istorum, quos sibi olim quidam Sanctus fabricabat, ex nive masculos; & quod cum necessariis suis, & eorum rebus valedixisset, indicium esse videretur morientis in eo tam piæ, & præclaræ ex natura & virtute propensionis, egentibus benefaciendi; quia cum esset Genuæ, & recurrerent ad illum egeni & calamitosi, quorum multos reliquerat pestis, ut sua intercessione impe-

impetrarent aliquod subsidium ab ejus propinquis, solebat illis magna cum commiseratione, & repugnantia dicere: *Fratres mei, non sum ego jam amplius is Antonius Iulius Brignole, qui fuit; non habeo apud illos auctoritatem. Non sum Dominus bonorum, & facultatum eorum. Tædet me ipsorum. Sed si meo consilio stare velitis, vos ipsi eos accedite. Si pii sint, & justi, vobis succurrent.* Displicebant illi plurimum tales interpellationes, quæ illi occurrebant pro rebus temporalibus vel amicorum, vel aliorum. Eaque de causa, atque ex aliis motivis, quæ aut per se, aut ex sua viva apprehensione, quando Genuæ degebat, vehementer eum affligebant; aut etiam ex virtutis dictamine, quod nullum posset amplius gustum percipere ex rebus fluxis, quas tam generoso animo aspernatus fuerat, dum mundo nuntium mitteret; tum etiam ut se prorsus liberaret ab affectu amicorum, & patriæ, valdè invitè ibi morabatur, quod quidem in poënis annumerabat, & ita ei molestum erat, ut scripserit non semel esse se in perpetua in-

quie-

quietudine, quæ illi tollebat attentionem, & sapidam applicationem erga exercitia spiritus, & surda quasi lima vires corporis cum sensu aspero atterebat. His tamen non obstantibus tamen erat sui Dominus, ut quoties illi injungeretur Genuam se conferret, semper promptissime eo properaret; sive ad verbi Dei prædicationem, sive ad alia munia, licet sentiret tantam repugnantiam ut diceret se malle proficisci in Indias Occidentales; & vero serio cogitabat eas expetere: etiam ea propter, ne posset amplius mitti Genuam, & se tam magno locorum intervallo sejungeret, ubi nihil novorum audiret, de illis, quæ tantoperè fastidiebat. Sæpe sæpius, ut minimum in mente versavit cogitationes, ut efficaciter à Superioribus peteret, si ad gloriam Dei esset, permetterent sibi semper degere quam longissimè remotum à Patria. Scribens ergo ad amicum consilii gratia ita ait. *Secundum experientiam quam habeo, nullum aliud superesse mihi remedium reor quo jucundè vivere possim: puta: quo longius abero Genua, tan-*

to plus letabor. Loquor de letitia quietis sensibilis. Quid jam melius est? an recusare fortè, an perseverare in ista cruce? qua amaritudine afficit spiritum, & non potest non redundare in corpus: ut in me verum fiat illud: spiritus tristis exsiccat ossa: nihilominus sum paratus, & iugo obedientiæ actutum collum submitto. Et in alia epistola conjungens simul molestiam & resignationem, ita loquitur. Contigit quod turbatus fuerit animus, ob certa quædam eventa quæ me vexarunt; ex quibus apparet, quod nulla re gaudere valeam quin semper interius affligi me sentiam, nisi sim longè Genuâ remotus. Vsu didici id unicum esse remedium ad quietem; si illi tamen qui me gubernant, arbitrentur non esse consultum, ut illa fruam; persuadebo mihi Dei esse voluntatem, ut illam crucem feram, & humeros illi subdam; non tamen sine gravi sensu. Quia quantumcumque conor per partem Superiorem, voluntatem meam conformare divinæ; non possum equidem cohibere rebellionem partis sensibilis. Sed expeto aliorum precibus adjuvari, quo meæ molestiæ & labores non separent me à Deo, sed magis cum illo

con-

conjungant. Ejusmodi erat fortitudo animi in P. Antonio Iulio, quam non nemo fortasse parum exercitatus in soliditate virtutis, credet defectum exiguæ mortificationis, illam, quem Pater vocabat rebellionem partis sensibilis & turbationem animi. Verum si quis taliter sentiat, recordetur Angeli Sathanæ, qui datus erat Apostolo, & teneritudinis Sanctorum in separatione & morte suorum, quos efflicti diligebant: & facile videbit, quod sit discrimen inter apathiam stoicam, & mortificationem Christianam, quæ non tollit sensum, sed negat consensum: quanto enim acrius sentit animus impressionem naturalis displicentiæ, tanto magis heroicam reddit fortitudinem. Non solum in sustinendo sensualitatis impetu, sed etiam in quærendâ ferâ illâ indomitâ, & provocandâ ad certamen. Post illam lentam quidem, sed præclariorem victoriam quam de seipso reportabat P. Antonius Iulius, videri poterunt, minoris momenti, nonnullæ breves & actuales, quæ sequutæ sunt. Operæ pretium tamen
erit

erit hic producere, quid post castigatum erga consanguineos & filios affectum fecerit, ut eum erga partus ingenii, & opera mentis, in quibus exantlandis se exhauserat, vel exstingueret, vel refrænaret. Dum habitaret in Domo Professâ Mediolanensi, & diceret per Adventum, perierat ingens fascis scriptorum, quæ complurium annorum improbo labore collegerat, pro materia concionum. Obviam factus isthic uni è Nostreis dixit, an ignoras infortunium quod mihi supervenit? cumque animadverteret eum compassione commoveri; sive ut se corrigeret, sive ut ostenderet se doluisse de re nihili, subiunxit: Cogita utrum debeat me poenitere, qui quotidie me sæpius offero Deo in Sacrificium, & præsto sum pro illo mille mundos, si haberem, perditum ire, si Deo jacturam paucorum scriptorum devoveam? Et fuit sane mirum, quod de se tantum proferret: sed Deus posuit in ore ejus hæc verba, ut alter actus illos apprehenderet, quibus in se reflectebat. Deus autem contentus

hac

hac resignatione, ita suaviter res disposuit, ut collectanea hæc fuerint brevi post reperta. Quid jam dicam de innumeris aliis ingenii sui foetibus, quos composuerat, & impigro studio elaboraverat in sæculo, eduxeratque ad tantam perfectionem, & elegantiam, ut calamus ejus famæ pennis pervolverit ad celeberrimos scriptores Italos? Antequam Deo se arctius in Religione consecraret, severum de iis instituit iudicium, & eos, qui prælo editi evaserant rigorem suæ justitiæ, neque poterat recuperare, omnes exilio multavit & proscripsit, & ut filios adulterinos, & abortivos execratus est, & publicè per omnia pulpita proclamari fecit, pro damnatis. Contra alios, qui illi supererant in domo, fulminavit censuram, si essent vel modica vanitate, & levitate aspersi, ut igne absumerentur. Tantum reservavit pauculos, qui videbantur illi magis tolerabiles, erantque, prout ipsemet exposuit Patri suo Spirituali, quem consulebat in omnibus; quædam Satyræ morales, & sex poëmata versus heroïci, mixti armis,

& amoribus; sed honestis; nec non quædam soluta oratione, in quibus erat quid Menippæum, & vitia perstringebantur; omnia Italicè conscripta, & hæc ipsa tamen quia erant illi suspecta, rogabat, quid iis esset illi faciendum? Ut autem ordinatius de illis judicari posset, quia prius non distinxerat benè in partes, quid illis fieri conveniret, chartæ commisit in hunc sensum. *Distinctionem, quæ circa illa scripta sumi potest, videtur mihi in tres partes dividi posse. Primo ut maneant, & retineantur prout sunt. Id autem nullo modo reor conducibile: eo quod non gesserim me in eis describendis, quæ vanitatem redolerent, ut à peccato excusari possim, saltem veniali: Secundus modus est, ut omnia simul in unum cumulum congesta, Vulcano tradantur, quod esset Sacrificium absolute generosissimum, & Deo gratissimum. Et mihi dicat pars superior faciendum: verum enim vero se opponit natura, ne cogar prorsus destruere, quod mihi non parvo labore stetit: & fortè minus malum est, inter ea, quæ mea infirmitas committere possit. Quin & incidit mihi dubium, an*
non,

non , si ea retineam , poterunt mihi aliquando venire usui in rem bonam , & statui meo consentaneam ; unde sensum haberem postliminio me ea concremasse. Tertia divisionis pars est , aliqua inde posse eximi , quæ mihi poterunt servire pro lectionibus Sacris , aut alia functione religiosa , & reliqua igni tradere. Hæc cum consignata à me essent in manus cuiusdam , cui Superior iudicium commiserat. In hoc ipso verebar inesse plurimum amoris proprii , & quod eo ipso tempore , quo poteram messem inferre in horreum Domini , tum me non impenderem rei , quæ ex radice sua esset prorsus Sacra & divina. Nullum tamen alterum intuitum admittebam , quam ad debitum , cui ex voto eram obstrictus ; nempe ut unice respicerem ad hoc , quod judicaret ad maiorem Dei gloriam , & bonum meum spirituale esse conducibilius ; quod cum auxilio Domini accurate exequar , quia mihi decretum est obsequi Sanctæ ejus voluntati. Pater Spiritualis rescripsit : judico melius in Domino non destruere templa profana , sed convertere in cultum Dei. Huic rescripto acquievit , & adeo submitit voluntatem , & intellectum , ut postea

ne cogitaverit quidem de illis abolendis. Atque ita isti scrupuli manserunt sepulti, usque ad mortem in illius corde, qui eos absterferat. Hæc erat celsitudo animi, qua spectabat, imò dedignabatur res sibi maxime caras, non reservans sibi vel unum oculum solum; & perfectius ambos istos duos animæ devotæ convertens in beneplacitum Dei solius. Adeoque quemadmodum dicitur quod *Deus tranquillus, tranquillat omnia*, sic Dei servus tranquillus, ipse, habebat virtutem tranquillandi animos, & suam pacem communicandi aliis; ostendendo illis, quam viles & despicabiles sint res illæ, quæ perturbant, indignæ admitti à magnitudine animi Deo consecrati. Transibat aliquando Cremonam, & offendit quosdam in Collegio, qui inter se dissidere videbantur, sensit aliquam perturbationem, quia putabat inter Religiosos dedecere omnem alienationem animi, tamquam eam, quæ scintillam periculosam prolicere posset majoris passionis; unde incendium gravius alimentum sumere posset.

Quam-

Quamobrem, ipsè ex motivo charitatis se interposuit, ut difficultatem conaretur superare, studens ex dictamine virtutis, unam partem alteri conciliare; & vero feliciter. Evenit enim P. Antonio Iulio quod fuerit instar ro-
ris placidi, qui mitigaret omnes passiones, dulcibus atque validis argumentis inspirans animis spiritum charitatis & concordiae, & desiderium non perdendi summum illud bonorum, ob res nullius pretii, & contentiones frivolas. Confirmavit igitur in Sancto suo decreto illos, qui parati erant cedere: atque ita serenitas pacis restituta est, & exhortatus est ipsos, quemadmodum olim S. Barnabas, *in proposito cordis permanere in Domino*. At-
qui vim habuit ejus adhortatio ob opinionem, quam conceperant de ejus probitate. Ut autem adlaboraret stabilitati illius, quam procuraverat tranquillitatis; cum deinde pervenisset Mediolanum, Superiores certiores fecit, quam laudabiliter ex virtute fecissent illi, qui maluissent cedere, quam contentiosum funem trahere,

multum illos deprædicans, quod postposuissent sua commoda caritati; Recepit dein ab iis litteras, quibus sibi congratulabantur, & multum sibi consolationis accessisse ex facto illo testabantur. Alia vice quidam Pater qui ægritudine animi laborabat, propterea quod alii ab eo requirerent rem, quam putabat à ratione alienam, & sibi in exequutione difficilem; adeoque non sine lucta superandam. Ivit quæsitum P. Antonium Iulium, ut solatium apud eum inveniret, & impetraret opem orationum ejus, in quibus multum fiducia posuerat, narravitque ei suam afflictionem, ejusque causam. E vestigio P. Antonius Iulius prorupit in hæc verba. *O mi Pater multum compatior illis secularibus, qui se vident intricatos angustius, ob adversitates obortas in sua familia!* quo responso, etsi primo intuitu, desperato, ipsè valde caute, & prudenter tetigit concentum organi, quod facile possit dissipare phantasiâ Religiosorum ex consideratione, quam sint parvæ eorum tribulationes, si comparentur cum iis, quas

quas patiuntur mundani homines. Poterat certe apud Patrem istum esse vice modestæ correptionis, licet istis verbis non intentæ. Quippe habebat parentes necessitate & penuria pressos, quos P. Antonius Iulius aliquando magnâ Charitate sublevaverat. Attamen passioni Patris applicabat, proprium & opportunum, & efficax, & leniens pharmacum, si quidem satis erat videre quam esset compositus, & in suis passionibus domandis esset eruditus, ut in aliis eas moderaretur. Atque hæc sunt pauca illa indicia, quæ sunt observata, ut mortificatarum in eo passionum notitia extaret.

Verum cum sint passionες omnes, quasi impetus & operationes, quantumcumque sint refrenatæ, mortificatio earum non potest tam in faciendo cognosci quam in non faciendo: in quo concordat, universale, testimonium eorum, quæ in P. Antonio Iulio comperta sunt. Ipse enim noverat cum tanta solertia cohibere illos suos motus, ut numquam percipi posset, vel minimum eorum murmur intus,

vel minimus sibilus foris. In Cholera quis illum vidit umquam, vel motibus qui imprudentibus suboriuntur, & vocantur à Theologis primo primi, utpote iudicium rationis prævenientes? Quando umquam se ostendit involutum sermonibus recreationis, cibi, & potus, commoditatis, satisfactionis non solum superfluae, sed etiam congruae & necessariae? Quibus umquam se ostendit offensum? quando verbis negantibus, tergiversatione, significatione alicujus tolerantiae perturbatum se prodidit? Quando umquam questus est de doloribus, itineribus, cubiculo, morbo, quolibet res ei sufficiebat: omne cubiculum commodum, omne edulium sapidum, omnis functio arridens, omne consortium dulce, omnis provisio abundans illi erat. *Sedebat solitarius & tacebat, quia levaverat se super se.* Vix audiebatur nisi in suggestu, sicut David sapientissimus in cathedra, sed extra eam in suo angulo tenuissimus ligni vermiculus. Quæ moderatio sui velle, & modestia in agendo, fecerunt

runt illum magnum & celebrem cor-
ram Deo, & mundo: eòque non po-
tuit pervenire, nisi acquisitione labo-
riosa, & generosa mortificatione, ac
Dominio perfecto omnium suarum
affectuum.

C A P V T X I.

*Mortificationes corporales P. Antonii
Iulii.*

VT transeamus jam à mortifica-
tione spiritus ad mortificatio-
nem corporis; magna admodum fuit
animositas, quâ usus est in tractando
corpore cum summâ austeritate; cu-
jus affatim habuit copiam in variis to-
lerantiæ occasionibus, aliis quidem
compluribus Religiosis communibus,
& usitatis; sed in illo cumulatis & ge-
minatis ob circumstantias peculiare,
per quas Christus Deus, & Dominus
noster eum dignum faciebat duplici
honore in patiando pro ejus amore,
Interea quo se fatigabat *in verbo & do-
ctrina*, affligebat se geminatè in labori-

vel minimus sibilus foris. In Cholera quis illum vidit umquam, vel motibus qui imprudentibus suboriuntur, & vocantur à Theologis primo primi, utpote iudicium rationis prævenientes? Quando umquam se ostendit involutum sermonibus recreationis, cibi, & potus, commoditatis, satisfactionis non solum superfluae, sed etiam congruae & necessariae? Quibus umquam se ostendit offensum? quando verbis negantibus, tergiversatione, significatione alicujus tolerantiae perturbatum se prodidit? Quando umquam questus est de doloribus, itineribus, cubiculo, morbo, quælibet res ei sufficiebat: omne cubiculum commodum, omne edulium sapidum, omnis functio arridens, omne consortium dulce, omnis provisio abundans illi erat. *Sedebat solitarius & tacebat, quia levaverat se super se.* Vix audiebatur nisi in suggestu, sicut David sapientissimus in cathedra, sed extra eam in suo angulo *tenuissimus ligni vermiculus.* Quæ moderatio sui velle, & modestia in agendo, fecerunt

runt illum magnum & celebrem coram Deo, & mundo: eòque non potuit pervenire, nisi acquisitione laboriosa, & generosa mortificatione, ac Dominio perfecto omnium suarum affectionum.

C A P V T X I.

Mortificationes corporales P. Antonii Iulii.

VT transeamus jam à mortificatione spiritus ad mortificationem corporis; magna admodum fuit animositas, quâ usus est in tractando corpore cum summâ austeritate; cuius affatim habuit copiam in variis tolerantiae occasionibus, aliis quidem compluribus Religiosis communibus, & usitatis; sed in illo cumulatis & geminatis ob circumstantias peculiares, per quas Christus Deus, & Dominus noster eum dignum faciebat duplici honore in patiando pro ejus amore, Interea quo se fatigabat *in verbo & doctrina*, affligebat se geminatè in laboribus

bus numquam intermissis concionum, cum exactissima observantia regulari. Molestias itinerum exhauriebat cum incuria sibi consulendi. Accedebat debilitas valetudinis cum abstinence recreationum & quietis subtractione. Asperitas paupertatis cum rigore gaudebat se cruciari. Incommoda quæ subibat non permittens sibi ministrari, in ætate matura & servitiis diuturno jam tempore assueta. Quæ tractatio personæ, quam diu patienter toleraverat etiamsi alia non jungerentur, poterat illi conciliare æstimationem, viri, qui spiritu præditus esset non mediocris poenitentia. Hæc tamen quia non adeo apparebant foris, tantum laudem communem ei provocabant. In particulari vero in profectionibus quas tam crebro confecit, tempestate anni maximè inclementi, exempli gratia, mense Ianuario, quando in more positum est Concionatoribus Italiae se transferre à Natalitiorum concionibus ad pulpita Quadragesimæ; tanta cupiditate ferebatur patiendi, & incommoda subeundi, ut peiora semper sibi

sibi fumeret in provisionibus, & viatico; in vectura equorum & mulorum; in hospitibus, in lectis, & victu. Et tamen in itinere quod fecit Genuâ Lucam, cum, se coram, socii sermocinantur, de incommodis quæ subire oporteret viatores, respondit ipse se numquam talia expertum: & speciatim quod numquam sibi obtigisset equus meritorius malus, & difficilis incessus. Quod cum omnes in admirationem raperet, non sciebant cui tribuere causam, nisi vel solatiis quibus à Deo intuitus inter patiendi occasiones præveniebatur; vel animi ejus magnitudini, cui exiguum erat quidquid toleraret molestiarum, & expetebat plures, quamvis aliis nimium multæ viderentur. Equidem in suis istis patientiæ exercitiis non est dissimulandum, quam virtus ejus esset industria & ingeniosa: illud etenim quod faciebat ex intentione patiendi, ut multis in casibus peculiaribus fuit observatum, tangebatur tali larva inadvertentiæ, ut tribueretur genio cuidam oscitantæ, & esset in opinione, quod nesciret illa curare,

rare , & apprehendere. Id quod illi proderat non solum ad hoc quod intendebat , nimirum ad thesaurum suum subducendum periculo , eum non ferens *publicè in via* grassatorum oculis expositum : verum etiam ad illud quod nolebat ; ne videlicet materia patientiæ subtraheretur : Etenim quanto minus sibi prospiciebat ; tanto magis conformiter ad rectam regulam Charitatis Superiores invigilabant ut nihil illi deesset , ad lecticam usque , quando necessarium judicabant ; & socios qui per viam non tantum ei servirent , sed etiam regerent in iis , quibus opus habiturus esset : Idque declarabant discretè Superiores in digressu : cum auctoritate , quâ , ut isti gubernationi , & commodo de quo multum dolebat , acquiesceret ; quâ industriè prætexendo , non fieri hoc ejus causa , sed ob alium finem. Quemadmodum quando postremum ibat Genuam ad dicendum , junctus fuit sub alio titulo ei comes Pater quidam commendatus à prudentia & Charitate ; eique serio inculcatum , ut non pateretur eum quidquam

incommodi perferre in itinere, & ita eum moderaretur, ut vires integras illi servaret; quæ laboribus quadragesimalibus sufficerent. At P. Antonius Iulius spiritum illum ardentem poenitentiae, qui eum à mundo convertit ad Deum, atque etiam demum in sæculo eum repleverat odio sui Sancto, numquam minus cessabat ventilare, & animare & impellere nescio quem fervorem usque ad iudicium excessus, quo patefaceret, quod cruciatus & molestiae vitae religiosæ, & prædicationis Evangelicæ, essent deliciae animarum Innocentium; ad quos ipsum oporteret adiungere asperitates animarum poenitentium. Atque ita sæpius confidenter quasi scrupulum cui-dam amico ex Patribus suis Spiritualibus aperuit, multum se vexari à formidine, quæ eum invaserat, quod nimis raras & parvas assumeret poenas, nimisque lautè haberetur; dicens quod moderatio in communi præscripta per regulas nostras, locum relinqueret adjungendi illas, quæ conducerent personis particulariter illo subsidio egentibus:

tibus : qualem ipse se censebat esse. Unde petebat multas à Superioribus suis & exercebat omnes, quæ illi permittebantur.

Ex illarum genere, quia sunt clam exercitæ, multæ in obscuro latent; nec in cognitionem nostram deveniunt; & multo minor earum exstaret memoria, nisi aliqui Superiores videntes viribus imbecillem, sed animis vividum, ut opera metirentur non ex conatibus, sed robore corporis, per intervallâ eum interrogassent quas pœnitentias faceret? eum adjurantes, ut ex fide sibi eas exponeret: & ille ea sinceritate & obedientia quam deferrebat illi, cui loco Dei se sciebat obnoxium, ut divinæ voluntati obsequeretur, eas conjecit in chartam. Quarum aliqua folia post mortem ejus inventa sunt penes Superiores. Ex illis compertum est, quod initio vitæ religiosæ plus ejus fervoribus indultum fuerit: Verum ætate crescente, & viribus debilitatis, visum est Superioribus illos accidere multum, unde in ultimo autographo quod ab eo postulatum

tum est mense Novembri Anni 1661. paucis mensibus ante obitum, dum prædicaret Adventum Mediolani, annotatæ inveniuntur pauciores austeritates corporales, quam in aliis anterioribus; Ejusmodi tamen, & tam magnæ in homine sene, & exhausto, ut necesse fuerit, & illas ad moderationem revocare, possuntque in exemplum, & pro stimulo proponi junioribus, qui intuitu ejus sunt otiosi, & pigri, & sibi nimium indulgentes. Ac primò quidem ad actiones orationis mentalis & vocalis, adjungebat de suo poenalia opera situs, quæ efficacia forent ad augendam devotionem intimam & afflictionem extimam. Qualia erant se pronum abiicere in terram, linguâ suâ in pavimento formare cruces & brachiis extentis Christum in ea extensum figurare, facere per horam meditationem (dicit ipse in ultimo illo folio) de genibus, sine ullo sustentaculo cui inniteretur, in qua post primam mediam horam (res quæ videtur impossibilis) altera media hora modo perdurabat brachiis in modum crucis pro-

protenfis, modo lingua solum cruce signabat, modo prosternebat se in terram; quæ tamen subinde omittebat. Iisdem illis actibus secundum mensuram temporis quod dabatur, condiebat aliam mediam horam orationis mentalis, quam faciebat quotidie; quarta parte horæ, quam impendebat gratiis Deo agendis post Sacrificium Missæ, examini conscientie vespertino, stationibus obeundis, & aliis orationibus vocalibus per diem occupatus, semper brachia in formam crucis habebat distenta, & subinde terram osculabatur. In quibus occasionibus fuit quandoque casu deprehensus inadvertenter retinere signa in fronte & vultu terræ appressæ, & diu adhærentis. Officium divinum non interrompebat talibus molestiis, sed totum recitabat genuflexus, nulli rei innitens: ut observatum fuit etiam Lucæ quando incipiebat convalescere aliquantulum ex diuturno malo tibiæ quo laboraverat. Solis Dominicis dabat requiem suis brachiis, ne extenderet crucis more in oratione: prout confuerat

fuerat per plures annos aliis diebus facere: quibus asserebat nullam noxam per eam vexam adferri sanitati; quin imo multum spiritui accedere adiumenti. Cum esset sæcularis, genibus nudis fundebat bene multas & longas preces in solo duro & aspero; adeo ut sibi contraxerit plagas & vulnera, quæ illum ad curationem lecto affixerunt; nec amplius illi deinceps libertatem reliquerunt, ita se cruciandi. Videtur tamen quod Deus in vicem illi submiserit illam ægritudinem tibiæ, quæ diu, multumque fuit vexatus, cum intumesceret non sine magnis doloribus; potissimum cum Lucæ concionaretur, ubi summè ædificavit cum Dominum Decanum Sancti Michaëlis, summum amicum Patris, totiusque Societatis, cuius in domo morabatur; tum totam ejus familiam, singulari sua patientia, quæ totis diebus immobilis permanebat in sedili, elevatis pedibus, ad impediendum concursum humorum ad partem affectam defluentium; aut ad minimum quo posset quotidie concionari, ut fecit. Verum ultra hæc

constitit illi curatio illius mali multis purgationibus, balneis, & aliis medicamentis, quibus Deus ei lenocinabatur ut solet facere suis amicis.

Disciplinæ initio quando primum se dedit Deo, erant tam atroces, ut magna copia spargeret sanguinem; & Domina ejus Mater dicebat, quod tota inhorresceret cernens sabuculas, interulas, & alias vestes interiores horrendè cruentatas. Idem illud asperum regimen suæ carnis profecutus est in Religione, tam crudeliter in eam desævians, ut Fratres Coadjutores qui lineas vestes colligunt, deprehenderint delibutas sanguine: ac in Novitiatu & aliis Collegiis & domibus putarint se obstrictos, superiores de tota hac laniena certiores facere. Undè secuta moderatio, non tamen tanta, quin perseveraverit diu ferè usque ad mortem in consuetudine se flagellandi tribus, imò quinque vicibus, singulis septimanis, per illud spatium temporis, quo illi erat permissum, fassus se recitare tam tractim, quam posset, illos Psalmos *Miserere* qui erant ei assignati
ad

ad mensuram. Communiter deinde adiciebat ex devotionibus peculiari-
ter assumptis, quandoque triginta tres
alias disciplinas, ac similiter alias au-
steritates eodem numero singulis an-
nis, & alias diversi numeri secundum
devotionem, qua utebatur ad impe-
trandam à Moderatoribus extraordi-
nariam licentiam ad poenas, præter
statas, sibi infligendas; nec poterant
ejus fervori denegari; censeri tamen
debebant artificiosæ, subreptitiæ &
furtivæ. Nec minorem usum habebat
se macerandi cingulis ferreis mirificè
aculeatis, quæ pluries per hebdoma-
dam ordinariè gestabat, præter
vices, quibus extraordinariam ita se
affligendi potestatem sibi concedi de-
poscebat. Adeoque qui præerant in
concedendo parciores erant, conside-
rantes quam exesâ esset carne, exsuc-
cus, macilentus, exhaustus, & ita ex-
tenuatus, ut ipsemet sibi compatere-
tur: quia suo se Superiori manifestans
quoties vestitus in nudis asseribus dor-
miret, quod sæpenumero faciebat,
subjunxit: *Quantumvis macilentia me co-*

gat asseribus insternere pallium, aut vestem aliquam crassiore; alias dolor ossium non sineret me dormire. Et tamen, licet in sæculo illum rigorem quietis sine quiete usurpasset; non poterat tamen sibi temperare, utcumque labores diurni in Religione accessissent continui, & ætas & extenuatio. Quin ad minimum sibi in fine vitæ à P. Provinciali veniam postularet dormiendi vestitum, bis per septimanam, adjungens; non in asseribus, quia durante hac mea macie, timeo ne mihi nocerem, sed super culcitra. Cum autem & hoc illi esset negatum, modum adinvenit quo lectum communem redderet incommodum & dolorificum; uti fecit anno integro nominatim Mediolani, ubi dum degeret, & hyems ea tempestate esset acerbissima, & ipse indispositus ac multum exagitatus frigore diurno; voluerunt Superiores, ut lectus calefactorio prius illi calefieret, verum tot precibus & rationibus ingeniosè prolati institit, ut obtinuerit totâ hyeme facultatem lecto frigido se immit-
tendi.

Cæterum pœnitentiarum ejus fitis omnium maximè se prodidit in cibatu. Quando extra solemne jejunium accumbebat in refectorio communi, ipse quidem industriè abstinentioniam suam in sumendis cibis dissimulabat, quo oculos assidentium falleret; attamen non poterat tanta cautela uti in occultando, quin fuerit observatus & moniti Superiores. Sicut uno die Veneris Parmæ contigit, ubi visus fuit comedere tam parum, ut reflecteret qui ministrabat mensæ, & P. Rectorem certiores redderet. Ille præcepit; rediret ad mensam, & de novo pranderet; quod fecit suaviter subridens. Istam virtutem abstinentiæ jam tum quoque exercuerat in sæculo: adeoque dum esset Romæ tempore Anni Sancti in domo sui Nepotis, qui tum erat Prælatus in aula Pontificia, ut se subtraheret à cibis mensæ aliàs frugalibus, & sua jejunia subduceret censuræ domesticorum; prætexuit, nescio quam causam edendi privatim in cubiculo, & mandatum dedit nihil sibi pararetur præter panem & jusculum

commune: quâ refectione compluribus diebus contentus ibi victitavit; oportuit autem ei in hoc obsecundare, ne reciperet se alio, ubi liberius fervoribus suis fræna laxaret. In Religione vero abstinentiæ ejus erant tantæ, quantæ permittebantur. Et ut erat ingeniosissimus in modis excogitandis ad petendum & obtinendum: semel ab uno Superiore impetraverat plenam facultatem faciendi circa victum quidquid sibi videretur: eo quod polliceretur, cohibiturum se intra eos terminos, quibus non læderet sanitatem. Sed æquè periculosus judex est ejus quod prodest quam quod nocet valetudini, qui summo odio contra gulam unâ & summo affectu erga abstinentiam agitur. Suo ergo arbitrato relictus, ut postea revelavit, fixum habuit ordinariè jejunare diebus Mercurii in pane & fructibus; Veneris in pane & vino. Sabbatho prout consuetudo ferebat, ita tamen, ut sibi interdiceret, uno genere cibi solito dari tali die; causatus ab illo stomachi abhorrescentiam. *Non tamen hic mos, inquit,*
dura-

duravit longo tempore, quia Superiori fuit indicatum me varia edulia omittere. Voluit ergo à me distinctè intelligere, quid facerem? Etiam si autem illi dicerem, non sentire me dispendium; & revera videbatur mihi ita se rem habere; voluit tamen ut diebus Mercurii & Veneris tantum portionem relinquerem. Ergo in ista Novena Virginis Deiparae, in qua feci hanc relationem, fateor me non nihil amplius sumpsisse, sed admodum parum id fuit, & expertus sum id mihi potius profuisse quam nocuisse. Superioribus postea consilium fuit non solum in illum animadvertere, quando degebat in nostris domibus; verum etiam, & fortassè diligentius, quando versabatur in itineribus, & hospitabatur tempore concionum in Episcopiis, aut aliorum domiciliis: ac propterea quando Genuâ Lucam abibat prædicatum, P. Præpositus accerciri curabat quemdam Patrem è tertio probationis anno, qui esset illi socius, & injunxit, ut in rebus valetudinem concernentibus P. Antonius illi obedi-
ret; quod si obvenirent illi quidam fervores non communes, & desideria in

rebus potissimum quæ poterant esse consequentiæ; semper communicaret cum illo, & exploraret ejus judicium. Quod humillimè executus est. Et quidem quamvis libertas illi sublata esset, per quam indiscretionis subiisset periculum; non destitit tamen deprecari, & obtinere abstinentias aliquanto moderatiores, in quibus visus est cum notabili frequentia continuare, existimans sibi licitam quamdam speciem epikiæ, multum diversam ab ea, quâ subinde alii obsequuntur suis sensibus: eratque hæc: quod elicitæ quadam licentia ex ore cujusdam Superioris, eâ uteretur adhuc dependenter à consensu alterius, cujus directioni erat commissus; susque deque habens utrum mutatæ essent circumstantiæ laborum, debilitatis, & aliarum occupationum ac temporum, quas alius requireret; sed tantum considerans quid esset de novo observatum & moderatum.

Porro is qui genium suum ita fraudabat in victu ordinario & necessario, facile est colligere, quanto minus sensibus obsecundaret in iis quæ lautitiam
&

& delicias præferrent. Si mensæ inferretur cibus aliquis delicatus, forte in eleëmofinam submissus; statim illum Deo donabat. In eduliis communibus, si quidquam erat in totum aut ex parte melioris conditionis, ex toto vel ex parte non tangebat. Illud quod dari solet supra reliquos Concionatoribus, tamquam necessarium ad restaurandum exhaustas vires; quasi superfluum ferè semper intactum remittebat & inviolatum. Vix venerat Cremonam ad prædicandum; quam mox flagitavit ne quidpiam sibi apponeretur vel amplius, vel diversum à communitate. Cum postea transtulisset se ad Episcopium, ut per quadragesimam ibi habitaret; patravit mirabilia in omnibus, quæ austeritatem vivendi quam servabat: quippè per puram necessitatem & obedientiam attinent. Coactus vesci carnibus, non voluit plus sibi in mensa dari, quam tres aut quatuor uncias, cum jusculo sine sale, & modicum postpasti. Vesperii autem pro cœna non admittebat nisi pulmentum aliquod quod desiderabat esse ex pane

aqua macerato confectum nullo condimento Salis adhibito, ut plus insipidum esset. Lucæ testatur Socius, quod noluerit esse singularis in quærendo, ut sibi apportaretur hoc vel illud obsonium, quantumcumque parum videretur. Sed ex iis, quæ vel Medici, vel socius curaverant illi apparari, sumebat semper pessimum, & in tam parva quantitate quam fieri poterat. Ea propter socius, qui illi adhærebat per quadragesimam in Episcopio Cremonensi, dixit eum sibi visum perpetuum miraculum, quod tantillo cum cibo par esse posset laboribus concionum, quas faciebat tantâ cum alacritate & contentione, ac si fuisset homo validus & robustus. Multo magis recusabat omne genus lautitiarum, quæ offerebantur tam à nostris, quam ab extraneis. Exemplo sit, quod cum Festo Sanctæ Catharinæ Parmæ exhortationem habuisset in Collegio Nobilium, invitatus ad prandium noluit ire; & patinam honorariam, quæ illi fuit missa ad Collegium Sancti Rochi, cum illi apposita esset, reliquit illibatam.

ram. Sæpius de illo quæstæ est Domina Maria Magdalena Durazzo, ejus Soror Germana, quod cum voluisset illi dare aliquantum sacchari rosacei, aut quid similium confectionum, quibus valetudo ejus egere videbatur, si-
ve multum illud esset, si-ve parum; semper rejecisset; quasi monstraret se de-
dignari tales reculas minutiores, sed re-
vera non erat nisi heroica accuratio, ob quam deliberatum illi erat genio
nil indulgere, quod delicias præfer-
ret, quantumcumque exile. Ut illi subministraret pocillum electuarii, una
cum quatuor rosariis, opus fuit trade-
re Socio occultè deferenda, & per Su-
perio-rem adigendus, ut acceptaret.
Numquam tamen voluit illa admitte-
re, nisi in usum aliorum. Posset videri
cui-
piam esse saltare extra orbitam, si
hoc loco dicerem, numquam con-
quæstum esse de obsoniis, numquam
auditum fuisse aperire os super cibo
bene, vel male apparato, aut quod
parva fuerit habita cura suæ sanitatis
tam labefactatæ. Quam sæpè tamen
hoc monstrum in Religiosis personis,
se.

se prodit; quod cum gravi sensu priventur eo, quod habent; & cum passione murmurent sibi deesse, quod non habent. Quam longè aberat ab hac illusione P. Antonius Iulius! numquam desiderabat habere, sed semper non habere, quod carni, & palato blandiretur.

Omnis ejus quærimonia erat de poenitentiis, quas credebat se posse subire, & tamen illi à Superioribus vetabantur; apud quos assiduè instabat, nec desisteat, licet sæpius repulsam passus, ut sibi in eo satisfaceret, sicut olim dicebat B. Aloysius Gonzaga, quod sibi ipsi non defuisset. Suo Magistro Novitiorum narrabat frequentia jejunia, quæ in sæculo peregerat in pane & vino, nudos alseres in quibus somnum ceperat, & alias species asperitatum, quibus se afflixerat; ut persuaderet sibi adhuc vires iis pares suas peresse: illique exercendis licentiam extorqueret. In illo autographo, in quo paucis ante mortem mensibus declaravit (sicut dictum est) P. Provinciali cupido restringere Poenitencias quas

quas faciebat; tantum abest ut cogitaret debere eas diminui, quod postquam exposuisset voluntarias istas pœnas, quas assumebat, subjunxerit: *Cum ita se res habeat, quod per illas pœnas nullum corpori dispendium accersam; videtur mihi, postquam vires meas mensus sum, probabile esse; sine detrimento sanitatis posse me aliquanto pluries, pœnitentias enumeratis adungere. Petiit ergo quinies per septimanam se flagellare; tertio aut quarto catenulis se, aut cilicio constringere; dormire vestitum; tribus vel quatuor diebus jejuna- re; & aliquot in pane & vino; allegans experiri se nihil magis sibi conducere, quam sobrietatem; quibus rationibus addebat inflammatas preces, ut sibi concederentur; multoque magis ne acciderentur illæ austeritates, quas faciebat, onerans conscientiam Superiorum damno Spirituali, quod incursum se putabat ob nimiam indulgentiam. Undè in alio folio ejusmodi postulationum ita concludit: *Si R. V. velit aliquid pœnitentiarum defalcare, considerandum relinquo: quod quantum attinet*
*ad**

ad partem corporis, pro certo mihi persuadeam; si desinam facere sicut usque modo feci, notabiliter spiritum debilitandum; nisi hoc modo per pœnas excitetur. Etenim hæc est mea miseria, quod nisi sicut cæpi, integrum cum conservem; exponar præsentissimo periculo, post primum passum, quo retrogrediar; secuturos multos. Præterea sensibiliter mihi impressum habeo, quod pauca illæ mortificationes me facient minus tepidum, & interius distractum; quin imo occasio erunt ut ministerium verbi Dei obeam majori cum alacritate, & puritate intentionis, ac zelo salutis animarum, gloriæque divinæ; quod utique sperandum non est sine illis. Ab eo tempore, quo multis austeritatibus jussus est supersedere, & ipsemet cognovit se non posse eas assumere; studuit supplere hunc defectum aliis mortificationibus, ex illarum genere, quæ non incurrebant in oculos, ut prohiberentur; vel non nocebant corporis sanitati; attamen animæ cupiditatibus non minus erant acerbæ. Quomodo in eo se gereret assequi possumus è quibusdam suis propositis, quæ scripta reliquit, & ita sonant:

nant : Nunc cum deinceps non possim pro
meis, tantis & tam gravibus peccatis, fa-
cere pœnitentias majores ob corporis imbe-
cillitatem; dabo me studio abnegationis mei
ipsius, in rebus gloriosis, & permittam me
superari in contentione ingenii: quia licet
hoc quoque debilitet corpus, nihil obest quo-
minus hoc faciam: tot enim mea delicta
traxerunt originem ex radice propria exi-
stimationis: & alio in loco hoc firmat
dicens. Si non possum, quæ deberem per-
ferre, stante hoc mei corporis languore;
quare non patiar ad minimum ubi possum,
& patiendo non officiam valetudini? In
laudibus meis reiiciendis, permittendo me
vinci ubi certamen erit de ingenii præstan-
tiâ, omittendo conceptus in concionibus ma-
gis argutos, & plausibiles, quam utiles; re-
linquendo cibos delicatesiores & sapidiores:
&c. Quæ quam studiosè impleverit &
ex animo à se impetraverit, norunt il-
li, quibuscum convixit, & ea quotidie
videre potuerunt.

Itaque non contentus refrænatione
gulæ in ciborum abstinence, juxta
celebre monitum S. Bernardi, cogita-
vit progredi ad mortificationem inge-
nii,

nii, & aliorum appetituum. Unus eorum fuit erga Musicam, in quam propendebat ex naturæ genio, & habitudine ad perfectionem formata, ob peritiam artis, proinde subsidio cantionum spiritualium elevabat cor suum ad Deum, replebatque affectibus sanctis. Et quidem dum esset Romæ itabat libenter ad Oratorium S. Philippi Nerei, ubi exercitia miscentur modo concionibus, modo musicæ modulationibus devotis. At recordatus quod in annis juvenilibus deliquisset, ea abutendo ad quampiam vanitatem; cogitatio subiit, eâ prorsus abstinendi ad castigandum priorem defectum. Sane ibi Romæ consuluit Professore Religiosum, utrum consultum illi esset se in eo mortificare, & voluptate illa innoxia se privare; de quo illi tum inciderat dubitatio. Postea fervor ejus quotidie incrementum sumens, eam sustulit, & certum reddidit fore hoc Deo gratius; atque ita fecit, uti repertum est in uno dictorum foliorum, ubi insit: *Me summe recreat Musica, sed quia mihi servivit in seculo pro uno ex instrumentis, quibus offendi*

*di Deum ; statui me in ea mortificare non accedendo loca, ubi ei interesset, ne quidem quando sit in nostra Ecclesia. Nec solum privabat se ea modulatione, verum etiam domestica recreatione, quæ erat illi dulcior harmonia, quam musica ; quia multum delectabatur conversatione religiosâ : ideoque in sæculo sæpè sæpius adibat cœtus religiosos, ut eorum Societate frueretur : quin imo compluribus diebus apud eos persistebat, ut talentis eorum se pasceret, & proficeret in virtute, ac doctrina. Coërcebat tamen illam ipsam relaxationem tribus illis diebus, quibus per septimanam jejunabat, abstinens consentientibus superioribus ab ordinariâ recreatione ; quamvis non diu hoc illi licuerit ; quippè præterquam quod salubre ejus valetudini esse non poterat, confestim à sumpta refectio-
ne se subducere ad seria peragenda ; redundabat in præjudicium aliorum, quibus erat delectabilius omni Musicæ concentu commercium P. Antonii Iulii, acceptum æque ac utile, ob amabilem ejus, & religiosè compositum mo-
T dum*

dum agendi. Ipse vero insuper ut minimum egebat communi recreatione, quia reliquo tempore erat ita abstractus, & solitudinis amans; ut nisi in cubiculo suo vel templo, nullibi umquam reperiretur. Cubiculum illi serviebat ad devotionem magis collectam, & internam vacationem; ad parandas conciones; & ad incommoda, quæ variæ tempestates anni causant toleranda. Illâ æstare, quâ de bona Morte ratiocinabatur Genuæ, habebat cubiculum calidissimum, licet in eo totis diebus studiis se occuparet. Repertus ibi per intervalla à quodam Patre, & interrogatus, qui posset isthic tam diu perdurare; cum alii qui versabantur in cubiculis minus molestis, ab æstu iis expulsi, discurrerent per domum, alibi quærentes aliquod refrigerium: respondit, quod potius inde sentiret levamen; etenim cum consueffet multum pati à frigore, calore illo refocillaretur, & novum hauriret vigorem; & utcumque guttæ sudoris crassiores stillarent à fronte, vendebat tamen illas pretio gemmarum ingentium:

tium: Quia per illas comparabat tantam & tam ingentem copiam animarum converfarum, & meritis cumularum, quas Deo lucrabatur.

Aliarum Mortificationum publicarum complures faciebat in culina & Triclinio, ubi non solum erat accuratus in ministrando & lavando diebus assignatis (volebat enim juxta alios nomen habere in tabula, & aliis in iis ministeriis esse æqualis, sine ulla exceptione: Imo etiam si concionandum illi esset, neutiquam se excusabat, ne quidem diebus, quibus dicebat) sed insuper obibat functiones illas viles, sordidas, & molestas cum impigra applicatione, diligentia, & desiderio patiendi, & in iis se fatigandi. Fratrem autem illum qui solet monere, quando à lavando cessandum esset; impensè rogabat, ne se missum faceret, sed quam tardissime abeundi potestatem daret; & dicebat magno cum affectu: sibi margarita cariorem esse quamlibet lancem, quam pro amore Dei sibi purgandam daret, nec voluisse pro omni auro mundi perdere quæstum similis

diei. Tanti faciebat valorem operum poenaliū, quæ Christus Dominus noster suo exemplo reddidit pretiosa. Adhæc multoties cernebatur in medio refectorii comedere in terra; & in exercitiis ejusmodi mortificationum eligebat semper situm corpori molestiorem. Si illi à Superiore negarentur, tamdiu manebat de genibus supplicans; ut, ne contristaretur, opus esset illi permittere. Et fuit profecto rarum exemplum in isto, quâ propter frequentiam, quâ propter humilitatem, quam in eo prodebat. Numquam illi venit in mentem esse similia exercitia magis juvenum, quam viri quinquagenarii: quin potius è vestigio advolabat ad tales actiones cum junioribus; & in quibusdam locis, ubi non est moris eas obire, nisi ad primam mensam; quando venire tum non poterat, obtinebat, ut faceret etiam solus in secundâ. Denique tam altè imbiberat istum spiritum mortificationis ut non solum in his & aliis operibus perpetuo illum manifestum faceret, verum etiam ex plenitudine cordis redundabat in verba: proin-

proinde — semel cum esset in Novitiatu, discurreretque cum Tyronibus de virtutibus B. P. Francisci Borgia, cujuseo die festum celebrabatur: multum extulit in illo spiritum ejusmodi mortificationum, & dixit: Ecce quomodo Sanctus ille Pater impellebatur ad poenitentias; & nihilominus aliqui mihi inculcant, oportere me in illis circumspectum esse, & magis moderatum; & concludebat, cum significatione magni sensus: quod omnes Sancti per istam viam transiverint, eamque esse prorsus tutam & securam.

C A P V T XII.

Rigida Paupertas P. Antonii Iulii.

Materia poenitentiae omnibus numeris absolutae, secum infert Paupertatem Christi. Cum igitur P. Antonius Iulius fuerit tam sollicitus ad procurandam materiam aliunde, non fuit segnis in hac concupiscenda, quae ex paupertate illi in manus deferebatur. Erga quam demum in saeculo,

Deus illum sensim disponens ad virtutes religiosas, indiderat magnum affectum; & id ipsum monstrabat non solum exhauriendo se largis eleëmofynis, quas sine modo erogabat; sed etiam eam amplectendo, ut sponsam, & in seipso laudabiliter exercendo. Ex illo enim tempore satagebat gestare vestes, chlamydes, & pileos attritos & labefactatos ex vetustate; & se ostentare tam abjectè more pauperum indutum, ut dictum est. Et Genuæ quidem, ubi ad Senatoria subsellia evectus fuerat, cum esset filius Ducis, & in aulis Principum admirationi: & Romæ, ubi habebat Nepotem Prælatum, ex cujus domo quotidie, prodibat in publicum; plus pompæ præ se ferebat in sordidâ paupertate, & insignibus Christi; quam in prætextâ & pileis Cardinalitiis ac purpura suorum Consanguineorum. Et quando Tirocinium ingrediebatur primo accessu, indutus erat calceis tam pessumdatis & caducis, habituque tam abjecto, ut appareret eum nil deportare ad domum religiosam, nisi humilitatem & paupertatem Christi. Genuæ
in

in domo Professâ , procuravit caute per famulum Sartoris, mutari pallium, quod habebat affatim bonum, in aliud notabiliter pejus, & centonibus confutum, donec Superior id reprehendens iussit illud tolli, & aliud subrogari. Alias in eâdem domo Genuensi cum haberet calceos, non leviculos, nec delicatos, nec ex corio molliori (numquam enim tales admittebat) sed communes, & Religioso congruas, & pro quocumque alio tolerabiles: non acquievit tamen, sed ivit ad futorem, & titulo quæsito, nescio cujus reparationis, ibi, quasi pro exiguo tempore reliquit, donec reficerentur; obtinuit & retinuit par calceorum vilium, antiquorum, perforatorum, & abjectorum, utpote nulli deinceps usui servientium. Nam illud *interim* seu *exiguum tempus*, duravit diu, undè fuerunt quidem priores restituti, postquam refectioni essent; sed ille adinvenit nescio quid, unde diceret istos tam viles & pauperes sibi magis commodos; tantumque effecit, ut sibi relinquerentur. Eâdem astutiâ narratur sibi pro-

vidisse de vestibus summam paupertatem olentibus, & delegisse semper pauperrimum omnium rerum, quæ illi subministrabantur. Neque enim solum servabat summam Paupertatem in vestibus, quantumcumque laceris; sed præterea summum rigorem, cavens, ne quid superfluum in utensilibus haberet. Moris illi erat recusare etiam necessaria, si in illis non esset quod pateretur. Quemadmodum Taurini ei evênit; ubi cum per frigidissimam hyemem moraretur, Frater qui debebat ei providere; testatur, se debuisse multum obsecrare, antequam posset inducere, ad admittendos pannos sufficientes arcendo frigori: quorum onere tamen censebat se multum gravatum & afflictum. Non tantummodo interea dum versabatur in domibus Professis & Collegiis, in quibus alio modo suppleri defectus vestium poterant, gaudebat se sentire effectus sanctæ Paupertatis; sed volebat etiam eam esse sibi comitem in itineribus, quæ conficiebat tam frequenter, quam mos est Concionatoribus, qui multum re-

qui-

quiruntur in Italia. Haud sibi umquam volebat copiam fieri, hujus vel istius suppellectilis; sed acceptabat sine mora, quod erat allatum, nisi videret nimis laute sibi provisum, quod tum sicut aliis vicibus contigit, recusabat. Fuit tamen digna relatu, & religiosa contentio, quæ visa est Taurini inter charitatem Superioris, & paupertatem P. Antonii Iulii, quo inde discedente in Ianuario, frigidissimâ anni, per id tempus, præter morem sævientis, tempestate. P. Rector homo præstantis Charitatis, jussit ei paulò supra receptam consuetudinem prospici de iis, quæ contra inclementiam auræ rigidioris, eum tueri possent. Verum Pater ægrè id ferens, non poterat induci, ut iis se communiret ex affectu erga paupertatem, existimans se futurum perinde ac Davidem; non armatum vestimentis Saul, sed impeditum. Atque hinc per intervallum quo ipse hoc deprecabatur, & alii quibus demandata erat cura ut apparatus provisionis adferrent, jucundissimum exhibebatur virtutis religiosæ spectaculum, termi-

natum ut ratio exigebat, in eo, quod paupertas aliquo quidem modo cederet, sed magis tandem victrix evaderet Charitas. Multo minus afficiebatur rebus, quæ alias erant illi subministratæ, quasi iis semel acquisitis, consecutus fuisset *jus in rem* : sed iis omnibus erat contentus cum humilitate, tantumque ei videbatur, quod nimium ei deferretur : atque adeo malebat per vias incedere veste ad cingulum accincta, cum aliquot chartis in sinu, & clepsydra in sacco ; quam habere bulgam ad res suas deportandas. Erat omnibus suis exutus bonis, saltem quod ad usum attinet, quia quantum ad dominium fuit judicatum ad Dei servitium satius, illo se non abdicare, ante professionem solemnem quatuor votorum. Ita tamen de facto omni possessione se privaverat, ut ne vestem quidem aliam peteret à Domina Matre, quæ tamen erat administratrix bonorum ejus, nec ab aliis propinquis rem quamcumque, etiam minimam in usum suum, nedum pecuniam ad coëmendam ; volens se holocaustum præbere

bere undequaque perfectum. Si ex occasione itinerum, quæ debebat emetiri, quisquam vellet ei subministrare quidquam, quo putabatur opus habiturus, ipso incio agendum erat cum Superiore, qui juberet eum accipere. Et si ad sublevanda Collegia in modum viatici illi quandoque darent aliquot nummos, non volebat illos usurpare tamquam peculium aut fructum suæ industriæ, sed ut daretur Collegiis in Eleëmofynam, & illa iis uterentur in toto & in parte, perinde ac si Superiorum arbitrio servati essent. Atque hac parsimonia, & aliàs, serviebat sibi de viaticis, quæ recepta erant à Collegiis nostris, & domibus, vel Ecclesiis, & Prælatis, quibus se impendebat prædicando; cum tantâ cautela, ut non dumtaxat nihil largiter expendere in res superfluas, vel puras putas commoditatis: sed volebat, ut socii sui darent exactè rationes; & ut ita dicam, licitarentur cum cauponibus, nautis, aurigis, & mulionibus ac viarum ductoribus de mercede: hoc enim modo, inquiebat, profitemur nos pau-

peres Religiosos, & videmur quiddam alienum erogare; & maximè de patrimonio Ecclesiæ, æs Christi & pauperum. Ita se totum abdiderat, & abjecerat in sinum Paupertatis, ut sui immemor, si illa solum sibi præsto esset, putaret sibi abundè omnia suppetere. Fertur quod aliquoties dederit se in viam sine obolo in viaticum, dum socius putat sibi Patrem illud curasse, & Pater non cogitat aliud, quam se esse pauperem, & explorandos sibi esse effectus indigentiae, nihil prorsus expectiit; donec in progressu itineris aperuisset se defectus, & attineret ad socii industriam illi occurrere: tunc enim patuit error nimiae in utroque confidentiae: Nonnumquam non obstante sollicita charitate in providendo, disposuit Deus, ut non esset proficiscenti prospectum: atque ita habebat quod desiderabat: nempe usum, & experientiam paupertatis. Faciebat iter Romanam versus per hyemem, & casu venit Florentiam solus. Solus statuebat discedere. Sed Superior illo clam curavit illi vectorem, qui illi esset dux-
que

que, comesque viæ: & cum cerneret illum pauperis more malè instructum, dedit illi quædam subsidia pellendo frigori: restitit quantum potuit ne hæc & illa admittere cogeretur, satis se contra injuriam temporis munitum esse ratus panopliâ Paupertatis. Quamvis postea cum omni grati animi significatione, & per litteras, & ore tenus profecutus sit hanc curam, & memoriam servare se ostenderit officii, quod benefactor in eum contulerat.

Numquam visus est esse molestus Superioribus aut officialibus ad obtinendum cubiculum, vel ornamenta ejus, vel lecti mobilia, vel libros, vel alias res quæ ad usum quotidianum spectant: imo ne quidem aperire os, nisi ad deteriora postulanda. Quidquid illi assignatum erat, prout inveniebat, sive esset multum, sive parum perinde habebat, & tale relinquebat, & quia subinde parabatur ad modicum tempus, eo quod commoratio ejus in locis illis, non erat futura diuturna: conclave erat aliquando
tam

tam pauper & male instructum, ut vix videretur personam ibi honestam habitasse.

Non tam male erat compositum, licet satis miserè instructum cubiculum, in quo exceptus fuit Taurini, quando eo ierat concionatum : cumque P. Rector apud eum se excusaret, quod tam malè habitaturus esset ; adduceretque pro ratione angustias Collegii nondum fabricati : ille cum modesta hilaritate respondit : Non possum tamen credere non esse Collegium non dignissimum, & quod spectat ad materialia bene ædificatum, cum obtingat cubiculum tam egregium mihi, cui omni titulo debuisset longè pejus assignari. Breviarium quo utebatur, absit ut esset auro oblitum, imaginibus elegantibus instructum, ligaminibus sericis, aut claustris æneis ornatum ; sed tam vetustum, & dissutum, ut vix cohæreret. Libros, iconculas, rosariola, tabellulas pictas, vel ad usum suum, vel ad donandum ; nec volebat, nec habebat : usque eo, ut cum post obitum ejus multæ personæ
fol-

solicitarent aliquid regularum ejus accipere pro sua devotione, difficile fuerit reperire quidpiam, quo nonnullis satisfaceret.

Cum esset tam accuratus, quam dictum est, & adhuc dicitur in formanda sua vita ad mensuram horarum & semihorarum & quadrantium, quem in finem semper secum in civitate, & per viam portabat clepsydram; fuit res magnæ ædificationis, quod numquam habere voluerit horologium portatile rotatum, vel aliquid, quod in speciem esset pretiosum, vel curiosum, quæ ornamenta non amat sancta Paupertas, sed potius ferebat incommodum portatu in sacco vel sinu horologium arenarium; quod sine magno labore poterat conquirere. Quid deinde? Conciones suas quæ Concionatoribus pro thesauro sunt, volebat insuper in paupere forma esse compositas: non in charta tenui, nitida, & integra, sed in fragmentis eas scribebat; & aliquas, quod mirabile, quando hospitabatur in aliena domo, non tantum in dorso Epistolarum, quas rece-

receperat (ut nonnemo sibi imaginatus fuerat) sed intra lineas, & lineas, quando tanto intervallo unæ ab aliis distabant, ut una interiici posset. Ut videre fuit in aliquibus ejus concionibus, quæ ab ejus morte repertæ sunt. Quapropter ob despicientiam sui, & humillimam paupertatem auctoris, qui tam parvi eas æstimabat, in memoria posterorum vivere merentur, & in pretio haberi.

Alio modo industriæ usus est studiose, ut tractaretur pro paupere; videlicet in recusando omne genus servitii: aiebat enim veros pauperes non solum carere debere facultatibus, & vestibus splendidis, sed etiam personis, qui illis serviant. Idque observabat constanter non permittens sibi ministrari ab ullo, vel juvene, vel Novitio in persona; seu cubiculo; nisi ex vera & pura necessitate. Et inter sua proposita habebat notatum: *In cubiculo habere scopas, & verrere: nec non acum cum filis; ad suendas, & reficiendas vestes.* Quod ipsum exercuerat in sæculo, postquam Sacerdotio initiatus esset. Erat hospes

in Novitiatu Genuensi, ut istic exercitiis Spiritualibus vacaret: petiit clepsydram à Novitio, & interea temporis, quo vadit ille quæsitum, Pater sequitur illum pedetentim ad cubiculum, & ibi foris ad januam mansit stans instar mendici præstolantis eleëmofynam; donec Novitius ignarus eum se subsecutum, absolvisset nescio quid operæ, quod habebat prius faciendum, & egrederetur ad dandum quod petierat.

Contigit in domo Professa Mediolanensi mutandum illi fuisse cubiculum. Non quæsit alicujus auxilium qui eum juvaret in transportandis reculis, quas habebat ad usum: sed cum vix haberet quidpiam præter sua scripta, & pauculos libros omnes conjecit in saccum, & ipsemet expeditè transtulit solus. Occurrens Superior interrogavit, quare non implorasset opem alicujus, qui eum illo labore liberasset? Respondit: illud exercitium mirificè prodesse suæ sanitati.

Parmæ hyëme rigidissima cum non potuisset obtinere ut in lecto frigido

se componeret ad capiendum summum, voluit supplere molestiam sibi ipsi serviendo; & quantumvis à Superiore esset designatus qui illi ministraret de omnibus, semper ibat ipsemet quæsitum ignem calefactorium, tam ad mitigandum frigus, ut minimum quantum permetteret obedientia; quam ad compensandum parvum commodum caloris, cum incommodo proprii servitii, sine molestia cujusquam in domo. Cum diceret ad populum Taurini concionem suam mandabat memoriæ, ad focum communem; ibique quandoque visus est torrere super carbonibus frustum panis, quod abstulerat ex refectorio; atque ita edebat; & illud erat unicum confortativum, quo subinde ante concionem viribus consulebat; postulatus ad minimum sibi ab aliis illud apparari sineret, & intingi vino; ut plus inde vigoris hauriret; recusavit: usus excusatione parum probabili, nimirum quod simplicia plus conferrent substantiæ: sed revera volebat ut ille delicatus bolus transfiret per manus aliorum. Quando dicebat per
qua-

quadragessimam, Fratres, qui ei dati erant Socii, habebant bene plus negotii ad illi persuadendum, ut permitteret sibi serviri, quam opus erat impendere aliis nonnullis, quibus numquam fatis erat, quod fieret: non patiebatur sibi sterni lectum, nec excitari ignem in cubiculo; nec alia obsequia admittebat, quam quorum insuperabilis necessitas esset mensura. Quod si aut per incuriam, aut per impedimentum ejus, cujus erat providere, quid occurrisset patiendum; cum gaudio, & exultatione cordis sibi plaudebat in silentio, & spe; cum nullis loquens, nisi forte cum Deo; sicut quando Taurini fuit inventus in oratione post concionem, offerens Deo molestiam illam, quod non daretur sibi post fatigationem vires restaurare, & curare exhaustas.

Relatum est quâdam occasione postremi sui, ac fatalis morbi, quam timida fuerit ejus modestia in exigendo servitio; ut eum illi, cui incumberebat, excidisset calefacere lectum, in quem coactus erat se recipere post concionem, ad necessariam dejectarum vi-

rium restaurationem ; ne mortificaret Fratrem commonefaciendo illum commissæ oblivionis conjecerit se propter erat sudore madens in lectum frigidum, unde contraxit tremorem, qui fuit principium alterationis febrilis. Non tanti periculi, sed singularis modestiæ, non solum in recusando ne sibi serviretur, sed etiam in præventionem ne incommodo esset aliis, censendum est illud, quod fecit in adventu Senam, ad ibi concionandum ; huc cum Florentiâ delatus esset solus, & fatigatus ab itinere, semel pulsaverat leniter campanam, nec Portarius aperiebat portam ; hæsit ibi diu foris stans, nec secundo pulsans, prorsus instar pauperis, qui reverenter stipem expectat : Unde Nobilis familiaris, & valdè addictus Patribus, qui observaverat, quam diu ibi moratus esset, suspicatus esse peregrinum, & imperitum moris, ostendit illi campanæ funiculum, dicens quod oporteret illam sonoram facere. Respondit Pater : non velle se Patribus incommodum parere, quos sciret fortasse accumbere mensæ : atque ita mansit

fit ibi expectans ad mediam circiter horam ; de quo adhæsit Domino illi singularis ædificatio , & narravit uxori , quæ de eo , & aliis virtutibus P. Antonii Iulii per plures annos vivam memoriam retinuit. Et anno post mortem ejus proprio motu, absque eo quod esset ad hoc requisita , extollens eximias ejus virtutes idem retulit , adiciens multa alia encomia in laudem defuncti P. Rectori Collegii istius, in quo Pater reliquerat multa præclara monumenta devotionis, Paupertatis, Humilitatis , & Observantiæ religiosæ, quæ grata recordatione digna sunt celebrari. Simili modestia, quamvis cum minori patientiæ tolerantia, multo tamen & frequentiori incommodo, solebat sæpe-numero ad januas quoque, quæ sunt in ambulacris & locis publicis per domum, & erant clausæ, subsistere; ne cuiquam molestus esset, ut cito aperiret, nisi casu supervenisset: & pluries rogatus cur non deportaret secum clavem communem? Vel culpabat suam oscitantiam; vel dicebat modestè, quod Deus vellet aliis dare occa-

sionem, faciendi sibi eam charitatem; quam recipiebat tantâ cum humilitatis & modestiæ testificatione, perinde ac si esset vere unus ex pauperibus, qui non audet intrare portam alterius; & minimum officium, quasi sibi indebitum cognoscit.

Denique quam magnus in eo fuerit amor religiosæ paupertatis vel inde colligere licet, quod verbis suis eum aliis inculcaret. Patefecit hoc in uno è celeberrimis Monialium cœnobiis Genuæ, in quo cum unaquæque haberet suum peculium, communitati non erat ita provisum, ut ratio poscebat. Præfecta, ut erat Dei famula integerrima, & fœmina singularis prudentiæ, pietatis, & virtutis religiosæ, de eo sensum suum satis prodebat; verum se animabat, confidebatque, quod Deus tandem aliquando efficax remedium esset illi excessui subministraturus; & vero spei ejus respondit eventus: quodam enim die venit eò Pater Antonius Iulius, ut in illo monasterio exhortationem haberet spiritualem. In ea discurrebat de virtutibus religiosis, eo affectu quo sole-

lebat; tandem dilapsus est sub finem ad laudes Evangelicæ paupertatis, & perinde ac si esset Sampson novus, in quo irruebat Spiritus Domini, in messem Philistinorum immisit ignem. Etenim illas docens quam pulchrum sacrificium futurum esset, si omni se proprietate exuerent, quantumcumque regula, aut consuetudo recepta eam permitterent; & omnia sua in commune deferrent, ac spoliarent se omni affectu particulari erga ista fluxa amore sui sponsi, qui ex amore earum, se fecisset extremè pauperem: tam ardentè & potenter peroravit, ut corda illarum Monialium igne Spiritus Sancti repleverit: quia postridie omnia sua tulerunt Matri, ut disponderet in communitalis usus, mille nempe & quingentas libras argenti, quas quælibet possidebat ad usus proprios, quarum proprietate se exuebant; ita Deus per servum suum ex cordibus earum expulerat cupiditatem pecuniæ, ut eam consecrarent Deo; cui ut sacrificium esset acceptius, se ad eum modum expurgarunt, ut vellent evulgari

se decrevisse deinceps vivere in illa perfecta paupertate.

C A P V T XIII.

*Obedientia & regularis observantia P.
Antonii Iulii.*

Pietati, Mortificationi, Pœnitentiæ & aliis suis virtutibus conciliabat securitatem P. Antonius Iulius characterē religiosæ Obedientiæ, quæ fuit in tali viro plurimum admiranda; eo quod ingressus esset Societatem jam maturus: cujus ætatis videmus quosdam intrasse quandoque in Religionem, sed paucissimos illorum se ita accommodasse, ut essent in omnibus obsequentes, utpote longo tempore affueti vivere suo arbitratu. Nec solum erat vir provectus; sed in Senatorio Patriæ suæ munere versatus, solitus imperare, & suo consilio regere præter privata, insuper publica negotia. Ad hæc pollebat ingenio acri, & tenaci suæ opinionis, ac sententiæ, ut videre erat quando obedientia aut paupertas

voluntaria eum non cohibebat; quod non facilè se pateretur dimoveri à suo iudicio maximè in objectis, quæ speciem boni præ se ferebant: quæ res potuissent multum eum labefactare, & imperfectum reddere in obediendo: verum enim vero cum ita esset obnoxius illis periculis, ad quæ solent abripere parum ordinati fervores, ut Patres ejus amici & voce, & litteris admonuerint, singulariter, huic hosti debellando sedulam operam navaret; tanta cura in hoc bellum incubuit, ut non obstante lucta difficillima, evaserit obedientissimus in summo gradu, quantum ullus juvenis, & quantum ullus Novitius; vere conversus, & effectus, sicut parvulus, ut testati & admirati sunt omnes, quotquot habuit, Superiores: & ut demus aliquod specimen, satis erit dicere, eum, quod concernit munus Concionatoris, non sciri umquam, vel affectasse, vel recusasse, vel petiisse aliquid directè, vel indirectè, per se, vel per alios; non civitatem, non pulpitum, non tempus, non facere, non omittere: si excipias solas sollicitationes Su-

perius commemoratas, quibus supplicabat ut posset talentum suum impendere in locis minus celebribus & honoratis. In quo declarabat elegantiam ingeniosam suæ Obedientiæ: etenim licet hoc maximè seridè expeteret, subdebat se tamen penitus menti Superiorum; ad quorum solum nutum transferebat se ad diversa loca: vocabant, revocabant; ibat redibat; mutabant pulpita obmutescebat; itinerum molestias subibat æque semper hilaris; jubebatur prædicare, prædicabat; dicere in tempore & extra tempus, dicebat; desistere, desisteat. Quando autem erat invitatus ad aliquam cathedram primariam, aut infimam, qualemcumque (ut scribit Pater, qui ^{notant} repertus fuerat) numquam ex ore ejus aut calamo extorqueri potuit minimum signum propensionis, ut diceret ita, vel non; placet, vel displicet; ad aliquam rem particularem, quæ se offerebat, respondebat quidem terminis religiosè urbanis, sed cum indifferentiâ æquali in omnibus, & dependentia à Superioribus; nec adiciebat verbum de suo, quo ostenderet

deret desiderium, vel impedimentum:
& licet illi videretur, quod locus vel
functio ob laborem, aërem, vel aliam
circumstantiam possent grave damnum
sanitati creare & vitæ: re semel pro-
posita simpliciter Superiori, acquiesce-
bat, & tranquillo animo obsecundabat.
Senæ cum degeret, ubi fuerat concio-
natus per æstatem, & manebat ad di-
cedum per adventum, scripsit ad Soro-
rem in hunc modum: *Pro tua in me hu-
manitate, soror mea, velles, ut tibi aliquid
de me nuntiarem, & ego contra fugio mul-
tum scribere; quia perpetuo dum mei recor-
dor, occasionem habeo deglutiendi bolum
aliquem amarum. Heri tamen die natalitio
Virginis intemeratæ finivi concionem, &
resumam i. Novembris in templo nostro, &
deinde incipiens Adventum Ecclesiasticum,
dicturus sum in Cathedrali; nisi aër ille fri-
gidissimus & subtilissimus mihi facessat ne-
gotium: sum tamen ad beneplacitum Supe-
riorum, &, quod consequens est, Dei, sem-
per paratus. Illi sunt de statu meo affatim
informati, & cum eo obdormisco. Romam
pergam, quando mihi dicent ut vadam. Il-
lum contemptum valetudinis propter*
Obe-

Obedientiam palam fecit, quando illi impositum erat Genuæ Concionatorem agere, ubi passurus erat aërem subtilissimum, suæ sanitati apprimè contrarium; scripsit ad Amicum se eo destinatum ad dicendum per æstatem, & se non invitum eo proficisci, ut exponeret vitam discrimini intuitu Obedientiæ, quamvis expertus esset aërem illum è diametro adversum suæ valetudini ob subtilitatem. Tanto pluri æstimabat Obedire quam vivere; cumque esset illi consilium datum à quibusdam Amicis, ut se excusaret à concionibus æstatis, & adventus; ne se perpetuo exhaustum iret, & pergeret ulterius pessumdare, uti antea acciderat; numquam illis consiliariis assensus est, sed missus perrexit semper, & vitam suam immolavit in victimam Obedientiæ.

Parum illi erat generose obtemperare in rebus arduis & majoris ponderis; fuit præterea accuratus in observandis studiose omnibus apicibus Obedientiæ & regulæ. Virtus in homine provecto tanto magis inusitata, quanto magis quan-

quandoque Seniores se sinunt decipi, ut existiment ista crepundia Novitiis esse propria, se autem indigna. Non ita P. Antonius Iulius; in omnibus enim observantiis erat irreprehensibilis, atque pro rebus minimis petebat licentiam, nec utebatur epikiis, nec acquiescebat permissionibus in commune datis; sed subiiciebat se semper & ubique, toties quoties, dictis Superiorum: ita, vel non. Ad hæc in tyrocinio exercebatur quando Domina ejus Mater institit apud P. Rectorem & Magistrum Novitiorum, ut posset epulo aliquo forensi omnes Novitios recreare in uno suo prædio suburbano, & ratio dictabat esse permittendum. Ibi P. Antonius Iulius petiit à Domina, ut procuraret sibi è domo sua librum quemdam Spiritualem, quem nominabat; sed reversus ad novitiatum, & reflectens super ea petitione damnavit eam, ut inobedientem, & inobservantiæ ream, utpote factam sine scitu Superioris; quamobrem derepente eum accessit, & petiit sibi injungi, poenitentiam: missoque libro noluit eum inspicere: sed
detu-

detulit ad eumdem, inquiens sibi sufficere Thomam à Kempis. Quamvis autem bene animadvertatur illam observantiam sapere Novitium, non fuit tamen privativè Novitii: sed in ea semper perstitit, & incrementa sumpsit; quando enim postea erat jam Concionator maturus complurium annorum, & sæpè exhortabatur Moniales, habebat inter sua proposita notatum istud pusillum: *Non videre Moniales finita concione, nisi facta Superioris potestate.* Nec hoc solum, siquidem postea Mediolani, cum ex catharro laboraret Domina ejus Soror, misit quatuor pastillos parvos ex saccharo, rosaceo liquore infecto conditos, enixè postulans, ut hoc pauxillum non aspernaretur. Primum se excusavit prætexens ejusmodi delicias sibi non quadrare; deinde tamen subjunxit se absolute eas non posse recipere, eo quod sibi non esset licitum. Aliàs fuit illi datum exiguum frustum ex osse, vel ex ebena ad calamos recondendos: sumpsit quidem: sed ecce recordatus se non habere licentiam ad accipiendum, illico restituit; nolens ne qui-

quidem cum tacita, & nisi certissima
venia admittere etiam rem tam parvi
pretii, & eam prius non flagitare, etiam
cum animum haberet flagitandi : sibi
enim persuadebat parvis illis laxitati-
bus (ut revera sunt) observantiam sen-
sim sine sensu dilabi, & ejus splendo-
rem offuscari : Ibat ergo prius re ipsa
veniam petitem, & ea concessa acci-
piebat, quod offerebatur. Transibat
Alexandriam, quando ei allatum epi-
stolum unius Monialis sibi confanguineæ,
in quodam parthenopæo istius
oppidi : noluit admittere. Quapropter
Monialis consultum putavit rogare P.
Rectorem, ut illi traderet : atque ita
legit. Non continebat aliud, quam ut
dignaretur exhortationem habere ad
illas sacras Deo Virgines; cui petitioni
non annuit priusquam P. Rector eum
monuisset, ut responderet se earum
desiderio obtemperaturum : è vestigio
hoc respondit, & illis postridie adfuit,
fecitque exhortationem exceptam,
cum devotione & fructu notabili illa-
rum animarum, quæ anhelaverant ut
frangeret illis panem verbi Dei. Nec
so-

solum in Collegiis quando per transennam ibi hospitabatur, sed etiam quando extra domum erat, non putabat sibi licere dispensare, in regula, quam poterat observare: ac proinde cum moraretur in Episcopio Cremonensi, in quadragesima, quam istic concionabatur; si occurreret necessitas scribendi, mittebat litteras apertas ad Superiorem Collegii, ut lectas, si videretur, obseraret: & una quidem vice, qua cogebatur scribere litteras, quæ festinato opus habebant, dedit illas apertas Secretario Domini Episcopi; precatus ut sigillum apprimeret si putaret consultum; quia sibi dicebat deesse talem auctoritatem.

Non formidabat revelare quod viveret in tam exacta observantia: unde cum non nemo in Domo Professa Mediolanensi venisset ad ejus cubiculum, ut cum eo quid ageret, dato signo ad examen conscientiae meridianum, eo stante ad januam, non quæsiuit prætextus, sed libere edixit, nunc pulsatum est ad examen, alias videbimus invicem. Similiter vocatus à Portario
tem-

tempore secundæ orationis , respon-
dit, hoc manè dormivi , non possum, si
quispiam, quidpiam me velit, non pos-
sum venire, nisi absoluta meditatione. Si
per aliquam extraordinariam occupa-
tionem non potuisset statuto tempore
exequi res observantiæ religiosæ, non
putabat sibi permissum se excusare,
nec iis partem aliquam subtrahere: sed
in eo se gerebat cum sancta quâdam li-
bertate : & quando partem aliquam
orationis debebat perficere in templo
aut in loco publico ; non formidabat
videri, quod metiretur tempus clepsy-
drâ, ut esset securus non diminuisse se
momentum tam pretiosæ sibi occupa-
tionis, & ex devotione, & ex obedi-
entiâ sibi impositæ. Nec aliter faciebat
etiam quando iter faciebat ; observa-
vit quippe idem quando profectus
Cremonam, rediit in rheda Illustrissi-
mi Antistitis, comitem habens Secre-
tarium, ut supra commemoratum est.
Vix enim conscenderat vehiculum
quando extraxit suam clepsydram ad
horam meditationis integrè complen-
dam, Nec bono illi Sacerdoti hoc ægrè

fuit, ut quandoque nonnullis fit, quibus observantia videtur mali moris, & displicet præsertim sæcularibus: verum hic ob hanc pietatem & accuratam observantiam summum erga eum amorem, & hausit, & retinuit; de hinc fuit visus tam sæpè cum clepsydra penes se, quod ista accuratio fuerit æstimata, tam illi propria & familiaris & boni exempli, ut dum deliberarent Patres ab ejus decessu de ejus adumbranda effigie, & adiiciendo aliquo religioso iudicio, quod eum propriè ad vivum designaret, fuerint ex illis aliqui ejus sententiæ, quod deberet pingi genuflexus in oratione, vultu plane humili, & devotionem spirante, apposita juxta illum clepsydra in terra, prout moris habebat. Hæc ejus tam perfecta observantia maximè in rebus spiritualibus, etiam post mortem, fructum in aliis operari non cessavit, sive per præsentiam, sive per conceptum. Etenim Religiosus magnæ auctoritatis & dotibus eximiis præditus, nec temerarius, de se narravit; quod cum aliquoties P. Antonium Iulium rogasset

set adhuc viventem, ut suis precationibus, sibi à Deo aliquas gratias de novo impetraret, uno mane se illi jam defuncto commendavit ad aliam obtinendam; vesperi deinde illius diei, dedit se per modum diverticuli lectioni Poëtæ vulgaris; & licet superveniret tempus præscriptum à regula ad faciendum examen conscientiæ, sivit se tamen seduci delectatione illius lectionis: quando ecce illi visum est, se cernere stantem ante se P. Antonium Iulium in habitu concionatorio cum superpellicio & stola, qui illum intuebatur fixo oculo, austero vultu, & ad severitatem composito; nec loquebatur tum quidem exterius verbum ullum: sed eodem tempore sensit sibi inspirari huiusmodi cogitationem: Iste non est modus consequendi gratias: & unà illi videbatur librum, quem tenebat, sibi fuisse ereptum è manibus, & conjectum in terram, ubi deinde deprehendit cecidisse. Si hæc fuerit præsentia realis P. Antonii Iulii ordinata à Deo, fuerit certe ad secundandam, & remunerandam exactam istius sui observan-

tiam famuli: sin vero fuerit tantum imaginatio istius, qui retulit; bene apparet, quam altum conceptum religiosæ suæ accurationis reliquerit impressum P. Antonius Iulius in animis eorum, qui eum ex usu & visu noverant: sufficit etenim hæc ad formandam in persona matura non tantum findere sim, sed etiam vivam talem apprehensionem culpatae inobservantiæ, & imprimendum terrorem.

Et profecto tantum illi in amoribus fuit ista ordinata harmonia & concentus bene distributorum operum, quæ observantur à Religiosis; ut in officio concionandi (quemadmodum habebat complacentiam quod laboraret in bonum animarum) id illi parum fuerit gratum, quod ob varietatem itinerum, locorum, & impedimentorum, cui obnoxium erat ministerium illud, causaret necessitatem ordinis, in vita religiosa stabiliti, subinde turbandi. Atque ideo scribens ad quemdam amicum expetiit precum ejus subsidium, inquiens: *Opus habeo ope tua ne deterior fiam, interim quo alii meliores evadunt, in*
fun-

*functione, quæ & ob itinera quæ emetior;
& propter varietatem hominum, cum quibus versor; & propter habenas solutas, quas habeo; & propter turbationem horologii religiosi, ex natura sua periculo exponit, precipitandi in torporem animos robustissimos: quid futurum credis de debilioribus qualis est meus?*

At non erit fortasse tam mira in isto viro, tam exacta Obedientia in minimis quidem, verum creberrimis, & tepido Religioso molestissimis observantiis; quantum in fidelissima sinceritate, cum qua, ut supra vidimus, exposebat conspectui suorum Superiorum totum suum intimum & extimum, bonum, & malum, virtutes, mortificationes, & sensa animi sui; quoniam in illa, & cum illa exercebat magis illam suam supra laudatam sui iudicii diffidentiam, submittendo illam censuræ Sacerdotis; cujus magis intererat lepram, vel sanitatem internam discernere, de qua alibi est dictum à me quidpiam. Itaque non contentus directione, quam aliquoties à Superiore accipiebat; & desiderans plus imme-

diatam & frequentem , petebat aliorum interventu in rebus plurimis iisque minutioribus studiosius gubernari, nedum in primis annis vitæ religiosæ , quibus unusquisque se timet , & habet suspectum: sed insuper in ultimis , quibus solent quam plurimi de se præsumere , & non timere , nisi sint prudentiores. Atque adeo in folio supradicto quod exhibuit P. Provinciali, quatuor mensibus , antequam ad Superos migraret, conclusit, inquiens: *Supplico præterea R. V. ut considerare dignetur, an non videatur consultum, ut habeam directorem particularem, qui me deducat per vias rectas: quia omnino promptus sum & paratus, me ejus directioni submittere, ad eum modum, quem R. V. censuerit expedire.* Et nominabat unum qui illi occurrebat, & quem pro censore tam rigido habebat, ut nulla in re dissimulasset. Quando deinde nactus erat unum, qui eum strenue commonefaceret, & consilio adesset opportunius; quantâ promptitudine obtemperarit, patuit Lucæ, dum istic per quadragesimam sacrum Oratorem ageret. Cum,

ex

ex metu ne excederet in rigore erga se, & fervore erga alios, P. Præpositus Genuensis commendasset (quod Superius commemoratum memini) ut se regeret juxta consilium unius Patris ex tertio anno, qui ibat illi socius. P. Antonius Iulius præstitit se tam facilem, & obsequentem ut (sicut scripsit ipsemet ille Pater) mihi opus fuerit circumspectè cavere, ne excideret mihi verbum, quo patefacerem meam inclinationem; quia totum interpretabatur in sensu regiminis illi injuncti; nec aliud respondebat aut faciebat, sed statim acquiescebat & obediebat.

Quantum autem sibi congratularetur, quod videret se ad hanc normam compositum, & securum redditum adimplere se hoc modo voluntatem Dei, colligi & adstrui ulterius potest ex eo, quod supra scriptum ab eo meminimus, ad arbitrum unum conscientiae suæ, virum revera valdè religiosum, & disertum Spiritus Magistrum; à quo cum quæsisset judicium de certis dubiis in particulari, subjunxit: *R. V. non spectet aliud, nisi obligationem quam habeo*

ego , ex voto mihi impositam ; ad faciendum id , quod judicaverit melius ad divinam gloriam , & bonum meum spirituale. Ego autem per gratiam Dei conabor quam accuratissime exequi sententiam suam , quam pro Sancta venerabor. Unde manifestum est non fuisse contentum correxisse suum illum timorem claudicandi in virtute , per vincula ordinaria Obedientiæ præstitæ Superioribus: sed voluerit etiam voto particulari eam asserere non minus difficili quam perfecto , voto inquam obedientiæ erga suum Spiritus instructorem. Si umquam sibi videretur non obedivisse cum ea promptitudine & simplicitate, cujus sibi præfixerat perfectissimam idæam; pœnitebat eum privatim & reprehendebat se publice cum gravi sensu. Dum habitaret in Collegio Mediolanensi revertens quodam die de foris domum ; postquam pluribus vicibus pulsasset , Ianitor tardabat venire , ut intromitteret : quid faceret Pater ? discessit ut intraret per lateralem portam templi , & inde in domum : sed socio eum memorem reddente , regulæ , non

in-

intrandum nisi per communem januam domus, regressus est, & iterum atque iterum nolam traxit; cumque diu frustra expectasset, arbitratus est circumstantiam prævalere legi, & per portam Ecclesiæ ingressus est: Sed non transiit dies ista, quin dicta fuerit de hoc defectu ejus publicè culpa, & imposita pœnitentia non terminis ordinariis, sed verbis valde exprimentibus, aggravantibus ejus humiliationem: unde habetur certum quod ipse considerata secum melius illa actione, & comperta pro prævaricatione observantiæ regularis, conjecerit in chartam eandem istam formam, qua interius seipsum arguerat; precatusque fuerit Superiorem, ut curaret publice legi in mensa, quo non videretur à suamet humilitate dictata, sed ad majorem humiliationem ab eodem Superiore directè inflictà.

Paucissimæ tamen sese obtulerunt occasiones accusandi se, quod non perfectè impleisset, secundum præscriptum regularum, Superiorum voluntatem: nec illud ferè unquam contingebat;

bat; nisi quando illi præscriptum erat, vel suatum, indulgeret sibi nonnihil amplius recreationis vel commoditatis: verum in una invectione publica, quam obtinuit, ut sibi faceret post vacationes Mediolani, posuit diserte in enumeratione defectum, etiam illud: *non sum executus, sed potius feci contrarium ejus, quod Superiores, ut suam erga me exhiberent charitatem, & benevolam humanitatem, mihi non semel dixerunt, puta, ut me recrearem.* Ecce qualia fuerint argumenta inobedientiarum ejus, in quibustamen & in omni alia materia, volupe illi erat, ut Superiores de se libere disponerent, & gaudebat quando voluntatem suam frangebant: quæ quia in aliis vix rumpi poterat, uti dictum, nisi in commoditatum & recreationum usu; si quandoque talis obedientia accideret loquebatur cum satisfactione, & sibi multum plaudebat. *Placet mihi, inquit, iste modus: Superior tam humanus est, & ego habeo repugnantiam, ut hisce diebus morer in villa. Bene habet, ob id ipsum vade, & te crucia. Mihi placet multum.* O placere paradoxum!

natum ex displicentia, & è diametro oppositum displicentiæ illorum, qui etiam in objectis, quæ appetunt, nauseam sentiunt, si sint imperata modo aliquanto minus molli, quam queat sufferre delicata sensibilitas. Non poterat quidem aliter esse, quin sentiret difficultatem in transcribendo & subiiciendo suum velle, & multo magis flexibiliter conformando illud opinioni suorum Superiorum; & quidem oppidò magnam, cum esset genii vivacis, & ingeniosus: sed gloriôsè victor lubentiam suam iugo Christi subiiciebat, uti aliquando exposuit Patri, cui multum confidebat, & quem consuluerat super casu aliquo particulari. Quod ille exhortatus eum fuisset, ut totum se traderet Sanctæ Obedientiæ, rescripsit illi his verbis:

Vestræ benevolæ confortationes efficaciter in me operatæ sunt. Adeo ut, quamvis in substantia mearum operationum fuerim satis firmus, volendo voluntatem meorum Superiorum servare pro regula; tamen circa aliquas circumstantias accidentales, cum essem forte tentatus, ne

*adhiberem modum planiorem, & sincerio-
rem, in quo nulla esset formido, quod amor
proprius in partem posset venire, & vitium
facere in holocausto; sed jam à Spiritu ro-
boratus, qui calamus hunc direxit, decre-
vi me gerere prorsus instar baculi senilis,
& corporis mortui. R. V. me juvet suis ora-
tionibus, ne propter illam meam resolutio-
nem, deserant me tentationes: sed ad om-
nem occasionem, quæ quotidie una ex alia se
offert, redeam in arenam ad decertandum
alacriter forte certamen. Ita illè: Atqui
Christus dominus noster se bonum du-
cem præbuit tam egregii militis, & cer-
tamen forte dedit illi ut vinceret, ac dein-
de ut verus obediens loqueretur victorias.*

C A P V T XIV.

*Opinio virtutum in qua erat P. Antonius
Iulius, & felix transitus ad me-
liorem vitam.*

HÆ sunt virtutes P. Antonii Iulii,
quarum usque in hanc horam
potuit colligi aliqua distincta recorda-
tio: ex quibus, & compluribus alijs non
ita

ita speciatim observatis, mansit impressa animis opinio & æstimatio illius, perinde ac hominis singularissimi, ac extraordinariæ probitatis. Usque adeo ut pictor qui nunquam alias eum viderat; primo accessu, quo eum contemplatus est, spirantem in eo deprehenderit auram quamdam cælestem, talemque hauserit de eo conjecturam Sanctitatis, ut dignum censuerit, cuius effigiem ex occulto ad vivum delinearret. Atque hæc opinio sublimium ejus virtutum invasit communiter omnes, qui eum usu, & visu cognoverunt, expressa verbis & formulis loquendi multum significantibus à variis, qui percunctati quid censerent de virtutibus P. Antonii Iulii, non nulli dixerunt fuisse eximiarum virtutum: alii quantum de illo proferri posset, minus esse ejus meritis. Hi vocarunt virum Sanctorum morum: illi hominem immaculatæ vitæ, qualis primariis Sanctis conveniret. Quidam purissimæ animæ elogio honorarunt. Mutinâ scriptum fuit, quod dedisset ibi magnam ædificationem, exemplis numquam

quam intermissis, assiduæ orationis, profundæ humilitatis, despicientiæ sui, & multarum aliarum virtutum, ob quas fuisset tantum in veneratione, quantum ullibi: etenim virtutis erat in omni loco æqualis. Cremonâ nuntiatum est in hæc verba: P. Antonius Iulius felicissimæ recordationis concionatus est in hac Cathedrali; reliquitque post se opinionem tamquam viri magnæ virtutis. In populo, & in nobilitate æstimatus erat summè, & in Episcopio ubi commorabatur, erat ab omnibus honorat^{us}, uti vir singularis virtutis. Bononia misit quidam ex Patribus multæ doctrinæ & integritatis hoc testimonium: Præsentia P. Antonii Iulii & commoratio in hac civitate, fuit rara, & non longi temporis; sed per istam brevem moram reliquit tam eximiam & diu duraturam variarum virtutum fragrantiam, ut memoria illius evadat dulcissima simul & amarissima, illi qui meminit primo se potitum fuisse prorsus cælesti ejus conversatione, cujus jacturam jam fecerat; quia in cælum sublevabat personas,
cum

cum quibus tractabat : idque etiam modo experimur, *quod memoria ejus in compositione odoris facta opere pigmentarii in omnino quasi mel indulcatur.* Et addit quod in litteris ab illo per intervalla receptis, semper cernerentur coruscare sensa, & affectus suaviissimi de Deo, abnegatio, & contemptus omnimodus sui ipsius, resignatio consummata, & dependentia à Sancta Obedientia, innumeræque aliæ virtutes; ac proinde quod una ex ultimis epistolis recepta, dum postremum Verbum Dei prædicaret Genuæ, servaretur instar præstantissimæ, & venerabilis reliquiæ, & sæpius eam reverenter oscularetur. Taurino allatum est: Vox communis omnium horum Patrum, ac Fratrum est P. Antonium Iulium, eo, quo habitavit in hoc Collegio, tempore, dedisse semper ædificationem non vulgarem, tam domi quam foris; & quidam Patres è Senioribus hoc addiderunt, quod si diuturniori tempore ibi substitisset, mirabili metamorphosi Taurinum Sanctum effecisset. Cum Pater ex hac mortali vita ad immortalem migras-

grasset, accepit unus è nostris Taurinensibus epistolam Genua, nuntiam felicis ejus obitus, atque una imaginuculam defuncti simpliciter adornatam; cumque compertum haberet, quantum æstimatus & amatus fuisset ab Excellentissimo Domino Marchione de Pianezza: procuravit ut una & altera ad manus ejus veniret. Bonus ille Dominus perlegens epistolam exclamavit: mortuus est unus Sanctus. Eodemque fuit epitheto decoratus à Domina Principe Regali, peracuti ingenii Matrona, ad nova de morte ejus, quæ ad illam detulerat Dominus Marchio; qui postea voluit iconculam sibi retinere in memoriam, & venerationem spectatissimæ virtutis, sicut & literas ab eo acceptas affectibus religiosissimis refertas. Adhuc vivus fuit habitus cum ea demonstratione reverentiæ, quæ solet deferri personis venerandæ virtutis. Concionabatur in celebri civitate, & invecus est in irreverentiam, quæ committebatur in templis, & indecentiam in celebrando, quæ certam Ecclesiam contigit designare &

& innuere; senferunt se notatos aliqui, ad quos cura ejus spectabat; illico questi sunt apud Illustrissimum: sed prudens Antistes eos placavit, dicens: finite sua peragere P. Brignole, quia ejus Virtus meretur omnem venerationem. Proficiscens Genua Lucam fuit coactus subsistere aliquot diebus Massæ, ubi reperiebatur præter illius loci Principem cum Marchione de Carrara, etiam Dux & Ducissa Doria, Principissa Castilionensis, & Marchionissa Sarra. Expressi calamo nequit, qui honores istic ab omni ista nobilitate isti Dei famulo, fuerint delati, & quæ significationes pretii in quo probitatem ejus habebant. Eodem vesperre quo advenit toto pluebat; Princeps tamen octogenarius & infirmus, deportari se curavit ad visitandum in domo, in qua Pater, qui erat principibus illis fœminis à confessionibus, eum hospitio exceperat: & dixit non potuisse se ullatenus cohibere, quin accurreret ipso momento, quo intellexerat ejus adventum: venire se in persona, ut accipiat ab illo benedictionem,

sine qua sibi impresserat, illa nocte dormituum se non fuisse. Sequutæ sunt deinde devotiones supra recensitæ, quas hortatu Patris obiverunt. Quando deinde stabat in procinctu ut discederet, cum Princeps inaudivisset difficultatem, quam patiebatur in equitando, ob male affectam tibiam : omnimodè voluit Lucam usque sua lectica uteretur; & quia difficilem se præbebat in admittenda, Patris Socii adhibere oportuit auctoritatem, ut reluctantem expugnaret. Cui præterea multis precibus enixè commendavit quemadmodum etiam fecerunt omnes illi alii Principes & Principissæ, si vel Lucæ, vel in reditu res aliqua occurreret, in qua P. Antonio Iulio usui & comodo esse possent, certiores se faceret; pro maxima se gratia habituros si tali Dei Ministro in re aliqua gratificandi opportunitas daretur. Eadem officia postea renovavit eo tempore quo Pater commoratus est Lucæ, & litteris, & Nobili citatis equis misso, ad invisendum, & gratulandum de fructu quem reportabat ex suis concionibus.

nibus & commendandum se ejus precibus.

P. Provincialis, sub cujus regimine in Domino obdormivit, faciens exhortationem in Domo Professa Genuensi, paucis à morte diebus; ut communi expectationi Patrum faceret satis, incepit excurrere in ejus laudes: & licet deberet loqui cum ea cautela, quam deceret majoris notæ Superiorem; non dubitavit tamen dicere: quod apud totam civitatem esset in opinione magnæ virtutis, & fuisset persona in omnibus, per quos transiverat, vitæ statibus, valde singularis, & admirabilis: sed multo magis in Societate memoriam ejus futuram in benedictione, ob tenorem vitæ decem annis irreprehensibiliter in Religione traductæ, quæ æquivalent compluribus ob continuum & numquam intermissum fervens exercitium religiosarum virtutum, profundissimæ Humilitatis, Paupertatis, Vilipendentia sui, Mortificationis, exactissimæ observantiæ, Obedientiæ, Charitatis, fervoris, & consuetudinis cum Deo, atque summæ

Religionis in rebus omnibus; ad eum modum, ut fuerit communis omnium sententia, quocumque se verteret secum deferre normam veri & perfecti Religiosi, qui omnes permoveret ad pietatem & devotionem. Hæc dixit P. Provincialis parum in verbis, sed multum in substantia, quæ, ut verissima, fuerunt accepta cum universalis consensu & consolatione. Si orationes funebres habitæ fuissent de ejus laudibus, ut mos est fieri in exequiis Religiosorum, qui mortui sunt cum opinione non vulgaris sanctimonix, quæ non panegyres dictæ fuissent! Atqui cum non fuerint illæ celebratæ, sed ob impedimenta dilatæ; existimavi satius, præsentem laudum ejus commentarium compilare, qua possem; & colligere plura quam brevitatis concionis caperet, atque ita pluribus Provinciæ locis communicare. Quin etiam P. N. Generalis Goswinus Nickel tam fuit captus exemplo isto vivendi religiosè, & Concionatoris tam evangelicè, ut, quemadmodum scripsit, dixerit: *Tales homines desideramus nobiscum manere.* Et ideo

ideo cum solerent ante æstatem Roma dimitti Concionatores, voluit Patrem ibi subsistere, & diutius retinuisset, si sanitas ejus passa fuisset; & nisi multæ civitates Italiæ eum sibi petiissent, ut utilium ejus laborum fierent participes.

Attamen potentior in expetendo, & felicior in impetrando fuit Genua ejus Patria; tamquam illa, quæ præferenda erat, ex merito quod eum genuisset, & per eum artem proficiendi calleret, Deo exceptionem faciente in illa universalis: *Nemo Propheta acceptus est in Patria sua.* Quamvis enim quadragesimales conciones paucis annis ibi peregisset, opus fuit illi indulgere alteram, quæ fuit postrema. In ea resumpsit dicendi pensum, quemadmodum concursu majori quam umquam, ita Zelo & fervore spiritus tanto inflammatio- re, quam consuevit in corripendis Evangelica libertate moribus profligatis, & permovendis animis, cum affectu vehementi, ad dolorem de peccatis, & exercitium Christianarum virtutum; adeoque licet ipse non præsa- giisset, potuisset prævideri illum esse

novissimum , sed & generosissimum conatum Charitatis , secundum totam latitudinem suæ spheræ agentis; quia ipse hoc sibi elabi & quis scit an de Cœlo , ut quibusdam visum , hoc illi insinuaturnon fuerit ? In auspiciis enim suarum concionum , petens licentiam à Patria sua , ostendendi suum erga illam amorem magis quam unquam , in vitiis periculosis detegendis , ex quibus sequeretur certa animarum pernicies. Applicavit sibi non modo monitum apostolicum datum S. Timotheo. *Tu vero vigila , in omnibus labora , opus fac Evangelistæ , ministerium tuum imple* : sed etiam annuntiavit id quod subjungit Apostolus : *Ego enim jam delibor , & tempus resolutionis meæ instat*. Allegans hoc pro stimulo impendendi se cum majori Charitate ministerio prædicationis Evangelicæ. Id quod fecit eum hæc proferre , fecit etiam hoc præmonere. Et vero fuit ab auditorio acceptum tamquam mirum quid , de quo sermo percrebuit per civitatem , non sine timore ; & perscriptus est alio , cum suspensione , perinde quasi Pater præ-

prædixisset sibi instare finem vitæ; quem tamen sine lumine majore, & ipsa ætas, & indispositiones corporis, & debilitas per se comminabantur: atqui comminatio ista fuit nimis, quam vera, quia cum persequutus fuisset tam ardentem suas conciones, ad duas prope septimanas, cum confluxu & fructu famam superantem, & imbecillitatem virium vigore Spiritus confirmante: coactus est cedere febri, quæ eum stravit in lectum cum occulta malignitate: cumque in principio spem inter & metum res dissimulante hæret, protinus se prodidit fatalem; & intra spatium duarum minus hebdomadarum extinxit. Tempore, & ex occasione hujus postremæ infirmitatis secutæque mortis, docuit Pater, quam propriè denuntiationi sui finis annexæ potuisset consolationem illius doctoris gentium Pauli Apostoli: *Bonum certavi, cursum consummavi, fidem servavi; in reliquo reposita est mihi corona justitiæ.* Etenim ab initio suæ ægritudinis ante Medicos, ex sensu proprio, derrepente cognovit mortalem; vel ut

melius dicam promulsi fidem æternæ vitæ. Inundavit hæc cor ejus voluptate, quæ in vultu transparens, & in verbis se patefaciens, causavit in omnibus magnam admirationem; utpote res insolita, & raro visa, etiam inter Religiosos, qui etiam si cernuntur bene mori cum tranquillitate, in præmium laborum pro Dei obsequio susceptorum, & cum alta pace in fructum multarum victoriarum de seipsis in vita religiosa relatarum: P. Antonius Iulius, non solum requievit in pace; verum per anticipationem intravit in gaudium cœli, quod resplendescibat in facie, & faciebat eum loqui instar Angeli de propinqua felicitate, ad quam spem proximam habebat se profecturum illico, & Deo fruiturum. Illis ergo, qui subinde indicabant vitam ejus non habere se pro desperata, dicebat: *Amabiles nolite mihi dicere tam ingrata nuntia. Ad quod responsum cum animadverteret, alios in admirationem rapi, subintulit; An non forte essent mala nova Nauclero, qui navim suam provexisset usque ad orificium portus, si oriretur inopinatus ventus* ad-

adversus, qui eum propelleret retrorsum in medium tempestatis? Quomodo ergo non erunt infausta nova pro me quibus fiat mihi omnis non modo spes; sed timor etiam reiectum me iri, in vitam tam procellosam. Serebat sæpe numero sibi dici non posse verbum magis insipidum, quam si Doctor Medicus, ei denuntiaret se liberum esse à feбри. Atque ita sicut solidius consolabatur illos, qui venerant eum consolatum, ita relinquebat tristiores, tanto plus ponderantes jacturam, quam facturi erant, quanto ipsi futura erat majoris lucri. Quamvis ut verum fatear mors P. Antonii Iulii habuerit unam proprietatem, ab aliis compertam, in obitu aliquorum Sanctorum; quod amicos non reliquerit nimios afflictos. Enimvero cum absolveret vitæ telam non adeo effœtus, quin aliquot adhuc annis vivere posset, & abrupturus esset spem tantorum fructuum colligendorum in servitium & gloriam Dei, quorum effectus in luce publica versabantur; ad hæc ob amabiles mores esset in desideriis & amoribus omnium; hilaritas tamen, quam oppo-

nebat terribilium terribilissimo, ita influebat in animos aliorum, ut cordium amaritudinem dissiparet, & dulcitudine leniret: adeoque mors eius multo minus turbavit animos suorum amicorum, & eorum, qui familiariter eum noverant, quam videbatur debuisse: receptaque est majori cum invidiâ, quam luctu & comploratione.

Non fuit immemor in ista sua lætitia, dilectæ sibi humilitatis. Itaque uti omnia super ea fundabat; non attribuebat suis meritis spes suas, sed meritis religionis, in qua moriebatur. Hinc omnibus & singulis, qui eum invisebant, nostris & extrariis, non desinebat magno affectu exponere, quanto hoc sibi esset solatio mori posse Religiosum Societatis. Ultimis diebus rogatus à quibusdam principibus viris, valde piis, & illi affectis, ut in illo articulo vellet illis dicere aliquod verbum salutare ædificationis; cum putaret illam actionem competere alteri, quam sibi, semper detrectabat: donec P. Provincialis plus respiciens ad devotionem, & merita istorum Dominorum, quam
ad

ad humilitatem Patris, præcepit ut illis obsequeretur; permisit ergo intrare cubiculum suos liberos, aliquot propinquos, & alios complures sibi affectos; qui in genua provoluti circumdederunt lectum cum multo affectu dolore intermixto: atque ipse paucis verbis, sed sensu plenis eos affatus est in hunc modum: *Quod cum viderent eum in procinctu, ut brevi comparendum illi esset ante tribunal Dei Iudicis, non dubitarent se dicturum illis veritatem: & ut essent certi, se non habere remorsum conscientia, ut sparsum fuisse perceperat, & ad illorum aures potuerat pervenisse, quod Religionem fuisset ingressus; quasi vero ea de causa fuisset occasionem elabi faciendi bonum, quod putarent eum in seculo, majus facere potuisse: velle se, ut scirent, quod si adhuc deliberandum ei foret, idem se facturum: nec habere se in isto articulo consolationem majorem, quam quod factus sit, & vixerit Religiosus: & sicut summè doleret, non prius id se exequutum fuisse, ita omnium letitiarum instar illi esse, quod moriatur in Societate IESU. Si tamen decretum illis esset manendi in seculo, & illic vivendi*

melius quam ipse vixisset, laudarent Deum: viderent tamen etiam atque etiam, ut non patiantur se decipi: sed quandoquidem experientia se docuisset, quod difficile sit salvari in mundo, rogare se, suam ut imprudentiam non imitarentur quæ tanto tempore ingressum distulerat; sed primo quoque tempore statuerent, quibuscumque modis securam reddere animæ suæ salutem, & procurare veram & unicam in morte iucunditatem. Deinde quod post salutem animæ suæ, cuique eorum impense commendaret Societatem, & ut illum affectum, quantum sibi exhibebant, erga eam servarent, quam magis ac magis jure meritoque semper diligere cogeretur; quod si in eo sibi obsecundarent, summè gratum in eos se futurum promittens; & postquam venisset ad locum beatitudinis, numquam obliturum eorum pietatis. At hæc cum omnibus, exciderent lacrymæ dixit illis ultimum vale, & ab illo divulsi sunt omnes, contristati simul, & solatio delibuti.

Ille porro intentus, sicut fecerat à principio morbi, exercitio illius præclaræ virtutis, quam tot actibus frequentatis in vita sibi fecerat habitu acqui-

quisito tam familiarem, ut nec dolores morbi, nec timor mortis illum diverterent, nisi quando sub finem, affectus & cogitatio elanguescerent: fuit semper obedientissimus quâ Medico, quâ Infirmario: nunquam auditus est queri de aliqua re, nisi quod nimium studium impenderent recuperandæ ejus sanitati, quam rebatur aliis fore inutilem; atque indignam cui tam operose serviretur, & sibi damno futuram, ob ingens desiderium, quo flagrabat, solutis corporis compagibus, existendi cum Christo. Confusus est P. Provinciali dubium aliquod notabile proponere; cujus una & altera pars erat in favorem humilitatis: dicebat enim valde se optare, ut ante mortem egregiè flagellaretur, ac deinde deponeretur in terra, ut ibi coöpertus cinere & cilicio exstingueretur: Verum enim vero quia sciebat illos actus esse postulatos & exercitos à Sanctis, non audere se illos expetere, ne videretur velle pompæ, & ostentationi exponere humilitatem: timere se tamen non exponere hanc suam inspirationem, quasi ignoraret
quid

quid mererentur ejus peccata. Totum vero postquam explicuisset, submittere se judicio sui Superioris, quem solum obtestabatur, ut si non probaret, nulli palam faceret se hoc vel petiisse, vel cogitasse; futurum enim hoc illum obiicere periculo vanitatis. De aliis ejus devotis affectibus non tantopere sollicitus erat, ut impediretur, quo minus manifesti fierent; erant enim frequentissimi actus devotionis, quos eliciebat, & colloquia, quibus adspirabat cor ejus ad summum bonum, laudans, & benedicens Deum tenerrimè, quod admisisset, & conservasset se usque ad finem in Societate. Admonitus autem ne se nimium loquendo fatigaret, tacebat aliquantisper lingua, sed corde loquebatur: aut si desistebat, rogabat ut sibi legerent librum pium, nec lubebat illi audire sermocinantes nisi de Deo, unde ut illi satisfaceret pro ultima & tam Sancta voluntate, excluso omni alio discursu, oportebat de tempore in tempus hoc illi solatium præbere, ut diceretur, aut prælegeretur punctum aliquod sapidum Spirituale.

Recipit ultima Sacramenta plenè
sui compos, cum intensissima pietate,
cujus præter circumstantiam temporis
habuit aliud singulare motivum. Ete-
nim anno antequam monitus esset ad
edendam professionem quatuor voto-
rum, licet non expleffet nisi novem an-
nos Religionis, privilegium hoc illi in-
dulgebat P. Vicarius Generalis, ut
dispensaret in uno anno ex decem, qui-
bus solent expectare, qui studia sua ab-
solverunt extra Societatem; intuitu
dotium quibus erat ornatus à Deo tam
naturæ quam gratiæ, ob quas hunc fa-
vorem merebatur. Atqui Patri, qui
communium gratiarum se putabat in-
dignum, ne dum singularium, fuit
consilium datum propter rationes bo-
norum temporalium, quibus se abdi-
caturus erat: non omittere quidem,
sed multo rationabilius, & prudentius
facturum in emolumentum filiorum,
professionem differre; quod & obti-
nuit. Cum itaque decennium initio
Martii esset expletum, in quo mense
obiit: voluerunt Superiores moras ul-
teriores abrumperet, nisi quod super-
vene-

venerint labores quadragesimales; ac deinde ægritudo, in qua cum videret se invitari ad cœlum, acceptavit quod offerebatur, ut æternitatis iter ingrederetur novis istis vinculis obstrictus, conjunctus Deo, & plenus amore, in signum promptitudinis suæ quod non recusaret languores & majores labores, *si adhuc populo Dei esset necessarius.* Itaque antequam sumeret sanctissimam Eucharistiam in viaticum; in manu P. Provincialis, præsentibus circumstantibus non paucis, summa demonstratione pietatis solemnī professione se obtulit in holocaustum, quod admisit Deus *in odorem suavitatis*: & ipse repletus nova voluptate perseveravit in edendis affectibus pietatis, & virtutum atque ita sensibus integris & sana mente 20. Martii, die Lunæ post Dominicam quartam quadragesimæ, stipatus orationibus Patrum, ac Fratrum, qui ei invidebant tam felicem transitum, hora 15. secundum computum Italicum, nostra autem nisi fallor præter propter 10. matutina, placide emisit spiritum anno 1662. ætatis vero 57.

Simu.


Simulatque promulgata est fama mortis ejus, tantus fuit universim motus in civitate, ut Patres meritò dubitaverint, utrum non sequeretur tanta inundatio populi, & tumultus in ejus funere, qualis in exequiis hominum Sanctitate Illustrium, ex pietate populari solet quandoque oriri; sine spe quod honorificæ istæ turbationes, quas decorum non esset permittere, possent impediri. Judicantes ergo debere se eas prævertere, jusserunt spargi; quod iusta tantum instituenda forent postridie sub vesperam: at tacitè prævenientes, tulerunt mane; satis tempestive corpus more solito ad templum. Ibi cantatum est officium, quod satis tranquillè transactum est, nisi sub finem: quando expectatio populi, qui cogitabat copiam eum vivendi præbendam post prandium, nescio quo artificio, subodorata id quod erat, & timens ne spes eorum esset delusa, cœpit concurrere & inundare templum ad eum modum, ut non sufficerent septa scamnorum, quæ, ad impetum coercendum, ita in orbem disposita erant, ut non

pateret aditus : quare finito officio non sine magno molimine, fuit relatum in Sacristiam. Sed populus exclusus, tam fortiter institit, ut opus fuerit januam Sacrarii pessulo bene firmo obferare. Congruum tamen postea visum fuit, postulantibus faciem cadaveris vestiti habitu Sacerdotali ad publicam satisfactionem præbere spectandam, & quidni dicam? Venerandam; quippe duravit itus & reditus populi usque ad solis occasum, cum tali frequentia, qualis videtur in locis ubi solemniore Indulgentiæ lucrandæ proponuntur; & cum significationibus tantæ pietatis & reverentiæ, ut indeliqueret, quæ esset ejus æstimatio. Nec concursus ille fuit effectus pietatis solummodo in vulgo, quod exclamans mortuum esse virum Sanctum, subito motum excivit animorum; sed opinionem eamdem conceperunt personæ maturi judicii, qui & ob prudentiam, & ob dignitatem, qua eminebant, non tam facile erant movendæ: venerunt si quidem omnis ætatis, & conditionis, ut eum venerarentur: non fuit

fuit Ordo Regularis in Urbe, ex quo non adfuerant aliquot, & nonnulli magno numero, ad osculandas si possent manus, aut ad minimum ad flecendos poplites, in signum reverentiæ ad illud corpus, quod credebant organum virtutum fuisse dignum honore vulgarem excedente. Ad quorum iudicium, utpote securius, non mirum est quod se composuerint alii, licet viri prudentes, & præcipui, & effuderint se in omne genus officiosæ pietatis. Ipsa vespera deinde, non potuit negari multis Dominis ejus consanguineis, & devotis, qui non potuerant invisere infirmum, ea consolatio ut spectarent exanimem, quem summo loco habuerant viventem. Ideoque clausis portis & intromissis solis illis, quibus negari ex honestate non poterat, fuit in templum reportatus: neque ex conspectu ejus ullus horror, qui solet meticulositatem foeminarum percellere, & abigere quando cadavera conspiciunt, invasit intuentes: sed diu contemplantes, & iterum, iterumque fixo obtutu illud cum devotione specular-

tes honorarunt lacrymis & osculis, implorantes intercessionem illius animæ, per quam fuerant condecorati: denique fuit in sepulchro communi inhumatus, quamvis ex sententia Patrum & Superiorum in loculo separato, tamquam dignus, qui à reliquis secerneretur. Reculæ ejus & calamo, & penicillo & gypso formatæ, ex devotione, & ob memoriam rerum ab eo præclarè gestarum, fuerunt impensè desideratæ & expetitæ: attamen ob summam paupertatem, cui se adstrinxerat, tam pauca inventa sunt, ut impossibile fuerit postulationi communi facere latis. Unde prudenti consilio visum est Superioribus expedire, ut in vicem excitandæ, perpetuandæque viri tam incomparabilis memoriæ, fieret commentarius brevis virtutum ejus, quæ in vita notatæ sunt, tamquam securiores & pretiosiores reliquiæ ab eo relictæ, & imprimis dignæ ut sint in honore habitæ, portandæ non ad collum, sed in pectore præcipuè nostrorum Patrum & Fratrum, qui frui sunt felicitate videndi tam exemplari-

plariter viventem, & tam feliciter morientem: ne dici possit de illo homine justo, quod desumptum ex Isaia Ecclesia Sancta accommodat justo justorum: *Ecce quomodo moritur justus, & nemo percipit corde: & viri justi tolluntur, & nemo considerat.*



I N D E X

C A P I T V M.

- CAP. I. **R**es memoratu digne in P. Antonio Iulio antequam statum Ecclesiasticum assumeret. pag. 7
- CAP. II. De eximiis Eleemosynis P. Antonii Iulii. 23
- CAP. III. Virtutes magis præstantes P. Antonii Iulii in statu Ecclesiastico seculari. 46
- CAP. IV. P. Antonius Iulius ingreditur Societatem, & quanto in pretio habuerit statum religiosum. 74
- CAP. V. Oratio P. Antonii Iulii & unio cum Deo. 97

| | |
|----------------------------------------------------------------------------------------------------------|-----|
| CAP. VI. <i>Zelus animarum in P. Antonio Iulio.</i> | 116 |
| CAP. VII. <i>Charitas P. Antonii Iulii erga Proximum in rebus corporalibus.</i> | 154 |
| CAP. VIII. <i>Humilitas P. Antonii Iulii ordinariè exercita.</i> | 173 |
| CAP. IX. <i>Humilitas P. Antonii Iulii in munere concionatoris usitata.</i> | 213 |
| CAP. X. <i>Mortificatio Passionum animi in P. Antonio Iulio.</i> | 242 |
| CAP. XI. <i>Mortificationes corporales P. Antonii Iulii.</i> | 265 |
| CAP. XII. <i>Paupertas rigida P. Antonii Iulii.</i> | 293 |
| CAP. XIII. <i>Obedientia & regularis observantia P. Antonii Iulii.</i> | 312 |
| CAP. XIV. <i>Opinio virtutum in qua erat P. Antonius Iulius & felix transitus ad vitam meliorem.</i> | 332 |

F I N I S.

E R R A T A.

Amice Lector antequam te dimittam, est quod te moneam; Absentia Translatoris, qui prælo interesse non potuit, fuit causa, cur menda non pauca irrepererint: & quamvis ejusmodi sint, quæ per se legentibus manifeste se prodant; tamen plæraque hic subnotare visum est. Sunt autem sequentia.

Pap. 10. lin. 1. laudere, lege laudare. pag. 26. lin. 14. relictæ, lege relictæ. pag. 28. lin. 5. dicebant, lege dicebat. lin. 9. probatæ, lege probata. p. 30. lin. 3. promotos, lege permotos. p. 46. lin. 10. dum itaque, dele itaque. lin. 17. Paulæ Adomo, lege Paulæ Adorno. lin. 18. Baptistæ Adomo, lege Baptistæ Adorno. pag. 50. lin. 19. Bresciæ, lege Brixia. p. 70. lin. 5. flagitis, lege flagitiis. pag. 71. lin. 17. Genua, lege Genuæ. pag. 76. lin. 13. imbecillem, lege imbecillem. pag. 77. lin. 14. Ferarri, lege Ferrari. pag. 78. lin. 2. ambilis, lege amabilis. pag. 96. lin. 11. cum, lege eum. pag. 102. lin. 15. cum, lege eum. pag. 111. lin. 22. seluûm, lege sensuum. pag. 118. lin. 11. poliorectica, lege poliorcetica. pag. 121. lin. 21. tanti, lege tangi. pag. 124. lin. 20. ætatis, lege æstatis. pag. 125. lin. 8. Prefessa, lege Professæ. pag. 126. lin. 19. cum, lege eum. pag. 198. lin. 7. centem, lege centeni. pag. 150. lin. 12. eum, lege cum. pag. 151. lin. 11. cum, lege eum. pag. 168. lin. 19. Pater, lege Patre. pag. 171. lin. 22. vocationi, lege vacationi. pag. 177. lin. 7. quid, lege quod. pag. 183. lin. 13. abditus, lege abditus. pag. 187. lin. 17. vanè, lege vainæ. pag. 192. lin. 16. patientia, lege impatientia.

pag. 304

pag. 193. lin. 2. impigræ , lege impigrè. pag. 196.
lin. 22. emovebat, lege evomebat. pag. 199. lin. 3.
inadvertentiam, lege inadvertentiam. p. 200. lin. 23.
eo privatus omnibus, dele omnibus pag. 203. lin. 20.
auditus, lege auditis. pag. 208. lin. 3. inadvertentiæ,
lege inadvertentiæ. pag. 216. lin. 15. dicursum, lege
discursum. pag. 219. lin. 15. æquestris, lege equestris.
pag. 229. lin. 8. oribatur, lege Oriebatur. pag. 242.
lin. 16. fuerunt, lege fuerint. lin. 19. judicia, lege
indicia. pag. 255. lin. 16. sensit, lege lentit. pag. 260.
lin. 8. Et, lege at: lin. 17. indigna, lege indignas.
lin. 19. Cræmona, lege Cræmona. p. 261. lin. ultima.
contentiosum, lege contentiosum. pag. 267. lin. 2.
æquorum, lege equorum. p. 273. lin. 15. intumesceret,
lege intumesceret. pag. 275. lin. 13. furtinæ, lege
furtivæ. lin. 15. quos, lege quæ. pag. 278. lin. 14.
luderet, lege læderet. pag. 287. lin. 10. infirmat, lege
confirmat. pag. 292. lin. 4. multocies, lege multoties.
pag. 293. lin. 20. lequis, lege segnis. pag. 307. lin. 13.
exultatione, lege exultatione. pag. 311. lin. 10.
permitterent, lege permetterent. pag. 313. lin. 16.
quantus, leg. quantum. p. 314. l. 20. deest observasse,
pag. 318. lin. 17. conditas, lege conditos. lin. 20. ibi, lege
sibi. pag. 322. lin. 13. cum, lege eum. pag. 334. lin. 14.
honoratis, lege honoratus. pag. 342. lin. 4. finit, lege
sivit. pag. 344. lin. 10. eum, lege cum. pag. 349.
lin. 19. ad deinde, lege ac deinde. pag. 350. lin. 25.
in diceretur, lege ut diceretur. pag. 351. lin. 1.
Recipit, lege recepit. pag. 352. lin. 24. hora s. lege
hora 15.

